

**Lologena Wo Kiena Ne
Yesu Kristo Naña
YOANE
Siriyuia
Visayuena Na Tusi Nene**

Komņasnen suniena plas na tusi nini

Tusi nini, “Lologena Wo Kiena Ne Yesu Kristo Naña Yoane Siriyuia”, pisayu Yesu, sape naga Visena kiena Ntewa naña pimi sike amio ita, pe yaru. Yoane sape naga siri tusi nini vena yaru la naña auloia, akilia alelaga naña Yesu, naga yaru naña Ntewa pisaaria sape yoko ligán imi vena tamalia ita, a naga narina Ntewa lelaga. Naga siri sanene vena tekilia tetol malena e kia kiena Yesu, komin naña temlelaga ea (20:31).

Suri naña Yoane pisayu pñesania, sape Yesu pe Visena naña sike kemua nanua sumo, naga sike amio Ntewa. Tusi nini pisayu kile la naña Yesu kila, naña akilia aiila ita tevisu kilalea sane Yesu naga narina Ntewa naña Ntewa pisaaria sape vitetalia naga imin tamalia ita. A siraun kile la peve taaga nene naña Yesu kila, Yoane pisayu kala kinasa. Naga pisayu sanape naña yaru lañasa amlelaga e Yesu ana atavevea, a yaru lañasa yepela mavin naña alelaga ea.

E marana na keviu 13 pa tol marana na keviu 17, Yoane pisayu suri la naña pimi e Yesu kolemalo naña nasinekar la apimin vena atararia. E yemalo nene, Yesu pis ke pan kiena

nalogena lala, vena akila ruru la asuñate suri la naña yoko imi tol la pogos naña akila ke kiena yuñæena. Naga pisin mēna visena na visirplanen kiela sitomena la sumo, sumon naña kiena nasinekar la apimi atararia.

E luasinen tusi nini, Yoane pisayu naña nasinekar la apimi atarar Yesu, aþure pa kumali apis pania, a siraunia apa asuar naga e laki torovia. Naga mare, a siraunia naga mali sina, a kiena nalogena lala apisu naga.

E tusi nini Yoane pisayu malena naña ve uro re, naña yaru kilia tolia e ga e Yesu Kristo. Malena nene siari nagane, a pimi ga e yaru la naña amlelaga, asape Yesu ga naga pe mrapa, a pe purþesnen visena lelaga, a pe purþesnen maliena. A pupia suri naña tusi nini pisayuia, naga þelaga kiena Yesu pogos naña piyan ke yaru lala, pisayu suri la naña yaru la akila pona amiyuñæenia e kiela maliena e legiena makega. Naga pis e þelaga na visena sanene, amio pakaiwa lala, vena kilaen totou naiilaen sitomiena kiena la naña amloge, a kila mēna amloge sane naga mēna pa yaru saga lala. Naga pisayu suri la ne sane wii, kilaparavi, kapi vivaga, a yaru na visuaren sipsip amio kiena sipsip lala, a kilika naña krep amio mrasa, vena vian kiena yeririna lala e leþas na kieta maliena amio naga.

Komþasnen tusi nini la na nini

Visena na sumo 1:1—18

Yoane Nakeena a nalogena þesa lala kiena Yesu
1:19-51

Yesu kila kiena yuũaena 2:1—12:50
 Legiena maro lala kiena Yesu garu Yerusalem
 13:1—19:42
 Yesu mali sina a kiena nalogena lala apisu naga
 20:1-31
 Yesu m̃alivi sina pan kiena nalogena lala garu
 Kalele 21:1-25

Navisaarena naga to sumon nasiiena na yomarava nini

¹ Na konua konua rui, e purp̃esia, naga naña apio Purp̃es nen Pelaga kiena ne Ntewa naga sike amio Ntewa, a naga pe Ntewa. ² E pogos na siien sur punu ga, naga amio pa Ntewa rui, ³ naga miyuũaen yuũaena na kilaen sur punu ga. Pe sur re tai naña naga pe miyuũaen re poli.

⁴ Malena na lelaga molue e naga, ana malena nene pimi pe sane yomerarava kiena p̃egas punu ga na yeririna lala. ⁵ Naga pimi sa naña yomerarava na tegolien la naña asike e pupumalko, na yemalolo nene tařatete tauluia.

Yoane Nakeena pimi mlologon ke pisape yomerarava pimi ke rui

⁶ Siraunia, Ntewa mligan kiena yar tai pimi e yomarava nini, nane Yoane Nakeena. ⁷ Naga pimi sane yar na iilaena, vena visawalen yaru na yomerarava nene naga pimi ke ne, vena iilaen yeririna la punu ga akilia alelaga asape yaru nene naga pe yomerarava kiena ne Ntewa. ⁸ Sa naña, Yoane naga pe pe yomerarava re poli na wa, ana pe yar na visawalen ga.

⁹ Ana siraunia, yaru na yomerarava nene pimi kate e yomarava nini. Naga pe yomerarava nalelaga napo, ana pimi pe na ligan kiena yomerarava nene e malena kiena yeririna punu ga.

Yomerarava na yomarava

¹⁰ Yaru na yomerarava, naga naña sii yomarava nini, ana pogos naña pimi ea, ana yeririna na yomarava lala pe apisuluþar re si naga poli.

¹¹ Naga pimi þes puna ne uña mña ne kiena yeririna la, ana la na mratava puna pe sinelan re naga poli. ¹² Ana la ga þasia akekanan naga, amlelaga ea, ana e la ga nene punuia, naga tañan la vena akilia aim ave narina ne Ntewa lala. ¹³ Naga kila la apaeme sina yam luania, pe sa re naña sisi la na apaeme taveve lus na kuruta, pona nasinenanen sa yermene amio sira, pona sitomena kiena yeririna, ana apaeme sina taveve nasinenanena kiena ne Ntewa.

Purþes nen Pelaga kiena ne Ntewa pimi pe yeririna

¹⁴ Sanene na, Purþes nen Pelaga kiena ne Ntewa pimi pe yeririna lelaga, pimi sike likan ita, ana tepisu kiena malena napo, pulen manene laa þelaga na lemamena amio þelaga nalelagaena. Naga pe nowo tanea wa mearu kiena ne Arimata, ana mepisu kiena pupia naurarena, kiena naga taaga.

¹⁵ Pogos naña Yoane Nakeena pisayu naga nanua ne, pisape “Naga naña nepisawal pae pan amiu, nesape naga yoko siraun inu, naga su

metava, in na neto ga tano, komin naga mal nakonua laa sane, in na na nanagane ga ne.”

¹⁶ Naga pulen ðelaga wo lala, ana silaga kila ke po pan ita pañisi, kiena pupia lemamena kila temlogelue ga po pañisi. ¹⁷ Nanua Ntewa pisirlua yermarua Mosis, ðar ga kiena navisaluaena lala pimi pan kiena yeririna lala, ana Yesu Kristo, Ntewa pisirlua naga ðar ðelaga na lemamena amio visena na lelagaena pitomi e yomarava nini. ¹⁸ Ita yeririna lala pe yar re nena tai naña kilia Ntewa poli, pona pisu e kilamarana, ana yaru naña tolue ga e sitomena kiena ne Ntewa, lalua aparpran la ga veraga, naga ga pimi kila ita tekilia Ntewa amio kiena ðelaga lala.

*Yoane Nakeena mlologonyu Navisaarena
Matiu 3:1-12; Mak 1:7-8; Luk 3:15-17*

¹⁹ Ana pogos naña Yoane Nakeena mlologo ña pano-o, nasumonena kiena le Yu lala nae Yerusalem la asitom veve ke pañisi sane naga miyuñae ke sanape, pona naga pe Navisaarena, po naga ai. Ana la apitetalia yaru wa ðasia amio yar keviu si ðasia na lus wa kiena ne Livae, apim apiun petania asape “Ko na ai?”

²⁰ Ana pogos naña lala apiunia, naga pisawal ruru ga sur punu ga pan la, pisatamē la, pisape “Peraga, in na pe nepe Navisaarena re poli.”

²¹ Ana la apisape “?Sanene na, ko na Yermarua Elaisa nanua sumo ne, ana ko omal sina, po pere? Nanene komin naña Visena Wa pisape naga monar wasuþe sina sumon Navisaarena.”

Ana naga pisatamē la sina, pisape “Peraga, pe in re nene poli.”

Ana apisape “?Pogaga, ana po ko na navisaluaena naña Mosis pisaar nanua yo rui?”

Ana pisatañe sina, pisape “Peraga rui.”

²² Ana la apiun ke sina ga tania, sape “?Ana ko na a si narui? Monar ovisa sur tai van imimi vena mekilia mevano mevisawal van la naña amligan imimi mepimi. Ovisawal ruru ga van imimi, sane ko na ai?”

²³ Ana kiena navisatameena e pogos nene sanini, pisape “Inu in na pulgo korena ga ne e yokorena nini, naña Navisawalena Aisea pisawal na konua rui. Ana pulgo nene pimi pe na visawalen sape: ‘Amiu akila ruru mrapa lala kiena Supe e kiamiu malena!’ ”

²⁴ Ana lala p̃as naña asike e pogos nene, le Varasi lala, ²⁵ ana la apiun ke sina ga pan Yoane, apisape “Imimi memloge pa rui, ko na opisa osape pe ope Navisaarena re poli, pe ope Elaisa re poli, a pe ope navisaluaena re naña Mosis pisa poli. ?A visae sanene na, vanon ya ne ko na ositom osape ko na otorokin osun okekee lue yeririna lala sanene?”

²⁶ Ana Yoane pisatañe la, pisape “Inu, nakeena naña nekila ke ne e la nene, naga e ga e wii. A yaru tañena tai yoko imi kus leleu, naña naga sike pa likan ita rui, ana pe akilia re naga poli wa. ²⁷ Naga to laa metavan manene inu, sane in na pe netorokin re neva lavisin po, pona neyal nemio.”

²⁸ Ana lele naña apa ke ea na visuen Yoane, nane e norava lavisin kumali naña Petania, e wii naña Yortan lepas na vano, nane e yo naña Yoane sumã kee ke yeririna lala ea.

Yesu, narin sipsip nakuṣaṣaena kiena ne Ntewa

²⁹ Ana e legien taṣena si tai, Yesu mial pa katen Yoane Nakeena amio imimi kiena nalogena la e yo naṣa mesike ea. Ana pogos naṣa Yoane pisu Yesu, pisa pan imimi, pisape “!E, amiu avisu yar na mial ke pimi naṣa! Naga, sa ga narin sipsip kiena ne Ntewa nawarplanen nakoena na mlamulena viowa kiena ne yeririna lala na yomarava nini. ³⁰ Nanene naga naṣa nepisayu ke pan amiu nanua rui, nepisa nesape: Siraun inu, pupia yar tai naga imi naṣa sumon inu, to manene laa metavan inu sane, komin naga teke sumon inu. ³¹ Nepisa visena nene nanua, nemninue ga nesape naga ai, nemninue ga nesape erau ne nanene, ana nekilia ga nesape monar nekee ita le Israel lala e wii, vena kilaen naṣa tekilia tevisu kilale kieta yerkawa nene.”

³²⁻³³ Ana Yoane pisa meraravan pan imimi sanape naṣa naga kilia sape Yesu pe Navisaarena. Naga sape “Sa naṣa nepisa pa rui, in na pe nekilia re poli nesape naga ai, ana pe piavi re nena ga, Ntewa pis pan inu, pisa sanini, pisape: Visae ovisu kiau Ninuna Wa vitom ke tano, totano e yar tai, naga ke ga nene naṣa yoko kee yeririna lala e Ninuna naṣa kiau.

“Naga pisa sanene pan inu, ana pogos naṣa nepisu Yesu nene, nepisu Ninuna mligan ma e peni pitomi tano e naga, sa naṣa lomē, pitomi koan e naga. ³⁴ Vanon sur ne na nene naṣa nepisua, nekilia nevisawal ruru van amiu, sane pe lelaga ga, yar nene pe narina ne Ntewa kemua lelaga.”

Nalogená lua na sumo kiena Yesu apim puna

³⁵ Ana e legiena taþena si tai na, Yoane Nakeena suña ke ga wa e yo nene, sun ke amio imimi lua Antru, naþa e pogos nene mepe kiena nalogená. ³⁶ Ana mepisu Yesu mial pimi þaro lavis pu imimi. Ana Yoane pisa pan imimi lua, pisape “!Amiu lua avisu ke yar nene, naga sane narin sipsip na kuþaþaena kiena ne Ntewa!”

³⁷ Memloge Yoane pisa sanene, ana veraga ga mesuñalu, memial mepa mesiraun Yesu. ³⁸ Ana Yesu kira þatau pisu imimi lua, pisape “Nepisu sane amiu lua sinemiun ke sur tai.”

Ana mepisatamea, mepio naga sane kiamimi navianena tai, mesape “?Rapae, opimi e nini na, ko na omomon ke pe?”

³⁹ Ana naga sape “Pogaga, aimi teva avisuia.” Ana memial mepa metol e naþa Yesu sike ea e pogos nene, ana siar sane ko yepekilavi ko e maran mrae vari, mesun ña memio naga pano-o yemalolo.

⁴⁰ Ana Antru nene naþa imimi lua memloge Yoane sunyu Yesu, mesuñalu metaveve sanene, naga Antru naþa wenla Saemon Pita navetokak.

⁴¹ Ana pog naþa pisa sape taveve ga Yesu narui, ana miroro panon þesa wenla nene, a pogos naþa ñalia pis pania pisayu Navisaarena, naþa e visena na Epru kiena ne le Yu la apio asape Mesaea, a e visena na Kris kiena ne le Krik la asape Kristo. Ana pisawal sanene, sape “Mara, Navisaarena nene, imimi memial rui.” ⁴² Naga pisa pan wenla naþane, ana pure pimi pu Yesu.

Ana pogos naþa Yesu pisu naga, pisape “?A, ko ñena nene naþa narina ne yermarua Yoane

tai? Nenagane na nesikia ko sina ga, kioṃña ki Keṓas.” Kí ṃena nene kome visena nae Epru, naṓa kana kinasia kilavaru, naṓa kome visena nae Kris asape Pita.

Yesu pure nalogena lua sina apim atavevea

⁴³ Ana e legiena taṓena si tai, Yesu sinenan pisape taveve si kiena mrapa, pisape kusro yo vato si kiena yo naṓa Kalele. Mepa sanene, ṓisi na ṃal si yar tai, pisa pania pisape “Ko oim otaveve inu.” Yar nene, kiena ki Pilip, ⁴⁴ naṓa naga ṃena nae yo kiena Antru amio Pita, nanene pulkumali na Petsaeta.

⁴⁵ Ana pe piavi re poli na Pilip pa kale kiena erau tai, kiena ki Nataniel, pa pisa pania, pisape “Yar keviu naṓa yermarua Mosis amio navisalu-aena lala asiriyuia, apisawal na konua rui, naga pimi ṃalivi likan ita rui. Imimi meṃal rui, naga nae Nasaret, narina ne yermarua tai kiena kia Yosop. Ana yar nene, kiena ki Yesu.”

⁴⁶ Ana pogos naṓa Nataniel mloge asape Yesu naga nae ga narin pulkumali naṓani, naga piunia pisape “Ana sanape? Pupia yar keviu napo tanea sanene taṓatete ṃalivi e narin yo nene Nasaret!”

Ana Pilip pisataṃea, pisape “Ei, ve ovis re sanene, ko na oim ovisuli kone wa.”

⁴⁷ Ana ṓisi na lalua apa sina puna ne Yesu, a pogos naṓa lalua amial apim lavis puna, Yesu pisu Nataniel, pisayu naga, pisape “Lelaga ga, nepisu yar nene sa ne yar wo lelaga tai nae Israel, yar tai naṓa navisokanena pe to re nena e naga poli.”

48 Ana Nataniel mloge Yesu pisayu naga sanene, piun tania sape “?Ana sanape na ko na okilia osape in na yar na sanene?”

Yesu pisatarnea pisape “Pogos naña Pilip naga pe piņasun ko re poli wa, pogos naña ko ga taaga opa ruru ko ke vatanon purpiliva, in na nekirawal ko pa rui.”

49 Ana Nataniel milan nakiliaena kiena Yesu nene, pisape “!Navianena, ko na narina ne Ntewa kemua na lelaga! Ko na ope þarin suþe lelaga kemua nae Israel.”

50 Ana Yesu pisa pania, pisape “!In na nepisa ga narin visena tai van ko, naña nepisu ko e purpiliva nene, ana veraga ga kila ko na omlelaga mārera e inu! Nanene na po paþisi, ana nevisaar van ko sane yoko ovisu sur na ilanena la ve moki vaþisi ne, naña ve keviu laa sane taulu naña opisu pa rui. 51 Lelaga nepisa ruru ga, sane yoko amiu punu ga avisu ma e peni naga vike ga mēke na, amio navisi nae ma metava lala avitom ke tano e inu, ava sina metava, avitom tano, ava si metava ve sanene. Sur ne la nanene akilia avisuia komin naña inu nepe Narina ne Yeririna, sane in na nae ma e peni nepimi nepe yeririna ruru nena naapo.”

2

Kile na sumo kiena ne Yesu, e talopaena gar Kana

1 Ana Yesu lala apimi atol pa norava nae Kalele, ana e legiena na telu, þaþagena na talopaena tai e kumali nene Kana. Ana anenane Yesu naga pa kate pa e þaþagena nene rui, 2 a siraunia amligan

visena pimin Yesu amio kiena nalogena lala, apio la m̃ena ga vena ava ea. ³ Ana Yesu lala apa akate e p̃aṣagena, asum̃a amio yeririna la pano-o, sur tai naga piowa, kuruta na munena na p̃aṣagena nene naga p̃isi iroro ga. Ana anenane Yesu pimi pisa pa Yesu, pisape “Namunena la naṣa yar keviu na p̃aṣagena kila ruruia, amun make rui, ana nanagane na aplasan narui.”

⁴ Ana Yesu pisatam̃ea, pis pania, pisape “?Sira marua, yuṃaena ya ne e p̃aṣagena nene teke e inu? Ve oligan re te lum̃au, vanon kiau pog na yuṃaenen sur la ne sanene, naga pere ke ga wa.”

⁵ Anena mlogear sur la naṣa Yesu pisa, ana pis pa yar la naṣa na yuṃaenen p̃aṣagena, pisape “Sur ya la naṣa sa naga visa, amiu akila ga, ve avis re, ayuṃaen ga.”

⁶ Ana p̃isi na Yesu pisu pupia pias nen wii laṣasia sum̃a ga lavis, naṣa le Yu la asum̃a apio ke wii pa ea, akevan ke kiela sur la ea sa naṣa kiela lotuena pisa ke. Pupia pias nen wii la nene ate e kilavaru torokin waren lita ponotia ve taaga [100], punu ga tol orai. ⁷ Ana naga pisa pan la, pisape “Amiu ava avio wii, awar imi ataron vito e pias nen wii la nene vano-o uleule.” La apio m̃a wii pano-o apuleule ruru nenaga.

⁸ Ana Yesu pisape “Pogaga, nagane na avioli ve tekaki ga, ala van yar keviu na p̃aṣagena munlia.” Pisi na apio, amla pano-o akian pania.

⁹ Ana yerkaṃa munlia, mloge sane pimi pe kuruta na munena narui, ana milan paṣisi, mninue ga sape aṃal namunena nene pe. Lala naṣa apio, la ga akilia ke, ana pe apisawal re poli,

ṽisi na naga pio yar naṽa talopa ga na wa pimi puna. ¹⁰ Yar nene naga pimi ana yerkaŵa pis pania, pisape “E ṽaṽagena taṽena lala, apio ke kuruta namunena naṽa po pimi ṽesa, ana pogos naṽa yar la amun lili ṽa pano-o, atol mare ga kuruta na munena naṽa pe po manene re poli naga pimi maro. Ana e ṽaṽagena nini, la amun ṽa pano-o, ṽisi na ko otol ga ṽau kuruta napo tai naṽa pimi maro. Komin ya ne okila sanene?”

¹¹ Ana sur naṽa Yesu kila e pulkumali nae Kana e yo naṽa Kalele, naga sane pe pupia kile tai, naga pe kiena kile ṽesia naṽa miyuṽaenia. Naga kila, sa naṽa naga sape siar na kila meraravanen kiena puriukawaena nae yo metava, ana pogos naṽa kiena nalogena la apisuia, kiela nalelagaena e naga pa laa metava, sane naga pe Navisaarena kemua lelaga. ¹² ṽisi narui na la punu ga nene apato si garo Kapeneam, nane Yesu amio anena, wenla lala amio kiena nalogena lala, apam atol si yo nene asu li ṽa sane pano-o tol legiena la ṽasia.

Yesu ṽene plan lala naṽa aṽilwilin ke sur lala loyuṽa e Yuṽa Wa ṽana ne Ntewa

Matu 21:12-13; Mak 11:15-18; Luk 19:45-46

¹³ Ana pogos tai, lavis ke pog naṽa le Yu la akila kiela pupia ṽaṽagena tai, naṽa Paṽagena na Sitomalen Natamaliaena. Ana kiela ṽelaga marua tai, sane e kas punu ga lala punu ga monar akilali naṽa ava ma metava Yerusalem e kana pog ne naapo vena kilaen ṽaṽagena nene, vena sitomalen kala apua la naṽa amolue gar

Isip, ana e pogos nene Yesu m̃ena ga pavin. ¹⁴ Naga pa tol yo, ana pa kate e Yum̃a Wa Mana ne Ntewa, pisu lala moki naṣa asike aṣilwilin ke puluk la, sipsip lala amio manu la, pisu m̃ena la naṣa nakepuen kilavaru taṣena lala va e kilavaru nena naapo na Yum̃a Wa m̃ana Ntewa. Yum̃aena la nene ape yum̃aena wo tai, komin ape yum̃aena na wilwilinen sur lala naṣa yeririna la monar aulia vena kilaen kuṣaṣaena ea, a pe sur viowa tai, la akila kare laa yar lala, ana metavanja, akila ke loyum̃a e kove na yo wa.

¹⁵ Ana Yesu pisu naṣa akila kare yo wa na yum̃a sanene, ṣisi na sinena mimi, ṣar kilika lala, ṣuarar luas lua sane, panon la. Naga pa sanene, pa m̃ene plan la amio kiela sipsip lala amio puluk lala apa vanua petan Yum̃a Wa m̃ana ne Ntewa, ana e lepas kiena ne la naṣa akepu ke kilavaru, pa taron plan kiela karo na kilavaru, kawe plan m̃ena kiela varvara lala. ¹⁶ Ana yar la naṣa aṣiliwilin ke manu lala, naga pis pan la pisape “!E, awar plan kiamiu sur la vetan yo nene! !Amiu ve akila re yum̃a m̃ana ne kiau ata nene imi ve yum̃a na tauluen kiamiu kilavaru sanene!”

¹⁷ Ana pogos naṣa nalogena la apisu naṣa Yesu m̃ene plan la sanene, kila lala asitom̃al si nasiriena wa tai, sa naṣa pisayu pa Navisaarena sumo rui, naṣa pisa sape

“Kiau sitomena urmi paṣisi e yum̃a wa kioṃa, naga sa naṣa kapi naga kekan ke loyum̃a e sineu.” *Yauena 69:9*

¹⁸ Ana vanon suri nene, yerkawa kiena le Yu lala, la m̃ena apisu ke sur la naṣa Yesu

miyumñaenia, ana apiun tania, asape “Suria ne ko na omiyumñaen ga ne, sur keviu tanea. ?Ana ko nene okilia okila kile ya ne e maramimi, vena kila imimi mevisu kilia sane mesmesu ga naña okila sanene?”

¹⁹ Ana Yesu pisatamē pan la, pisape “Pogaga, kiau kile naga sanini: Amiu awe plan Yumña Wa nene, ana siraunia, e legiena ve telu ga, yoko nevisirlua sina ga.”

²⁰ Ana asape “Lala naña amiyumñaen yumña nene, amiyumñaen pano-o tol kas lualima yam vari pa orai, ana sanape ne ko na opisa sanene, osape okilia ovisirlua si naga e legiena ve telu ga? !Tařatete ga ve sanene řa!” ²¹ Lala apis sanene, vanon la pe akilia ruru re sur naña Yesu pisa ke e pogos nene poli. La pe apisu kilia re asape pog naña Yesu pisa ke Yumña mña ne Ntewa nene, pisa ke ga tasnena ne. ²² Ana siraun laa sane, pogos naña naga mal sina ga taulu marena, kiena nalogena lala asitomñal naña naga pisa visena la nene pan la, řisi na kila amlelaga manene laa e nasiriena wa lala amio visena kiena ne Yesu lala pan la.

²³ Ana Yesu la asumña e řařagena nene garo Yerusalem pano-o, naga kila ke kile la moki, ana pogos naña yeririna la apisuia, lala moki amlelaga e naga asape naga pe Navisaarena. ²⁴ Ana Yesu pe tamñan manene re naga pan la poli, pe řasine manene la re poli, vanon naga kilia ruru la pa rui. ²⁵ Yar tařena tařatete visa sur tai va Yesu e lepas na řelaga kiena ne yeririna

lala, vanon naga kilia ruru make ga, kilia ruru sur punu ga naña sike e sitomena kiena yeririna lala.

3

Nikotimas pimi pisu Yesu

¹⁻² Ana pogos taņena tai na, kolemallo, namumonena tai kiena ne le Yu lala pimi sape visu Yesu. Yar nene naga Varasi tai, kiena kia Nikotimas. Pisi na naga pimi, pisa pa Yesu pisape “Navianena, imimi mepisusu ko ke, naña mepisuluņar sane ko, ko navianena tai naña okom puna Ntewa opim, vanon pe yar re tai naña kilia kila kile la ne sa naña ko na okila ke ne poli, sa Ntewa ve to re amio naga.”

³ Ana Yesu pisataņe pania, pisape “Ee, kile la nene apogaga, ana in na monar nevisataņe ve lelaga van ko, sane yar naña ve vaeme re sina ga imi ve urviu, yoko taņatete Ntewa ve suņe e kiena malena.”

⁴ Ana Nikotimas sinena pulan visena nene, pisa pisape “!Aulai! ?Ana yar naña pe yermarua pa rui na kilia vaeme si ve sanape? In na pe nesitom re nesape naga kilia va sina ga loyuma e meņena ne anena poli, vena vaeme sina.”

⁵ Ana Yesu pisataņea sape “Nepisa pe lelaga pan ko, sane yar monar vaeme e wii, a monar vaeme e ninuna. Visae peraga, naga taņatete va loyuma e navesuņenena kiena ne Ntewa. ⁶ Yar kilia war sina ga yaru, ana Ninuna kiena ne Ntewa kilia war sina ga ninuna viu e malena kiena yeririna. ⁷ Nanene na vaemeena nalua

naña nepisa ke pan ko. Ve sanene, ko na ve sinemña ulan re si naña nepisa pan ko nesape ko na monar ovaeme sina.

⁸ “Ositom veve li lagi. Lagi na miyui ke ne, naga pa ke ga e yo naña sape va ea, pona temloge ga miyui ana temninue ga tesape miyui pimi ke sanape, pona pa ke pe. Ana mrapa naña Ninuna miyumñae e malena kiena ne yeririna lala naga sa nene, naga sa naña lagi.”

⁹ Ana Nikotimas sitom manene e visen la nene, piunia sape “Aulai, ana sur nene naga sanape ãa!”

¹⁰ Ana Yesu pisatamñe pania, pisape “Ko na ope pupia navianena tai kiena ne le Israel la rui, ana nepisu sane sur la ne nepisa meraravan ke pan ko ne, ko na pe okilia re nenaga na! ¹¹ Oyagogo ruruia! Sa naña navisawalena la amiyumñæn pa nanua rui, in na nepisa ke ga sur ya naña nekilia amio suri ya naña nepisua, ana sa naña silaga, amiu yeririna nae Israel lala yepemiu mavin kiamimi visena lala. ¹² In na nepisayu pa sur na yomarava nini pan amiu rui, ana yepemiu mavin lelagaen ea, ana visae nevisayu si sur nae ma metava lala, yoko akilia alelaga e ve sanape? In na nepisu sane peraga yo. ¹³ Ana inu Narina ne Yeririna nekilia nevian amiun sur la nae metava, vanon pe yar re si tai poli naña pisu yo nene, ana in ga Narin Yeririna nepetan ma e nene nepitom tano rui, siraunia yoko nowasupñe neva si metava ea.

¹⁴ “Nanua sumo sumo, yermarua Mosis la asike e yo korena, lomñara la akar momñar ke yeririna lala, ana pisirlua laki tai, miyumñæn totouena

na lom̃ara a mligan mono metava ea, ana yar la naṓa lom̃ara kar la, visae akira ga va avisu lom̃ara naṓa m̃eke metava, Ntewa tamalia la. Ana e ga e mrapa m̃a nena nene, yoko monar aligan inu m̃ena Narin Yeririna nomon metava e laki tai. ¹⁵ Ana yar naṓa visae lelaga e inu, yoko tol malena viu naṓa ve uro re pogos tai.”

¹⁶ Yesu pisa sanene komin Ntewa sinen si yeririna na yomarava la nini keviu paṓisi, ana taṓan narina nowo nene, naṓa naga taaga ga pe kiena, pitomi mare wo ita, ana yar ai naṓa lelaga e naga taṓatete kovio, yoko tol malena wo naṓa ve uro re pogos tai. ¹⁷ ?Ana vanon ya ne Ntewa mligan narina nene pitomi tanon yomarava nini? Pe mligan re pitomi vena naliṓereen yeririna na yomarava nini poli, ana mligan pitomi vena taṓan kiena malena vena tamalia itaena.

¹⁸ “Yar naṓa mlelaga kemua e narina nene, yoko Ntewa taṓatete liṓere naga, ana yar naṓa pe mlelaga re poli, nakoena teke pa e naga rui, vanon pe mlelaga re e narina ne Ntewa poli. ¹⁹ ? Ana naliṓereena nene naṓa Ntewa monar kila, purṓesia naga ya? Nanene vanon mligan kiena yomerarava pitom e yomarava nini, ana yeririna la akila piowa ga pano-o, pe akekaran re naga poli, sinelan ga ṓelaga viowa la na yemalolo. ²⁰ A lala punu ga naṓa akila ke piowa sanene, sa naṓa pe sinelan re nena yomerarava nene poli, pe sinelan re aim lavisin poli, amaraun asape sa kilalae kiela naviowaena la nene vim kakate e yometava, ṓisi na yar la akilia avisu

kilalea. ²¹ Ana yar la naña amiyumãe e ãelaga naña na po a mesmas, pe amaraun re yaru na yomerarava nene poli, apim lavisinia. Lala akekarania, komin yomerarava nini naga kila meraravania sane sur la naña akila, pe yumãena nalogearena ga na sinenanena kiena ne Ntewa.”

Yoane Nakeena kekara vanon Yesu siar kiena yumãena

²² Ana siraun sur la nene, Yesu pure kiena nalogena lala amligan Yerusalem apa e norava nae Yutea. Apa sanene, asun akee ke yaru lala.

²³ Ana e mña nena e pogos nene, Yoane Nakeena mña suma e lele taña tai kiena ki Aenon, lavisin yo naña Salim. Naga pimi e nene vanon wii tai meke ea, ãisi na yeririna la naña apim puna, naga kee la e wii nene. ²⁴ Nanene e pogos naña pe atarar re naga amligan pa e yumã na koena poli wa.

²⁵ Ana e pogos nene nalogena kiena ne Yoane lala akila visena tai amio le Yu taña tai e lepas nakevanen sur lala sa naña kiela lotuena pisa ke, ana e lepas mña nakeena lala naña Yoane amio Yesu lalua akila. ²⁶ Apisayu mña pano-o ãisi na apim apisu Yoane, apiun petania, asape “Navianena, mesape meviun tan ko sanape e lepas naña nanua sumo, pogos naña tesike e wii naña Yortan lepas navano, ana yaru naña Yesu pimi pisu ko, ana ko na opisa plan sur moki kom puna. A nanagane na naga mña kee ke yeririna lala, ana la punu ga asumã amliligan ita apa ke ga puna, la moki na moki.”

²⁷ Ana pogos naña apisa sanene pan Yoane, naga pe pielue re poli, pe mloge piowagan re poli, kekaran ga, pisape “Ita yeririna la punu ga monar teyuñaen ga suri ya naña sa Ntewa ligan te limata. ²⁸ Sa naña amiu akilia ruru pa rui, in na nepisawal lue ga, sane kiau yuñaena, in na pe Navisaarena re poli, in na nesumon ga naga nepimi, ve na visawalen sape naga pimi pa rui. ²⁹ A nenagane na, sane amiu na apisawal ga pan inu na wa, naga pimi kila ke pa kiena yuñaena rui, ana suri nene nekekarania, nepisu po pañisi.

“Naga sane pog na talopaena, naña sanini. Visae yar naña talopa, kiena erau tai, naga iila keviu nakilaruruen sur punu ga na pañagena, ana siraunia, e kana legiena nena, pogos naña aure sira imi, sira nene tañatete va totano amio yaru nene, va su ga amio wona. Ana yaru nene pe mloge re piowa poli, kiena kekarena maran taaga ga sane naga naña talopa. Ana nanagane, in mēna nekekara sanene, naña kiau nalogena la asuña ataveve Yesu. ³⁰ Nanene komin Suñe Navisaarena naga monar imi ve keviu lue ga sanene, in na monar neim neve tokak lue ga.”

?Navisaarena imi yuñae ve sanape e yomara-ava?

³¹ Ana Yoane Nakeena pisayu Navisaarena, sape “Naga nae yo na mava, naga su metavan sur punu ga. Ita tomolue ga tano e yo nini, ana tekilia tevisu ga sur na tano lala. Ana sa naña nepisa, naga petan ma e peni pitomi tano, to metavan yeririna punu ga, ³² a naga pitomi

pisawal ke sur la naña nanua susumo pisu ma metava, a sur la naña mloge. Naga pisawal sur wo la nene, ana yeririna la pe sinelan re kiena visena la nene poli, pe amlelaga re e poli. ³³ La moki pe amlelaga re poli, ana ita naña temlelaga, kieta nalelagaena kila sane Ntewa, naga kiena visena lala pe lelaga a mesmes ruru po. ³⁴ Kiena visena la nene, mligan Navisaarena pitomi pisawal pan ita rui, ana tekilia tesape visena la nene pe visena lelaga. Nanene komin pogos naña Navisaarena pitomi, tepisu sane naga pis e puriu kawaena na Ninuna Wa kiena ne Ntewa, vanon Ntewa mla kiena Ninuna pan naga pe komsus re poli, punu nenaga. ³⁵ Ntewa Arimana kekaran narina nene keviu pañisi, ana mligan sur punu ga e limana.

³⁶ “Ve sanene na, ita naña temlelaga e naga, tetol malena rui naña pe nalue ga. Ana yar naña pe mlogear re poli, yoko tañatete visu malena na sanene pogos tai, ana sinekar kiena ne Ntewa ve keviu vania.”

4

Yesu pisape wasuñe si Kalele kom lepas na Samaria

¹⁻² Ana e pogos nene, visena tai telivi ña ga, apisa ke asape Yesu suña pure ke si nalogena tañena la moki apim puna, suña kee la. Ana sa naña pe Yesu re kila ke nakeena e la poli, ana imimi nalogena ga la mekila, ana la apisu sane

yeririna kiena ne Yesu la apim ape moki taulu kiena Yoane Nakeena.

Pisi na la apisasa lelein ke visena nene pa e yo la sanene, pano tol Varasi la, ana pogos naña Yesu mloge sape la mña akilia, ana kila amloge piowa kominia, ³ naga pisu sane popon vetan Yutea, vato si tano garo Kalele. Pisi na naga mligan yo, pato sanene, ⁴ ana e kiena mrapa Ntewa pisaar sape monar vato war ro e norava nae Samaria.

⁵⁻⁶ Ana memial mña mepano, mepimi mořarpoyo e kumali tai, kiena ki Saeka. Ana lavisin kumali nene, pupia pulus nen wii tai moña ga, naña siar nakonua konua rui, pimi tol nagane, apio asape wii kiena ne Sekop. Porotano nene, nanua susumo pe kiena ne yermarua Sekop, ana siraunia naga tamñan pa narina naña Yosop.

Ana memio Yesu memial mepim metol wii nene, mrae su va ruru nena, Yesu mloge yepena mimi vanon kiamimi pupia yalena e mrae mñarera, pñisi na pa totano e yepas nen wii nene.

Yesu pitawe sira nae Samaria tai

⁷⁻⁸ Mesuña e wii nene pano-o, pñisi na imimi nalogena la mesuñalu mepa e kumali pe na ulen kamimi kinanena, ana Yesu naga taaga pa ruru toña ga. Pisi na sira tai nae Samaria mial pimi sape vio wii. Naga pimi ana Yesu piun tania pisape “?Awis, okilia ovio re mña wii tai?”

⁹ Ana sira nene, pe kilia re Yesu poli, ana pisu kilia ga sane le Yu tai, ana milan pañisi naña naga pis ruru po pan sanene, vanon e pogos

nene, le Yu la amio le Samaria la pe apivis vitawa re poli. Ana piun tan Yesu, pisape “?Vanon ya ne ko na ope le Yu, opis panu, sira nae Samaria, opiun wii tan inu?”

¹⁰ Ana Yesu pisatamea, pisape “!Sira, visae ko na okilia ga nalaena nowo naña Ntewa sinena pisape la van ko! !Visae ko na okilia ga sape in na ai, naña nepiun wii tan ko! Visae ve sa ga nene, pona ve in re naña neviun wii tan ko, ana ko na naña oviun wii tan inu. Ana pogos naña visae oviun wii tan inu, nekilia nela wii naña pe wii na laena malena van ko.”

¹¹ Ana pogos naña sira mloge sur nene, piun petan Yesu, pisape “Yar keviu, pe kionã sur re tai naña na vioen wii e poli, ana pulus nen wii nene naga pato tano pañisi. Ve sanene, wii na malena naña opisa, yoko otol ve sanape, po yoko ovio lepas nape? ¹² Ana opisa ke wii tañena nene na, nane meke nini naga pe wii tanea tai. Kieta yermarua na susumo naña Sekop, naga mña wii nanini. Naga mun ke ea, amio narina lala, kiena sur mal lala, amligan lelein pimi tol ãane. Ko na omãpe ko opo taulu yermarua Sekop nene ana okilia ola wii tai naña wo taulu nanini?”

¹³ Ana Yesu pisatamea pisape “Lelaga, wii nene naga po, ana pogos naña tomun pae na, ve piavi re na moto kar ita sina. ¹⁴ Ana yar naña visae mun wii naña nela vania, ãisi na naga tañatete si moto karia. Yoko wii naña naga munia, imi ve sa purães nen wii si tai loyuma e kiena malena, ve wii na malena naña ve uro re pogos tai, sumã lalau lue ga vetania, tañatete mema pogos tai.”

15 Ana sira nene pe kilia ruru re visena kiena ne Yesu nene poli wa, pisape “Yar keviu, visae sanene, popon ola re narin wii tai nene van inu, vena nemunia, ana ve moto kar inu re sina, ve netom re si e nini nevio wii.”

16 Ana Yesu sinenan sape sira nene kilia sape naga ai, ana pisa pania, pisape “Nevisa sur tai van ko sumo wa: ovato sina, oto ovio oña oure naga amiu lua avam si e nini.”

17 Pisi na sira naña pisape “Ee, pe wou re tai poli.”

Ana Yesu pisa pania, pisape “Lelaga, ko na opisa ke memes ne, ko na pe oña re tai poli.

18 Nanene vanon yar la naña ko na oñere la nanua sumo rui, la punu ga tol lima, ana nagane na osike sina amio tai, ana pe otalopa re amio poli. Sane kioña visena pe lelaga ga, ko na pe oña re tai poli.”

19 Ana sira nene sinena pula pañisi naña sane Yesu kilia ruru kiena malena sanene, pisape “Lelaga ga, yar keviu. Nenagane na nekilia narui, ko ko na navisawalena tai. 20 Naga po pañisi ne, ana pona ko na navisawalena ga kiena ne le Yu la yo. Imimi le Samaria lala, kiamimi yo wa nane pupia tavie nane ma ne Kerasim, naña repimimi la nasusumo amlotun Ntewa e konua rui, pimi tol nagane. Ana amiu le Yu lala, añareran ke asape pupia kumali wa kiamiu naña Yerusalem, naga taaga ga pe lele memes na kilaen lotena van Ntewa. Sanene, a si na mesmesu narui, amiu pona imimi? Ovisali nene!”

21-22 Ana Yesu kekaran nakilaruruen sitomena kiena ne sira nene e ðelaga mesmes na lotunen Ntewa, naga pisa pania, pisape “Lelaga vineu, opisa pe lelaga ne, lotena kieta italu pe maran taaga re poli. A nanene pe vanon re lele na kilaen lotena la lua, naga vanon sur na sanini. Amiu na yo nini, akila ke lotena, a pe akilia ruru re naga naña amlotun ke poli, a imimi le Yu la, Ntewa kilaar pisape yaru na tamaliaen yeririna lala naga molue e kiamimi lusia, ðisi na mekilia ruru Ntewa kamimi naña memlotun ke naga.

“Ana nekilia nevisa van ko sane yoko taðatete ve sanene. Monar olelaga e inu, naña nepisa ke pan ko nagane, sane pogos tai ne pimi ke ne yoko nalotena viu tai siaria, naña ve kieta ita punu ga. Le Yu amio le Samaria, ve tesitoñal re si sape yo mesmes na lotunena Ntewa ea nane ma tavie ne, po kumali naña Yerusalem, po yo taðena si tai. ²³ A pupia sur ga naña tesitoñalia, visae telotun Ntewa, na monar tetamñan Ninuna Wa yumñae e ninuta, a monar telotun lelaga, torokin naña kiena visena lelaga pisa.

“Ana nanagane na Ntewa arimata kale ke yeririna la naña akilia alotun naga e ðelaga mesmesu na sanene. Pisi na e pogos ne pimi ke na wa, po naña pimi pa rui, yoko kiena ðegas na lelaga na kiena lotena, alotun naga ve sanene. ²⁴ Ntewa naga pe ninuna, ana yar naña sape lotunia, monar lotun e ninuna, a suri nene monar ve lelaga e kiena malena.”

²⁵ Pisi na sira nene, naga mlelaga ke sape yoko Navisaarena imi, naga naña visena nae Kris pisape Kristo, naga pisa pa Yesu pisape “Sur la

naña ko na opisa ke ne, pona pe lelaga yo, ana nemlelaga nesape Navisaarena naña yoko imi, naga ke narui yoko visawal sur punu ga ve lelaga van imimi.”

²⁶ Ana Yesu pisa ga narin visena nene pania, pisape “Nane ko na opisa ke ne, in ga nini, nane nesun ke nemio ko nagane.”

²⁷ Naga pisawal pa naga pan sira nene sanene, ana nalogena la añasuñe la sina apa atol yo nañane. Apam na, apisu Yesu sun ke amio sira naña ne, sane lalua ga, ana la sinela pulania. Sinela pula na aparurula ga, pe lala yar tai piun re petan sira nañane pisape sinenan ya, po piun tan Yesu pisape lalua asunyu ke ya. ²⁸ Ana sira naña sumalu, mligan mña piawi na wii meke na, mial si pa unña e kiela kumali. Pogos naña pa tol unña pisawal pan yeririna lala, pisape ²⁹ “Wolawa le Yu tai sike tano garo puluwii, sun amio inu, kilia make sur punu ga e kiau malena. Nepisu sane Navisaarena kemua, po peraga? Amiu aimi, teto tevisulia.” ³⁰ Ana lala asumalu apito tano asape avisu Yesu.

Pakaiwa na kinanena naña marua sike lokove

³¹ Ana pogos naña lala amiyal ke apimi, akate re poli wa, nalogena la añar plan kala kinanena naña apato apulia, pisapa pan Yesu, asape “Navianena, oim okinana.”

³² Ana Yesu pimi re poli, ana apio sina ga pano-o pisi na Yesu pisape “Amiu akinana, in na kau kinanena tañena tai teke na naña amiu pe akilia re poli.”

³³ Nalogena la amloge sanene na, la apisasa ke pan la, asape “?Ane kus kana kinanena nene pimi pania? !Pe tepisu re nena yar tai poli!”

³⁴ Ana Yesu pisa pan la, pisape “Peraga, kinanena naña nepisa ke ne naga pe tañena. Kau kinanena, naga yuñnaena na logearen nasinenanena kiena ne naga naña mligan inu nepitom tano, monar neyumaen punu ga vano-o ñisi.

³⁵ Pogos naña temapila lokove, ita tepisayu lue ga tesape ‘Kupario vari sike ga wa, kinanena marua,’ ana nagane e lokove kana Ntewa yaru la asu ruru ke asape aloge kiena visena rui, la na asa ga kinanen la mamarua rui. Ana sineun nesape amiu avike li kilamaramiu lala, akirava ruru lia e yo lala, ana yoko akilia akirawal kinanena la mamarua ruru po rui, nagane pe pog na va waren imi. ³⁶⁻³⁷ Ana la naña ava awaria, yoko akekara vañisi vanon kiela narin nalaen tai naga teke pa rui, ana pogos naña awar kinanena la nene imi uña na malena naña ve uro re, yar keviu naña mapila, yoko naga mēna kekara vañisi. Naga sa ga visena naña asape ‘Yar tañena mapila, tañena pa ñaria, ana pupia kekarena pan yeririna punu ga!’ ³⁸ Sanene, in na nemligan amiu vena ava aure yeririna lala naña li tañena ga la akila pupia yuñnaena pan la rui, ana nanagane na amiu punu ga ayakol amiu veraga e na logewoena e yuñnaena nene.”

Le Samaria la moki amlelaga

³⁹ Ana pogos naña le Samaria la e kumali nene amloge naña sira nene pisape Yesu kilia make sur la punu ga e kiena malena, sinela pula pañisi,

kila lala moki amlelaga e Yesu. ⁴⁰ Ana pogos naña apim asape avisuia, la asun ña amio naga pano-o, ñisi na apiun tania asape visae mekilia meva uña amio la. Pisi na mepa mesuña amio la pano-o tol legiena lua, ⁴¹ ana la moki sina amlelaga e naga vanon kiena visena wo lala. ⁴² Apisa ñena pa sira nene, asape “Nanua sumo, memloge sur la naña opisa, memninue ga, a nanagane, memloge ruru nena kiena visena lala, mekilia sane pe lelaga ga narui, kieta yar keviu nene, naga pe Natamaliaena na yomarava.”

Kile nalua kiena ne Yesu ma Kalele, tamalia narina ne supe keviu tai

⁴³ Ana legiena lua nene ñaro pano, memio Yesu memligan yo nene, metaveve si kiamimi mrapa mepato si tano e lepas naña garo Kalele. ⁴⁴ Yesu sinenan sape wasuþe si va gar kiena yo Kalele, komin naña naga pisu li taþena lala amaagan li visayuen naga, asuña akalewele silaga. Nanene taveve kiena visena tai, naña pisape “Yeririna taþena lala akekaran navatanon ruruen navi-sawalena, ana yeririna ga la na pulkumali puna na peraga, la asitom korenan ga naga.” ⁴⁵ Ana pogos naña mepa makate e yo naña Kalele, yaru na kiena yo lala akekaran pañisi, aporworunia. Nanene vanon naña sumo, lala moki la ñena asike e paþagena ma Yerusalem, ana apisu pa nataþaen ñarera tai naña Yesu miyumuñen e Yumuña Wa ñana ne Ntewa e pogos nene, ana apisu po pañisi.

⁴⁶ Ana sun mialili ke yo lala nae Kalele pimi tol sina ga kumali naña Kana, naña nanua sumo kilapu wii pimi pe kuruta na munena. Ana e pogos nene pupia suře tai nae pulkumali tařena nae Kapeneam sike e yo nene, mloge ke piowa vanon narina yermene mai keviu pařisi, lavis ga mare. ⁴⁷ Ana pogos naña mloge asape Yesu řasuře ma Yutea pitomi si Kalele rui, naga pa kirawalia. Ana pisu Yesu, tag pania sinenan pisape va uña vena tamalia narina nene. ⁴⁸ Ana Yesu pisa pania, pisape “Pona ko mēna sane yeririna tařena la nene. Sinelan lue ga kile tařena lala, ana visae neyumaenia, alelaga e in narui, a visae pe apisu re poli, pe akekaran re nalelagaena e inu poli.”

⁴⁹ Ana pupia suře māreran pania, pisape “Yar keviu, awis oimi vilaga, visae pere na naruu naga kovio.”

⁵⁰ Ana Yesu tařali nalelagaena kiena ne suře nene, pisape “Peraga, ko ga taaga ovano. Nevisa van ko, naruña tařatete mare, mal mña woga ga.” Pisi na naga mlelaga e visena naña Yesu pisa pania, mligan yo pa si uña.

⁵¹ Ana e legien tařena sina, pogos naña řasuře ke si pavin, pitawe kiena yeririna lala, amial lulu ke mrapania. Ana apisa pania asape “Naruña mloge si pogaga teke na.”

⁵² Ana piun tan la pisape “Amiu asitom veve ruru lia: Pog ya ne naga siar mloge pimi po sina ga?”

Ana apisatamea, asape “Mepisu sane yepena pimi manin ruru nakoneva kolpae, sur tai sane

koe aora taaga.” ⁵³ Ana ariman yermēne nene mloge na nene, kilia ga sape naga ke narui mesmesu ga aora naña Yesu pisa pania pisape narina tařatete mare, mal ga woga ga. Ana sur nene kila naga, amio la punu ga na mratava puna, amlelaga e Yesu.

⁵⁴ Ana natamaliaena kiena ne yermēne nene, Yesu kila suraun naña mligan ma Yutea pitomi, ana pe kiena kile nalua gar lepas naña Kalele.

5

Yesu kila ruru si yar tai naña yepena mare yam piavi

¹ Ana Yesu suña Kalele yam piavi ña pano-o, tol pog na řařagena tařena si tai kiena ne le Yu lala ma Yerusalem. Ana Yesu lala apa si metava e řařagena nene. ² Asumña Yerusalem sanena e legien tai Yesu mial pito tano lavisin pulutava keviu na kumali nene naña apio asape Pulutava Na Sipsip, ana apa lele tai naña wii na kulena tai ñeke ea, naña e kiela visena apio kiena ki Petsaeta. Ana e yepas nen wii nene, silparpara la lima sike ea, amiyumñan e kilavaru. ³ Ana nalua ga inanena lala, kilamara kata lala, a laulu lala, amio la naña yepela la marmare, la ne sanene amoki manene apim añeke e lepa yuña taaga la nene. Apim asike sanene, vanon wii nene yam peve taaga kulkulul, ⁴ sa naña navisi kiena ne Ntewa tai pitomi kila wii nene kulkulul, ana pogos naña apisu sanena, inanena la nene yar ai naña va řes tol wii nene, yoko maiena ya naña teke e yepena řisi veraga ga e pog nene. ⁵ Sanene

inanena la asumãa apim e yo nene, ana lala yar tai naãa sike e pog nene, naga yepena marmare tol kas lualima yam telu pa orelu [38] rui. ⁶ Ana pogos naãa Yesu pimi, pisu yar nene, kilia sape yar nene monon inanena nene yam piavi sanene, piun tania pisape “?Kiau erau, ko na sinoñan osape yepemãa imi wo sina, ne?”

⁷ Ana inanena nene pisatamãea, sape “Yar keviu, sineun pañisi ne, ana pogos naãa wii kulul, pe yar nakusnuen re vito ligam nu e wii poli. Ana pogos naãa in ga taaga nekila wowen ke yo nayalvitoen tano, yar taãena tai pitomi pito ães tano e wii sumon inu.”

⁸ Ana Yesu pis memes ga pan yar nene, sape “Pogaga, osuñalu, okus moñãa tog, oyali ovatove.” ⁹ Ana taveve visena kiena ne Yesu nene, yepe marmare la nene punu ga pimi po, naga suñal kus mãana tog mial pitove.

Ana e legiena na sur nene pimi kate, naga pe legiena wa tai kiena ne le Yu la, ¹⁰ kila sane pogos naãa yar keviu ãasia sa le Yu la apisu yar nene mial kus ke mãana tog, apis pan vanonia, akilawoia, asape “E, ãa nini na pe Legiena Wa ãa! Okus ke moñãa tog sanene na okilaro ke kieta navisaluaena ita le Yu la ne.”

¹¹ Ana pisatamãe la, sape “In na yepeu porowiaia, ana yar nene pimi kila ruru inu, pisa panu sape nekus mãau tog nevano.”

¹² Pisi na lala sinelan asape akilia laa sane wa, apiun tania, asape “?Ana a nene? ?Naga pe ane pisa pan ko sape okila sanene?”

¹³ Ana yar nene mninue ga visaena, vanon naga pe kilia re sape Yesu naãa kila ruru naga

poli, a tařatete visu kilalea vanon řina na yeririna la asike ea, ana Yesu mial řaroro likan yeririna lala, petan yo nene rui. ¹⁴ Ana siraunia pe piavi re poli, Yesu kirawal si yar nene e Yuniã Wa, ana pisa pania sape “Nanagane omloge po si narui, popon ovisuar ruru ko. Oligan punu ga kioã naviowaena lala, visae peraga yoko sur tai viowa sina ga imi van ko va re laa sane taulu na sumo.” ¹⁵ Ana e pogos nene yar nene kilia narui sape Yesu ga nařa kila ruru naga, ana pa pisawal pan yar keviu kiena le Yu lala.

¹⁶ Ana pogos nařa la amloge sape Yesu ke narui nařa tamalia, sinela karia, pe akekanan re nařa miyuãen sur nene e Legiena Wa, řisi na la asiar nařa apeveyunia. ¹⁷ Ana Yesu pisatãe la, sape “Kiau ata, naga miyuãen ke kiena yuãena wo lala e legiena make ga, pa tol ãena Legiena Wa, a in ãena monar neyuãe sa ãa nena nařa naga miyuãenia.”

¹⁸ Sanene na e pogos nene, nasumonena kiena le Yu lala apisu ke pa Yesu narui sane pe yar na warnena kareen nawaena na Legiena Wa. A nanagane metavana, amloge nařa naga pio ke Ntewa sape Arimana wawa, apisu sane naga kila ke naga maran taaga ga sane Ntewa. Ana sur ne la nene kila sane la apim pisuus manene laa sane, sinelan manene laa na wemomãaren naga mare.

Narina ne Ntewa amio Arimana amiyuãe maran taaga ga

¹⁹ Ana Yesu pisa pan la, sape “Nepisa pe lelaga pan amiu, in na narina ne Ntewa, tařatete nekila

sur tai inu ga taaga, ana sur ga la naña nepisu Arimau kila, naga ga nene nekilia nekila. ²⁰ In na narina ne Ata Ntewa, naga sinen sii inu pañisi, kila pian inu e sur punu ga naña naga sitom ke sape nekila. Ana yuññaena tañena si ãasia sike ga wa, naña kerkeviu laa sane, naña war van inu vena neyumaen sirau, ana pogos naña neyumaenia, yoko amiu sinemiu ulan vañisi ne. ²¹ Naga mña nanini, sa naña Ata mla si malena pan la naña amarmare, tañan si kiela malena pan la, ve sa mña nena nene inu narina nekilia nela malena van yar ai naña sineun nesape nela vania. ²² Ana pe Ata re ga kila naliñereena poli, ana yuññaena mña nene mligan e lumau, ²³ vena kilaen yeririna punu ga monar avatanon inu sa ga naña apatanon ke Ata. Ve sanene, visae yar naña pe patanon ruru re inu narina poli, ana sa naña naga pe patanon ruru re yerkawa naña naga mligan inu nepitom tano poli.”

Marena amio malena

²⁴ Ana Yesu pisa laa sanene, sape “Ayagogon ruru visena nene. Yar a naña logear kiau visena, a lelaga e naga naña mliganu nepitom tano, e ke e pogos nene tol malena. Naga pe su re nena vatanon naliñereena mñarera tai, sane petan ãelaga na marena rui, pa tol kiena malena viu rui.

²⁵ “A nepisa visena nalelaga nini pan amiu, sane pogos pimi ke sirau nanagane naña sane yar la naña amarmare e ãelaga naviowaena rui, aloge pulgou inu narina ne Ntewa, ana la naña aloge kilia, yoko atol malena. ²⁶ Kau Ata,

malena nalelaga teke ga e naga, ana naga tañan malena nene sike e inu, ²⁷ a tañan mēna sane inu Narina ne Yeririna, yoko nekila yuñāena lala na liṭereena.

²⁸ “Sur la nene pe pon re si sinemiu ulan poli, monar yoko ve sa ga nene e pog naṭa nepisa ke nesape pimi ke ne. Yoko la naṭa amomalio e porotano, aloge pulgou vio, ²⁹ ana amolmolue sina ga, ana la naṭa amiyuñae po, kiela nasuñalena si nene pe namalena, ana lala naṭa amiyuñae piowa, kiela nasuñalena pe naliṭereena.”

Sur la na iilaen visena kiena ne Yesu

³⁰ Ana Yesu pisa pa laa sane, pisa ṭarlologia ga pan yerkawa kiena ne le Yu la naṭa amon nalelagaena e naga, pisayu sur la naṭa kila meraravan sape naga pe lelaga. Pisa sape “E lepas naliṭereena naṭa neyuñāenia, yoko taṭatete neyuñāen e nasitomiena kiau in ga taaga, ana nekila ga e sur naṭa nemloge Ata pisa. Ve sanene, kiau naliṭereena naga memes ga, vanon pe nekila re e kiau nasinenanena poli, nekila ga e nasinenanena kiena ne naga naṭa mliganu nepimi. ³¹ Ana nepis sanene pan amiu, nekilia sane nepisayunu ke sina ga, pona amiu ṭas apisu sane pe pon re nevis ve sanene poli yo, taṭatete alelaga e visena na sanene. ³² Ana pogaga, pe sur re tai nene po, vanon sur taṭena la ṭasia naṭa kilia iila kiau visena suñal ruru wo.

“Nasumo, naga yar tai naþa pisayu sur la naþa punu pe lelaga paþisi. ³³ Nane Yoane Nakeena ne, naþa nanua sumo, amiu amligan visena pato pania, apiunu sanape petania, ana pisawal sur punu ga pe lelaga pan amiu. ³⁴ Ana piowa ga naþa asitom asape kiau visena suñal sanene vanon ga visena kiena yaru tai sa ga Yoane. Ana sineun nesape amiu asitom ruru li e visena la naþa Yoane pisa pan amiu e lepas na punu, vanon neþaryon amiu ke vena akilia atol natamaliaena. ³⁵ In na nepisa Yoane nene pan amiu, vanon naga sane pe kap tego tai na tegolien kiamiu sitomena lala, amiu naþa akekaran li ña naga.

³⁶ “Ana sur si tai naiilaen kiau visena, keviu laa taulu sur la naþa Yoane naga pisa. Naga kile la naþa Ata tañan panu nemiyumñaenia e maramiu. Yumñaena keviu la naþa nemiyumñaen, lala amiila ke visena nene keviu sane pe lelaga Ata ne nanene mliganu nepimi.

³⁷ “Ana metavan sur lua nene, taþena toña ga, nane kiau Ata naþa mliganu nepitom. Amiu pe amlogeli re pulgona poli, pe apisuli re marana po, ana naga mña, kiena visena la miila kiau visena la keviu, naþa pisawal inu. ³⁸ Ana amiu na akila sane visena nene pe lelana re e kiamiu malena poli, vanon amon lelagaen e naga naþa mliganu nepimi. ³⁹ Yam moki asumña apisuveve ke Visena Wa lala, vanon amiu asitom ke asape yoko alual kiamiu malena naþa ve uro re ea, ana visena wa la nene naþa pisawal inu ga. ⁴⁰ Asape

in na nepe purþes nen malena nene, ana amiu amon aimi atol malena nene e inu.”

⁴¹ Pisi na Yesu pisu sane þarila m̃arera paþisi, pis sanini, sape “Sur la naþa nekila ke ne, pe nekila re nesape amiu ayeluar kiau ki, peraga. Pe nesitoñal re nene poli, ⁴² ana sur viowa tai, nekilia ruru amiu pa rui, ana nekilia sane pe asitom manene re nena Ntewa poli. ⁴³ Pogos naþa nepim nakaten amiu, nepim e ki kiena ne kiau Ata, ana amiu pe akekaranu re poli. Ana visae pogos tai yar taþena imi, naþa imi ga e kiena ki naga taaga, pona amiu akekaranga naga yo. ⁴⁴ Sineu mie amiu paþisi, ana nepisu sane m̃arera pan amiu paþisi naþa atol nalelagaena nalelaga pogos tai. Nanene vanon amiu sinemiun lue ga nayeluaren kiamiu ki va metava. Amiu pe asitom re asape akilia avilopu si kiamiu þelaga poli, vena akila sur la naþa siraunia Ntewa kilia yeluar amiu vanonia.

⁴⁵ “Nepisa visena la nene pan amiu, pona amiu asitom ke asape ‘E, yar nene sinen kar ita, pona e legiena naliþereena naga visawal kieta naviowaena la van arimata Ntewa ma e peni!’ A peraga, ve in re naþa nekila sanene, ana yar taþena naga kila. Taþena nene nane yermarua Mosis, naþa amiu aþasine ke naga asape yoko visa visena na iila amiuena, ana nevisa ruru van amiu, naga ke narui naþa yoko visa plan ga kiamiu naviowaena lala. ⁴⁶ Amiu na apisa ke asape amlalaga ke m̃arera e visena kiena ne yermarua Mosis nene, ana visae ve sanene, vanon ya ne amiu pe amlalaga m̃ena re e in poli, vanon yermarua nene, naga siriyunu lue ke ga.

⁴⁷ Ana nanagane, nepisu sane amiu pe amlelaga re e kiena nasiriena la poli, ana komin suri ne nanene yoko tařatete mēna alelaga e kiau visena lala.”

6

Yesu pagan řina na yeririna miyuve manu lima [5000]

Matiu 14:13-21; Mak 6:32-44; Luk 9:10-17

¹ Siraun naga nene, memio Yesu memiai e wa tai memligan si kiena yo nene, mepa mokusro pupia lapa nařa nae Kalele, nařa la řasia apio asape Lapa Taepirias. ² Ana pogos nařa yeririna la apisu imimi mepa ke sanene e lepas navano, la mēna ga asuřalu asiraun imimi. Asape ataveve Yesu vanon apisu kile natamaliaena la nařa miyuřaen pan inanena lala. ³ Ana pogos nařa mepa metol lepas nene, mepa metava e kunus tai nařa mēke e yo nene, memial mē mepano-o, memapi. ⁴⁻⁵ Ana pogos nařa Yesu totano teke na kira pa gar tena, pisu pupia řina la apim ke puna. Pisuluřar sane la moki, ape yeririna na yo tařena ga la ne amlapran la ke apato Yerusalem. Apatovin ke pupia řařagena kiena le Yu lala, Pařagena na Sitořalen Natamaliaena, nařa yoko ve yam ve piavi re na akila.

Ana pogos nařa Yesu pisu la apimi, piun sur tai pa Pilip, pisape “Pilip, la nařa na viso kar la ke pařisi ne. ?Yoko toul kala kilaparavi ve sanape ne?” ⁶ Naviunena kiena ne Yesu, pe natařaliena ga Pilip, vanon Yesu kilia pa rui sur nařa yoko kila van yeririna lala nene.

⁷ Pisi na Pilip pisatamēa, pisa ga pisapenua “Visae neyumāe kas ve taaga, taṗatete netaulu kilavaru torokin naulen kala kinanena lala la punu ga akan ve torokaki!”

⁸ Ana nalogena taṗena tai, Antru, naṗa wenla Saemon Pita na ve tokak, pisa pa Yesu, pisape ⁹ “Suṗe, nekirawal teras tai teke e nini, ṗar ke narin kilaparavi lima amio narin ika lua. Nanene tekaki ga, vanon yeririna la mok paṗisi.”

¹⁰ Ana Yesu pisape “Peraga, poga ga ne, ovisa van ṗina la nene ovisave atotano wa.” Mepisa pan la, ṗisi na atotano e vilumīni lala, ana mepisu sane yermene ga lala tol sur sane manu lima [5000]. ¹¹ Pisi na Yesu ṗarar kilaparavi la lima nene, mlen, pisa potena vanonia. Siraunia siar kaweroroia, piovion pan la naṗa atotano ke ne, kila mēna sa ke ga e ika, mla make ga pan la torokin naṗa sinelan asape akania.

¹² Ana akan mā pano meṗela la kawa, ṗisi na Yesu pisa pa imimi, pisape “Korkoro kinanena la ne sike ne, ve tekila kare re, ana popon awarpolo va lele taaga.” ¹³ Ana mepa moṗar kinakina kilaparavi la lima naṗa ne, naṗa akanligania, mokon pa e karo pano-o tol karo lualima taaga pa lua [12].

¹⁴ Ana pog naṗa yeririna la apisuluṗar pupia kile naṗa Yesu miyumāenia, apisa ke pan la sanini, apisape “Kieta pupia navisawalena naṗa kieta li marua la apisaar asape imi kate e yomarava nini, yar ne na nene navisawalena ke narui.” ¹⁵ Ana la asitom ke asape ava atarar Yesu, asape amāreran vania vena avisirlua suṗal imi

ve kiela ãarin suẽ, ana pogos naãa mnunuluãar sur naãa la asitom ke asape ayumãenia, naga petan la, naga taaga mial pa laa sane metava e kunus la nene.

Yesu mial yau metava e sive

Matiu 14:22-27; Mak 6:45-52

¹⁶ Ana imimi nalogena la mepisu mrae pato ke tano narui, mepisu sane popon sa mowasuẽ imimi sina, ana mepato si tano e yepas nen lapa. ¹⁷ Mepato tano ana pe momã re Yesu katen imimi si poli, ana vanon yemalo pa rui, a mokus kiamimi waa, memligan si yo nene mepalua mepanon vena mokusro lapa meva ma Kapeneam. ¹⁸ Ana mepa ke sane, na narin lagi tai miyui li mãaga, kila sive siar piowa mãa paãisi. ¹⁹ Ana pogos naãa mepaluan pa laa tol sane kilometa lima, memilan Yesu mial ke metava e sive pimi ke lavisi. Ana memaraun naga paãisi, ²⁰ ana naga pis pan imimi, pisape “!Ee, amiu ve amarau re! In ga ne.”

²¹ Ana memloge po sina, metar pa meta e waa, ana veraga ga mepisu kiamimi wa monlologia ke lele naãa mesape meva ea.

Yeririna la apim akale Yesu

²² Ana kolulag, la naãa e lepas nen lapa, naãa Yesu pagan la ga na wa, asitomwele ke asape sanapen Yesu narui. Asitom ke sanene vanon pogos naãa memio Yesu mepim pula, mokus waa taaga ga, ana apisu imimi nalogena la mokus waa nene mepa pa rui, a Yesu pe amio imimi re poli, naga taaga sike na. A nanagane taãatete si alual naga amio la, ²³⁻²⁴ ana la apa akus waa

taþena lala, akusro apa Kapeneam akale imimi. Waa taþena la nene, la pe kiela re poli, kiena ne la nae Taepirias naþa apim akaten la, apim ga ura e naþa Yesu mlenwo kilaparavi, kila pimi torokin naþa akania.

Yesu pisape naga pe kilaparavi na malena

²⁵ Ana yeririna la naþa ne apam atol Kapeneam, apa ura, apa akale Yesu. Ana pogos naþa añaalia, apiun tania, apisape “?Navianena, ko opam otol e nini pogwai?”

²⁶ Ana Yesu kilia pa sur naþa la asape avisu vanonia, naga pisatañe la, pisape “Visae apamin akale inu sina vanon apisu kiau kile lala a apisuluþar inu sane in na ai, visae ve sanene na po na. Ana in na nepisu sane asitoñal asape nakoneva nepagan ruru amiu, akinana pano-o ñeþemi la kakawa po, ana amiu sinemiun si asape ve sa nene þane, yo?”

²⁷ “Poga ga, kiau visena na lelaga van amiu naga sanini: ve asitoñal manene re si kinanena naþa yoko ve ve piavi re na naga kona make sina. Popon ayuñae ñarera vanon kinanena naþa sulue ga, kilia suña ga sanene vano-o tol pog na malena naþa pe luas re poli. Lelaga, in na Narin Yeririna nekilia nela malena nene van amiu, vanon Ntewa arimau kilaar pan inu rui in ga taaga vena nekila ve sanene.”

²⁸ Ana apiun tania, apisape “Ana sa imimi sinemimin mesape mekila sur la naþa Ntewa sinenania, yoko monar meyuñae ve sanape?”

²⁹ Ana Yesu pisatañe pan la pisape “Pupia sur naþa Ntewa sinenan sape ayuñañe, sanini,

sape alelaga lelaga e in naña Ntewa miila inu nepim e yomarava nini.”

³⁰ Ana apiun ke sina ga, apisape “?A ko, kionña kile ya naña sa mevisuia, yoko mekilia melelaga e ko? Ko na yoko okila yuñnaena wo ya ne van imimi? ³¹ Mepiun ke sanene vanon mesitoñal kieta li marua la na susumo ne, naña asu e yokorena. Asumña sanena Mosis kila kile wo tai pan la, naña silaga la añar kilaparavi naña apio mana, ana akania, pe visokar la re nena ga. Sur nene teke e Tus Wa, a pisa sape

‘Silau ga naga pagan la e kilaparavi nae ma e peni!’ ” *Esik 16:4*

³² Ana Yesu pisatamñe la ke sina ga, pisapenua “Lelaga, sur nene teke e Tus Wa, ana kilaparavi naña Mosis mlavia, pe pe kilaparavi nae re ma e peni poli. Kilaparavi naña nae ma e peni nalelaga, arimau ga kilia lavia. ³³ Kilaparavi kiena ne Ntewa naga inu ga ne naña nemligan ma e peni nepitom tano, vena nela malena viu van yeririna na yomerava lala.”

³⁴ Ana apisatamñea, asape “Suñe, kilaparavi ke nene narui naña imimi sinemiminia silaga.”

³⁵ Ana Yesu pisa pan la, pisape “Inu, in na kilaparavi na malena. Yar a naña vim pun inu, tañatete si viso karia, yar ai naña lelaga e inu, tañatete si moto karia. ³⁶ Ana sur taaga ga na piowa, sa naña nepisa pa pan amiu rui, naña apisu inu amio kiau kile lala e kilamaramiu rui, ana amon lelagaen e inu. ³⁷ Ana monar yar pñasia alelaga e inu, vanon la punu ga naña Ata mligan sike e luñau, yoko monar aim pun inu, a la

punu ga naña aim pun inu, ve lala yar re si tai naña nekilia nekuan lua sina, yoko nowarar ruru punu ga ave kiau.

³⁸ “In na nemligan ma e peni nepitom tano e yomerava nini, pe nakilaen re nasinenanena kiau poli, ana pe nakilaen nasinenanena kiena ne naga naña mligan inu nepitom tano. ³⁹ A pupia kiena nasinenanena sanini, sape la naña naga mligan la asike e lumãau, yoko ve nekilalu re lala yar tai, naga sinenan pisape e legiena maro nevisir plan la punu sina ga. ⁴⁰ Ata sinenan manene laa pisape ve sanene narui, naña la punu ga naña avisu inu, ana alelaga e inu, yoko atol malena naña pe luas re poli, a sinenan manene mēna pisape e legiena maro, yoko in na nevisir plan la sina ga.”

Nasumonena kie le Yu lala pe akekaran re visena kiena ne Yesu la poli

⁴¹ Ana pogos naña yerkawa kiena ne le Yu lala amiyagogan ke visena kiena ne Yesu, pe akekaran re nenaga, ana la apis lili mña vanonia. Kiena visen tai naña amon logeena, nane visena naña pisawalia sape naga pe kilaparavi naña petan ma e peni pitomi tano e yomarava nini. ⁴² Apisayu pan la, apisape “?Sanape ne yar nene pisa ke pan ita pisape petan ma e peni metava pitomi tano pun ita? Naga pe yar re tai nene po, tekilia ruru pa naga rui, anena amio arimana. Naga Yesu ga ãa, narina yermarua Yosop.”

⁴³ Ana Yesu pisatamē la, pisape “!Ei, visen mumu la e inu ãisi, amiu ayagoga ruru kone wa! ⁴⁴ Yar ai naña imi lelaga e inu nagane,

e legiena maro nevisirlua naga mal sina ga. A ata naña tamñan inu nepimi, visae naga ve ure re yaru nene vim, ana tařatete nena kilia imi punu. ⁴⁵ Tus kiena ne navisawalena Aisea pisawal visena tai, pisape

'Lala punu ga, yoko Ntewa ga vian la,' Ais 54:13 ana komin nanene, nepisape la naña aloge ruru visena kiena Ata Ntewa naña naga vian ruru la ea, lala nene aim pun inu. ⁴⁶ Ana la ne sanene, pe lala yar re tai naña pisu ke Ata Ntewa poli, vanon yar taaga pisu ke naga, nane inu naña nepetan ma puna nepitom.

⁴⁷ "Nepisa ke lelaga pan amiu, sane yeririna punu ga naña alelaga e inu, asike pa loyuña e malena naña ve uro re rui, ⁴⁸ vanon inu, in na kilaparavi na malena. ⁴⁹ Kilaparavi nene pe maran taaga re poli sa naña kilaparavi naña mana naña yermarua la akan e yokorena. Akan ña pano-o, ana siraunia pe lala yar tai mal lue re si teke poli, lala punu ga amarmare ga sa nene. ⁵⁰ Ana visae kilaparavi tai toña ga, visae yar naña kania tařatete mare pogos tai, na nene tepio tesape kilaparavi nae peni lelaga. ⁵¹ Pogaga, in ke narui nepe kilaparavi na malena nene, naña petan ma e peni pitomi tano e yomarava nini, vena yar naña kania, yoko mal lue. Kilaparavi ne nanene naga pe tasneu, netamñan ke panon yomarava wetelu, nemla ke panon malena kiena ne kiena yeririna lala."

⁵² Ana visena kiena ne Yesu la nene, ñarera pan yerkawa kiena ne le Yu la nene akilia ruruia, ana apiun ke asape "?Ya nene? Yar nene pisape

yoko war kana kilamñiu van ita vena tekania, po pisa ke ya ne?”

⁵³ Ana Yesu pisa meraravan pan la e lepas na kinas nen kiena marena, pisape “Nepisa lelaga pan amiu, sane amiu monar akan kiau kilamñiu inu Narina Yeririna, amiu monar amun kau kuruta. Visae peraga, kiau malena tařatete te amiu. ⁵⁴ A naga nařa kan kau kilamñiu, a mun kau kuruta, naga tol pa malena nařa pe luas re poli, ana nevisirlua si naga suñalu e legiena maro, nekila naga mal sina ga. ⁵⁵ Nanene komin kau kilamñiu, naga pe kinanena tařena tai, a kau kuruta, naga pe na munena tařena tai. ⁵⁶ Naga nařa kan kau kilamñiu, mun kau kuruta, kiena malena wetelu sike e inu, a kiau malena wetelu sike e naga. ⁵⁷ Ata naga pe purřes nen malena, ana mligan inu nepimi, a nemalin ke kiena malena nařa teke e inu, ana naga nařa kan kau kilamñiu yoko naga mali e kiau malena nařa teke e naga. ⁵⁸ Sur ne nanene nařa nepisa ke e kiau visena e lepas na kilaparavi nařa petan ma e peni pitomi tano. Kilaparavi nene naga pe sa re kilaparavi nařa repita nasumo la akan poli, ana amare ga sanene. Naga pe kilaparavi nařa yar a nařa visae kania, naga kilia mal lue narui.”

⁵⁹ Visena ne la nene Yesu pian lan ke e yuñã na lotena nae Kapeneam.

Nalogenã la moki amligan Yesu ařasuře la sina

⁶⁰ Ana komin nařa Yesu pisa visena la nene, ana imimi kiena nalogenã la moki asitom pano-

o, apisa asape “Kiena navianena la nene m̃arera pañisi. ?A si na kilia loge kilale ruruia?”

⁶¹ Ana Yesu mloge kilale e naga sane kiena nalogena lañas apis lili m̃a vanon naga sa nene, naga piun tan la, pisape “?Sanape, pe akekaran re kiau narin visena nene poli? ⁶² Narin visena ga nene, kila amiu asape aliganu sina? Visae ve sanene, nemninue amiu narui. Sane visae pogos tai, inu Narin Yeririna neligan amiu neva si metava ma e leleu, ana yoko sanape ne? Pona sinemiu p̃esan ruru inu yo? ⁶³ Kiau visena la nene ape mrapa na Ninuna a mrapa na malena. Yaru kilia war si yaru, ana yaru tañatete la malena lelaga nene va yaru tañena. Sur nene Ninuna ne Ntewa ga kilia lavia. ⁶⁴ Ana nevisu kilale amiu lañasia amlelaga pa rui, a amiu p̃as peraga.”

Yesu pisa naga nene, vanon siar nanua rui, naga kilia pa la naña pe amlelaga re e naga po, pano-o tol naña naga kilia lala ai naña awilwilin wan naga. ⁶⁵ Ana Yesu pisa m̃ena ga pan la, pisape “Lala p̃asia alelaga, p̃as ve alelaga re, naga nene nepisa ruru visena nene rui, nesape tañatete yar tai vim punu, naña sa arimau naga ve tam̃an re naga imi.”

⁶⁶ Ana e pogos nene imimi kiena nalogena lañas apisu sane navianena kiena Yesu la nene am̃arera laa narui, apisu sane peraga, ana añasuñe la sina, pe ataveve re si naga poli.

Pita pisalua m̃areran kiela na lelagaena pa Yesu

⁶⁷ Ana pogos naña Yesu pisu lala ãas amligan si naga, pis pan imimi kiena nalogena lualima taaga pa lua [12], piun pisape “?A sanapen amiu? ?Pona sinemiun asape amiu mña avava sina ga amio la nene?”

⁶⁸ Ana Saemon Pita pisatamea, pisaar mñarera pa Yesu, pisape “Suñe, visae meligan ko, yoko mesiraun si a ne? Ko ga taaga naña lologena wo na malena teke e ko, ⁶⁹ nanagane na memlelaga ke ga e ko ga taaga, a mekilia pa rui mesape ko, ko na Navisaarena Wa naña Ntewa mligan ko opimi vena otamalia imimi.”

⁷⁰ Ana Yesu pisatame pisape “Lelaga, in na nekiar amiu kiau lualima taaga pa lua, vena alelelaga e inu sanene, a tai teke mña likan amiu naga pe Yermare Lego ruru nenaga.”

⁷¹ Ana Yesu pe pisawal re kiamimi kia lala tai e pogos nene poli, ana siraunia mepisu kilale sane kiena visena nene, naga pisa ke Sutas, narina ne yermarua Saemon nae Kariot, naña naga imimi na lua lima taaga pa lua tai, naña pe sitom re poli, ãililinwan si kiena Suñe naapo.

7

Yesu, wenla lala pe amlapran la ruru re amio naga poli

¹ Siraun naga nene, Yesu mial telilivi ke ga e yo lala na tavie na kiena yo nene Kalele. Naga pe pa re si metava e yo na tavie nae Yutea poli, vanon nasumonena sa le Yu la nae yo nene akale ke naga rui, asape awe moñar naga mare. ² Ana

pogos tai, lavisin pog na kiela pupia p̃aṗagena kiena le Yu la tai, naṗa P̃aṗagena na Silparpara. Ana sa naṗa silaga, la moki sinelan asape avavini ma Yerusalem vanonia. ³ Ana e pogos nene, wenla Yesu lala apis pania, apisape “E, ko na ose nini yam piavi rui, popon ova li ma Yutea, vena kioṃa nalogena la ma ne la towe avisu kile la naṗa okila ke ne. ⁴ Ko na sinoṃan osape yeririna la akilia ruru ko, ana omiyuṃae tapolou ke ga. Visae lelaga naṗa omiyuṃaen ke pupia kile lala, popon ovanon okate yo punu ga e yomerava.” ⁵ Ana visena la ne sanene, sa naṗa apisa kare ke ga Yesu, vanon lala na ape wenla ruru naapo, ana pe amlelaga re e naga poli.

⁶ Ana Yesu pisataṃe la, pisape “Amiu akilia akila ga kiamiu sur ya e ga e pog naṗa amiu sinemiun asape ayuṃaenia, ana kiau pupia pogos naga pe pimi re poli wa. ⁷ Amiu akilia akila ga kiamiu yuṃaena la woga ga, yeririna la taṗatete avisa kare amiu vanonia, ana pogos naṗa in na nekila kiau yuṃaena, nepisawal sane p̃elaga viowa kiena la na yomarava pe memes re poli, ana la sinela kar inu paṗisi. ⁸ Ve sanene na amiu ga ava ma Yerusalem, in na nesuṃa e nini wa. In na taṗatete neva nakaten maran yar lala e p̃aṗagena nene, vanon kiau pog pimi ke rui, ana pe pimi punu re poli wa.” ⁹ Naga pisa visena nene pan la, siraunia apavin, naga suṃa ga.

Siraunia Yesu pa ma e p̃aṗagena

¹⁰ Yesu suṃa sane na, pe piavi re poli, naga ṃena pa ma Yerusalem, ana pe pa re sa naṗa

yeririna la akilia poli, naga tapoloun la ga. ¹¹ Ana yerkawa kiena le Yu lala, asitom ke pa rui sape pona naga m̃ena ga vam e p̃aṣagena, ana la akalewele, apiun asape naga m̃eke pe. ¹² Ana yeririna m̃ena lala, asun apisayu lue ga naga, laṣasia asape naga pe yar wo tai, laṣasia asape naga pe yaru viowa ga, naṣa kila kare ke ga sitomen kien yeririna lala. ¹³ Asun apisayu ke Yesu sanene na, pe apisawal manene re pa e yo metava poli, vanon asitom ke asape visae kiela yar keviu la aloge, yoko akila viowa van la.

Yesu pa kate e Yum̃a Wa Mana ne Ntewa

¹⁴ Ana akila m̃a p̃aṣagena pano-o, legiena p̃as p̃aro rui, ana Yesu p̃isu sane monar va ma Yum̃a Wa Mana ne Ntewa vian si yeririna lala. ¹⁵ Ana pogos naṣa yerkawa kiena le Yu la amloge kiena navianena nowo lala, amilan paṣisi, apisape “!Sanape na yar nene kilia ruru visena kiena ne Ntewa sanene? !Naga pe apian re nena ga, ana kiena navianena po na po!”

¹⁶ Ana sanene na Yesu pisawal pan la, pisape “Sur naṣa nepian lan ke ne, pe kiau re poli, pe kiena ne Ata ga naṣa m̃ligan inu nepitom tano e yomarava nini. ¹⁷ Visae yar tai kekarana ga kila nasinenanena kiena ne Ata, yoko naga kila yar nene loge kilia sitom ruru kiau navianena. Yoko yaru nene kilia visu kilale sane in na pe nepian re yeririna la e ga e kiau kia poli, ana kilia visu kilale sane navianena la nene, pe lelaga naṣa amolue kemua e Ntewa. ¹⁸ Visae tevisu yar tai vis ke ga e kiena kia, tekilia ga sane naga miyeluar ga kiena kia. Ana visae yar naṣa pis, miyeluar

ke ga kia kiena ne kiena yerkawa naña mligan naga pimi, tekilia ga sane pe lelaga ga, naga pe pisokan re poli.

¹⁹ “Yar tai ne kila sanene nane Mosis. Ntewa mla kiena navisaluaena pania, a naga pisaliluen pimi pan amiu, ana asuña akilaro ke pa narui. Ana sanape na asape awem̃ar inu vanon asape nekilaro navisaluaena. ?Pogaga na sanene?”

²⁰ Ana yeririna la apisatañea, apisape “!Kue-e, nagane na opis wowe ke ga, sa ga yermare tai teke e ko! ?Ane sape weñar ko? Ovisawal lia.”

²¹ Ana Yesu pisatañea, pisape “Nanua e pogos naña nepim e yo nini, in na nekila pupia kile tai e maramiu, netamalia laulu nene. Ana pogos naña apisuia, pe akekaran re poli, apisape in na nemiyuñae piowa ga naña nekila sanene e Legiena Wa. ²² Ana popon asitom̃ali kieta ðelaga na kilaen ðaviu, sa naña yermarua Mosis amio yermarua na sumo tañena lala, sane Epraam lala, la amla pan ita. Naga m̃ena pe yuñae tanea, ana visae kana legiena nena sulologia Legiena Wa, pe asitom̃al re poli, amiyuñae ga.

²³ Amiu asuña apisa ke asape amon kilaroen navisaluaena kiena ne Mosis, ana atañan luen ga asape nakilaen yuñae na ðaviu e Legiena Wa pogaga. Ana visae atañan nene, vanon ya ne sinemiu karnu keviu vanon ga kiau narin yuñae wo taaga ga nene naña nekila ruru si yepen yaru nene e Legiena Wa? ²⁴ Nepisu sane asitom veve ke sur la ne e ga e kulusia, ana popon ave manmarua li laa sane, asitom veve ruru li sur la va tol kana kilam̃iu.”

Asitom ke asape Yesu pe Navisaarena po pe naga re poli

²⁵ Ana e pogos nene yeririna moki nae Yerusalem apisu Yesu pian la ke e Yumña Wa, amilania, apisape “!Lelaga naña ne! Yar ga nene nañane, naña yerkawa la apisa ke asape awemñaria. ²⁶ Ana nagane pisawal ke ga kiena visena la sanene, ana pe akila re si surian poli. Pe tekilia re poli, pona amon visaen vania vanon apisuluñaria sane lelaga, yaru nene, kieta Navisaarena lelaga. ²⁷ Ana peraga, tañatete naga, vanon kieta nalelagaena tai ña rui, sape Navisaarena, pogos naña naga kate, yoko tañatete yar kilia sape naga su pe na pimi ne. Ana yaru naña Yesu, ita punu ga tekilia ruru pa ñana uña rui.” Apisa sanene komin amape Yesu na paeme Nasaret, ana peraga, naga paeme Petleem.

²⁸ Ana vanon naña apisa ke sanene, Yesu ñaryon ga navian laena loyumña e Yumña Wa, pisawal visena nene pan la, pisape “Asitom asape akilia inu, akilia ke lele naña nepim ea, ana in na nepisu sane pe akilia ruru re poli. Nepimi e nini, pe e re ga e kiau sitomena poli, ana yar tañena ga mligan inu nepimi, naña naga pe purñen nen lelagaena. A sa naña aminue inu ga, ana aminue ñena naga. ²⁹ A naga, in ke narui naña nekilia ruru nena naga, vanon naga ke narui naña mligan lua inu nepitom tano e yomarava nini.”

³⁰ Ana visena kiena ne Yesu la ne sanene kila amñareran asape monar atarar naga, ana pe yaru re nena tai naña kilia tol naga, vanon kana pog

ne pe pimi re poli wa. ³¹ Asape awe mom̃ar naga, ana yaru la moki amlelaga e naga rui, vanon kile la naṽa miyuṽaenia. Apisa sanini, asape “! Yoko Navisaarena nape naṽa kilia imi kila si kile ya la naṽa yuve naga? Peraga, yar nene kieta Navisaarena ke lelaga narui.”

Amligan yar na mara la apavinin Yesu

³² Ana Varasi la ṽasia asum̃a amiyagogon ke yeririna la amiilaar ke Yesu e kiela visena lala, ana apa iroro ga, apis pa pupia yar wa lala, na apiranar asape monar akila ga sur tai va Yesu nagane ga ne. Ana amligan kiela lokul navisuaren Yum̃a Wa lala, asape ava akale pulmas tai na tararen Yesu, vena aure si naga vim pula.

³³ Ana Yesu pisawalia, pisape “Yoko in na nekilia nesu si nemio amiu yam ve plas ga, ṽisi na nowasuṽe sina puna ne naga naṽa mligan inu nepimi. ³⁴ Pogos naṽa sa nowasuṽe pae na, amiu akilali naṽa akale inu vano-o yoko taṽatete alual inu. Lele naṽa neva nese ea, taṽatete aim ea.”

³⁵ Ana pogos naṽa yerkawa kiena ne le Yu la amloge visena nene, asitom ṽele narui, apisa ke pan la, apisape “?Yar nene pisa ke yo nape ne, naṽa yoko va ea a ṽisi na taṽatete ita telual si naga ea? Pona sitom ke pisape va e yo taṽena lala e yomarava naṽa wenla ita le Yu lala aṽure apa ea e pog na pupia yaltetaena, ana pisape va vian la m̃ena ga? ³⁶ Ana naga pisa ke ya nene, sape takale naga vano-o taṽatete telual naga. Ana sanapen kiena visena naṽa pisape naga pa

ke lepas tai naña tařtatete tesiraun naga, tařtatete teva ea.”

Ana e pogos nene, lokul na visuaren Yumña Wa la pe atarar re Yesu poli wa.

Yesu mlologon Ninuna Wa, sape pe wii namalena

³⁷ Ana akila mña řpařagena nene pano-o, apa atol kana legiena maro, naña sane pe kana pupia legiena nena. Ana pogos naña asike veraga, Yesu suñal pion manene sanini, pisawal pisape “Amiu a naña moto karia, popon imi pun inu, mun wii na malena. ³⁸ Yar naña mlelaga e inu, yoko wo van vařisi, sa naña Nasiriena Wa pisa, pisape

!Yar na sanene, yoko losinena ule mamagan wii na malena, vano vano-o tataroi vetania sa naña wii mlau!”

³⁹ Ana visena kiena Yesu nene, kana kinasia na Ninuna Wa, vanon naga kilia sape siraunia, lala naña alelaga e naga, yoko atol Ninuna Wa. A e pogos nene, Ninuna Wa pe pimi re poli wa, vanon Yesu sike yomarava wa, pe pa totano re e kiena lele wa poli wa.

Parin sitomena la e Yesu

⁴⁰ Ana pogos naña yeririna la amloge Yesu pion sane na, kiela sitomena la pa pe tařena lala. La řasia, apisa asape “Yar nene, naga navisawaliena sane Mosis, naña temlelaga tesape yoko imi.” ⁴¹ La řasia apisa asape “Ana, pona visae peraga, naga pe kieta Navisaarena kemua.” Ana la řas apisatamea, apisape “Peraga, pe visena re tai naña pisa sanene sape Navisaarena

yoko ve yeririna nae Kalele sane yar nene poli.
⁴² Nanene komin naña kieta Nasiriena Wa la apisa ke ga asape Navisaarena naga molue ga e lus kiena ne Parin Supe Tepet, yoko ve yeririna nae Petleem.” ⁴³ Ana ãarin sitomena moki la ne sanene kila narui yeririna la asu tetai vanon Yesu. ⁴⁴ La ãas pe akekaran re poli, apisu sane popon akuan va e yuña nakoarena, ana siraunia peraga, pe yar tai pa re lavis puna poli, vena tararia.

Nasumonena la sinela kar manene Yesu

⁴⁵ Ana siraun sur la nene, lala na visuaren Yuña Wa apa sina ga puna ne ãarin yar wa amio Varasi lala, vena kilaen navisawalena lala van la. Ana pogos naña amñalivi e marala, yar keviu la nene pe apisu re Yesu poli, ana apis pan la, apisape “?Awa yar naña memligan amiu apanonia? ?Vanon ya ne amiu pe aþure re naga pimi poli?”

⁴⁶ Ana navisuarena la apisatameia, apisape “Imimi memiagogon kiena visena lala po na po, pe yar re si tai poli naña kilia vian ruru ita wo sane naga.”

⁴⁷ Ana navisatameena nene kila Varasi la amilania, apisape “!Aulai, nagane na amiu mēna, yar nene ãere kiamiu sitomena la pa pe wowe!

⁴⁸ Amiu atamñan naga pisa kotalia amiu, ana sanape, apisu sane e imimi yar kerkeviu lala pona imimi Varasi lala, la ãas amlelaga ea? Peraga yo. ⁴⁹ Lala ga naña amlelaga ea, nane ãina viowa ga la naña asike ko laa ne, a la pe akilia re sur poli. Pe akilia re kieta navisaluaena poli, Ntewa piain pa nakoarena pan la rui.”

⁵⁰ Asumña apis m̃arera ke sane na, lala yar tai kilayon ke sape kila kiela visena vito si tano. Nane Nikotimas, naña nanua sumo e yemalo tai pa sun amio Yesu. ⁵¹ Naga pisa pan la, pisape, “Ita tepisayu ke yar na sanene na, sa ga naña ita temla ke pa nalip̃ereena pania. Ana kieta navisaluaena pisa lepas nene, pisa sape visae tesape tevis van yar tai, monar tetotano ruru temio e kumali, tela pog vania vena naga kilia visawal kiena sitomena van ita, ana monar teviun naviunena vania vena tekilia tekirawal tesape lelaga kemua naga kila sanene sanene po sanape. Naga nene pe mrapa mesmes nakilaen yum̃aena nene.”

⁵² Ana la pe sinelan re yagogonen kiena visena nene po, vanon apisu sane naga miilaar ke Yesu. Apis pania, apisape “!Aulai, ko na opis ke sa naña ko m̃ena ope yar nae si Kalele tai! Asitomrurulia sur naña Visena Wa pisa. Pe visena re nena tai naña pisa sape yoko navisawalena viu tai sum̃alu garo Kalele vam e nini.”

⁵³ Ana kiela visena pa m̃arera e lele nene, p̃is na la amial tetai sina ga ãpasũpe si m̃ala um̃a lala.

8

Sira naña apisape akirawal taña kolau

¹ Ana Yesu mligan Yum̃a Wa, mial pa si ma Kunus Na Purolip Lala. ² Monomi e nene, ana yemlagi kolulag mial pato si Yum̃a Wa Mana ne Ntewa. Pogos naña yeririna la apisua, la moki apim puna, naga totano pian la.

³ Ana pe piavi re nena ga, navianena navisaluaena lala amio Varasi lala aþure sira tai pimi puna, akila suñal e marana ne yeririna lala. Sira nene, atarar ke sanene vanon asape kila kolau, ana laþas apisuia, apisawalia. ⁴ Ana akila naga suñal sanene, apis pa Yesu, asape “Navianena, sira nene, akirawal kila ke kolau. ⁵ Ana sa naþa navisaluaena kiena ne Mosis pisa e lepas na mlamulena viowa nene, nanagane na monar mokove moñar ga naga mare. Ana navisaluaena kiena ne le Rom lala naga sape yoko taþatete mokoveñar yaru. A ko na sanape, kioña sitomena sanape?”

⁶ Ana naviunena nene, pe apiun ruru re pa Yesu poli, ana akila ke ga nataþaliena pania, vena visapal sur tai naþa siraunia akilia ala naliþereena vanonia.

Ana Yesu pe pisatame re poli, þarina tau pito tano, kian mrasilmana siri visena tai e porotano.

⁷ Ana apiuyun ke pania asape sanapen sira nene, ana Yesu toñal ruru sina, pis pan la narui. Pisa pan la, pisape “Pogaga, ana amiu yar naþa kove þes sira nene, naga monar ve yaru tai naþa pe naviowaena tai to re nena e naga.” ⁸ Ana yam si tai, pulu si pato tano, siri si visena taþena e porotano.

⁹ Ana pogos naþa amloge sur naþa Yesu pisa pan la, asiar naþa amiyal tetai si lala. Naga naþa sumon la, kiela yermarua tai, a siraun naga, lala taþena mñena lala apiayapa apavano, pano-o sira naþani naga taaga suñal sike e marana Yesu.

¹⁰ Ana Yesu kira pa pisuia piun tania, sape “?”

Sira, la naþa asike pe nagane? ?Pe lala yar re si tai sape liþere ko poli?”

¹¹ Ana sira pisataþnea, pisape “Suþe, pe tai re si poli.”

Yesu pisa pania, sape “Pogaga, in mþena taþatete neliþere ko. Ko, okilia owasuþe ko sina ova momþa, ana ovavini ve okila re si naviowaena.”

Yesu pisape naga pe yomerarava na yomarava

¹² Ana siraunia Yesu pisi pan la, pisape “In na nepe yomerarava na yomarava, yar a naþa taveve inu taþatete si yal e yemalolo, yoko yomerarava namalena teke e naga.”

¹³ Ana þisi na le Varasi la þasia naþa asike wa apilon si kiena visena, apisape “Ko na opisa sanene, ko ga omiila ke si kiomþa visena, ko na oþarwar ko wa! Sanene na, imimi taþatete melelaga ne, kiomþa visena pe pe lelaga re poli.”

¹⁴ Ana Yesu pisataþnea, pisape “Pona nekila sanene yo, ana kiau visena la punu ga amio kiau vianena la ape lelaga. In na nekilia sur punu ga e inu, sane nesu pe na nepim e nini, po nesike e nini þisi na nowasuþe si neva pe, ana amiu pe akilia in re nena poli. ¹⁵ Amiu amliþere in ke ga e sitomena kiena ga yeririna lala, ana in na pe nemliþere re ga amiu yar ta poli. ¹⁶ Ana visae pogos tai neliþere yeririna lala, yoko kiau naliþereena mesmes ga, vanon ve in ga taaga re nekila, nemio naga naþa mligan inu nepimi.

¹⁷ “Ana e kiamiu navisaluaena, asiri sanini asape visae yar la ve lua aviranarla e visena tai,

ĩisi na monar alelaga ea, ¹⁸ ana yoko monar ve sa mēna nene e imimi lua kau ata. In na nepisa ke nesape in na nepe lelaga, a naga miilaar inu, ana kila sane monar alelaga e inu narui.”

¹⁹ Lala amloge visena nene, apiun tania, asape, “?Ko na opisa ke arimomā nene, ana sike pe nagane?”

Yesu pisatañe la, pisape, “Amiu amninue ga naga, sa naña amiu amninue inu ga. Visae amiu akilia ruru inu, yoko kila amiu akilia ruru mēna naga, ana tañatete si aviun naviunena na sanene, ana peraga.”

²⁰ Visena la nene, Yesu pian la ke e Yurña Wa, e lepas naña akuan ruru nalaena lala kiena ne Ntewa sike ea.

²¹ Ana Yesu pisa mēna pan la, pisape “In na nepur matan amiu ke narui. Pogos naña neva pae na, akalenu vano-o tañatete awal inu, yoko amare amio kiamiu naviowaena lala. In na nepa ke e lele tai naña amiu tañatete avam ea.”

²² Ana pogos naña yerkaewa kiena ne le Yu la amloge visena nene, apiunia asape “?Yar nene sinenan pisape kila ya? Pisape va e lele tai naña ita tañatete teva ea, pisa ke sape yoko we momar naga mare yo?”

²³ Ana Yesu pisape “Kiamiu sitomen lala amio kiau naga peve tañena manene laa. Amiu na ape nae ga yo tano nini, inu na nepe nae yo na ma metava. Amiu na yomarava nini, in na pe nae re e poli. ²⁴ Ana sa ga naña nepisa ga na wa, yoko amare ga amio kiamiu naviowaena lala. Visae pe amlelaga re e in poli, naña nepe naga naña sike na sike lue narui, yoko monar ve sa ga nene.”

²⁵ Ana apiun, asape “Ko ovisa li sina osape ko na ai.”

Ana Yesu pisatañe la, pisape “In na nepe naga ga naña siar na konua rui pimi tol nagane, nepisa ke nesape in na nepe naga. ²⁶ Naga ga nene nepisa ke e lepas na punu. Ana e lepas na pun amiu, sur la moki naña nekilia nevisa, ana visae nevisa, pe visen nalipereena ga punu ga. Ana sur la ne nepisa ke ne e yomarava nini, naga pe visena ga la naña nemloge tan naga naña mligan inu, vanon silaga, kiena visena la mesmes pañisi.”

²⁷ Yesu pis merarava ga sanene, pisayu ke arimana naña ma e peni pan la, ana pe akilia ruru re nena poli.

²⁸ Ana pis si pan la, pisape “Pogos naña yoko amiu atelan pae inu Narina Yeririna metava e laki, yoko akilia ga na wa sa naña in na nepe kiamiu Navisaarena. Yoko amiu avisu kilale naña sur punu ga naña nemiyumaenia, pe nekila re ga in ga taaga poli, silaga nepisa ga sur la naña Ata pisa pian inunia. ²⁹ Naga ke narui naña mligan inu nepimi, a naga sike amio inu nagane. Naga pe mliganu li re poli, vanon silaga nekila ke sur punu ga sa ga naña naga kekarania.” ³⁰ Yesu pis ke sanene, kiena visena la p̄ere le Yu la moki amlelaga e naga.

Visena lelaga kila sen lala na mlamulena alolor sina ga

³¹ Ana Yesu pis pan le Yu la naña amlelaga mare ga e naga na wa, pisape “Visae awarar kiau visena m̄arera, amiu alogearia, amiu ave kiau

nalogena la lelaga. ³² Yoko akilia ruru visena lelaga, ana visena lelaga kilia kila sen loru si vetan amiu.”

³³ Apisatam̃ea, apisape “Ee, imimi na lus kiena yermarua Epraam, imimi pe memiyum̃ae koren kiena ne re yar keviu taḡena tai poli. ?Ana sanape ne osape sen lala alolor vetan imimi?”

³⁴ Yesu pisatam̃e la, sape “Nepisa lelaga pan amiu, yeririna punu ga naḡa asuḡa akila ke naviowaena, la ape nayum̃ae korenaena na naviowaena, sen la na viowaena apiar m̃areran la. ³⁵ Ana asuḡa amiyum̃ae korena ga kiena ne yar keviu na naviowaena, ana pe ape namratava re puna poli. A inu, in na nesulue ga nemio Ata, komin in na namratava nena puna. ³⁶ Ana in na sisi nae ma e peni, visae noul plan amiu, yoko amiu m̃ena akilia asulue amio inu ma um̃a.”

Yesu pisape la pe ape narina ne re yermarua Epraam poli, ape narina ne Yermare

³⁷ Ana Yesu pisa ke sina ga pan yeririna lala, pisape “Nekilia ruru amiu na, ape lus nena kiena ne yermarua Epraam, ana lus kiena ne Epraam la narui naḡa popon sa akekaranu. Ana peraga, amiu laḡasia na lus ga nene naḡa kiau visena pe towawa ruru re e kiamiu malena la poli, sinemiun manene asape awe moḡar inu. ³⁸ Ana popon amiu alelaga e kiau visena lala, vanon in na nepisawal ke ga sur la naḡa nepisuiua pogos naḡa nesike puna ne Ata, ana amiu na akila ke ga naḡa amloge arimamiu pisa.”

³⁹ Ana apisatameia, asape “Lelaga, vanon arimamimi, yermarua apua Epraam na sumo sumo laa.”

Ana Yesu pisa pan la, sape “Peraga yo! Visae amiu ape narina ne yermarua Epraam lelaga, popon amiu towe lai akilali sur wo la ve sa naña naga miyumaenia. ⁴⁰ Ana pere, amiu akila piowa manene laa pañisi. Sane inu, in na nepe yar tai naña nepisa plan ke ga visena na lelaga la naña Ntewa pisa pan inu, ana amiu asape awem̃ar inu. ?Pona amiu asitom ke asape ðelaga wo ke narui naña kiamiu yermarua Epraam sape akila? ⁴¹ Peraga, nepisu sane pe naga re nene po, ana arimamiu tañena ga tai sike ga wa, naña amiyum̃ae kiena ke.”

Ana la apisape “!Ke ya ne! !Osape okila imimi meve sisi na mrapa lala, memninue ga arimamimi! Armamimi taaga ga nalelaga naña sike, nane Ntewa.”

⁴² Ana Yesu pisape “Visae visena nene lelaga, sape Ntewa pe arimamiu, yoko amiu monar akekaran manene inu, vanon in na nepetan ma puna nepitom tano e nini. In na nepim re ga sanene poli, naga ke narui mliganu nepimi. ⁴³ In na nepisasa ke sur la nene pan amiu pano-o, ana silaga amiu pe amloge kilale re nena ga. Memninue amiu ga, vanon ya ne yepemiu mavin logekilaleen kiau visen sanene? ⁴⁴ Amiu na arimamiu na Yermare, ana amiu sinemiun ga asape akila sa naña naga sinenania. Siar nanua sumo e nasiarena pimi, naga pe yaru na wemoñaren yaru, pe sinenan re visena nalelaga poli, pe suñal re nena e lepas nene poli. Kiena

ĵelaga mesmes, pis lue ga e pupia visokanena lala, vanon naga pe purĵes nen navisokanena punu ga, pe ariman navisokanena. ⁴⁵ Naga sanene, ana pogos naĵa in na nepimi, nepisawal visena na lelaga wo pan amiu, ana siraunia amiu amon lelagaen si e inu. ⁴⁶ ?Ana amiu ane kilia visalua kiau naviowaena tai? ?Ana visae amiu apisu nepis pe lelaga, vanon ya ne amon lelagaen e inu?

⁴⁷ “Yar naĵa kiena ne Ntewa, naga sumĵa miyagogon ruru visena kiena ne Ntewa. Ana amiu la naĵa pe sinemiun re aloge kiena visena la poli, nekilia sane nanene vanon pe ape kiena re nena ga.”

Yesu amio Epraam

⁴⁸ Ana visena mĵarera la nene kiena ne Yesu kila yerkaŵa kiena ne le Yu la nene amloge piowa, ana apiun pania, apisape “Imimi na memloge asape ko na pe ope yere Yu re lelaga poli, ko na ope apkas nae ga Samaria tai. Ana mepisu naĵa yermare tai teke e ko, kila ko ope wowe li mĵaga. ?Visena la nene ape lelaga, po peraga?”

⁴⁹ Ana Yesu pisataĵne pan la, pisape “Peraga, pe yermare tai to re e inu poli. Sur la naĵa in na nekila ke ne, nekila ke ga vena kia kiena ne ata va metava. Sur la naĵa amiu akila panu, akila naĵa kiau kia pato tano. ⁵⁰ Ana pe pe sur re tai pan inu poli, vanon in na pe nemiyuĵaen re naĵa na kilaen kiau kia va metava poli. Ana yar keviu tai mĵeke naĵa sinenan pisape yeririna la popon avatanon inu, ana naga taaga ga kilia

la naliṣereena e lepas la nene. ⁵¹ Ana visena tai naṣa lelaga nekilia nevisa van amiu sa nini, visae amiu yar tai larar kiau visena m̃arera, logearia, yoko taṣatete va tol marena pogos tai.”

⁵² Ana le Yu la amloge visena nene, apisa pania, asape “Nanagane na mekilia ruru naṣa yermare sike pa e ko rui. Ko opisape yar naṣa lelaga e ko taṣatete mare, ana pe yar tai naṣa yoko taṣatete ve mare re pogos tai. Yermarua Epraam mal m̃a pano-o mare, a navisawalena lala, lala m̃ena amiyum̃ae m̃a pano-o amare. ⁵³ ? Pona ko na opisu sane oto laa metavan kieta yermarua wa la nene yo? ?Ko na ositom ke osape ko na a si ne?”

⁵⁴ Ana Yesu pisatam̃e la, pisape “Visae nevisawal van amiu, pona avisu sane nemiyeluar ke sina ga kiau kia, ana avisu viowa ga. Yar taṣena ga tai kila ke kiau kia pa metava, naga naṣa asape pe kiamiu Ntewa, naga kau ata ne. ⁵⁵ Naga, amiu pe akilia re poli, ana in na nekilia ruru naga. Pe nepisokan re sane amiu poli, nepisa ruru ga ne, nesape in na nekilia ruru naga, a kiena visena punu ga, nemligan ruru sike e kiau malena. ⁵⁶ Nekilia nevisa m̃ena ga sane repimiu yermarua Epraam, naga tai naṣa nanua sumo sinenan pisape visu kiau pog nane ṣane. Naga sinenan pisape visu naṣa nomolue e kiena lusia, nevim nekila kiau yum̃aena nini, ana pogos naṣa naga siar pisu ke pa rui, naga kekara na kekara.”

⁵⁷ Ana le Yu la apiunia, asape “Ana ko na pe ope yermarua re tai ne sane naga po, kiom̃a kas pe tol re lualima yam lima poli wa. ?Ana sanape

na opisa ke osape okilia yermarua Epraam na sumo ne? Ko opisu naga koyo tai?”

⁵⁸ Ana Yesu pisatamea, pisape “Nepisa pe lelaga pan amiu, sane yermarua Epraam na nanua sumo ne, in na nesumon laa naga. Pogos naña naga pere wa, ana inu in na naga naña su sumo rui.”

⁵⁹ Ana pogos naña le Yu la amloge Yesu pisa narin visena ga nene, naña sane kia wa kiena ne Ntewa, ana akilia asape naga pisa ke sape naga Ntewa, ana sinela mimi pañisi. Akale kilavaru na kovemareen Yesu, ana naga tapoloun la, mligan Yumña Wa, pure sina ga pano.

9

Yar naña paeme pe kilamara ãala

¹ Ana imimi nalogena lala memio Yesu memial mepano, ana pogos naña mepa ke sane na, mekirawal yaru tai naña pogos naña paeme, naga pe kilamara ãala. ² Ana mepiun tan Yesu, mesape “?Navianena, sur ya ne kila yar nene? ?Pona nakoena na kiena mlamulena viowa ga yo, po nakoena na mlamulena viowa kiena ne anena po arimana, kila naga pe kilamara ãala sanene?”

³ Ana Yesu pisatamea, pisape “Peraga, pe kiena naviowaena re poli, a pe naviowaena kiena re kiena yermarua lua poli, a naga paeme sanene vena kilaen ga sane yoko yaru la akilia avisu puriukawaena kiena ne Ntewa yumñae e kiena malena. ⁴ Sanene, yoko netamalia naga nanagane, komin pogos naña yemlagi ke ga wa, monar teyumñae mārera, monar teyumñae kiena

yumãena lala naþa naga mligan inu nepimi. Yemalolo naga pimi ke narui, naþa taþatete teyumãe ea. ⁵ A nanagane na, in na nesike tano e nini, in na nepe yomerarava na yomarava nini.”

⁶ Yesu pisa sanene, þisi na plasiria yavi na porotano þasia, pulou þalelar pimi sane kene, plan e kilamaran yar naþane luwoka. ⁷ Ana pis pania, pisape “Pogaga, ovano oto tano e pulus nen wii naþa Siloam, okevan ruru si maramãa.”

Wii naþa Yesu pisa pania, kiena kia Wii Na Liganen Vano. Ana yar nene pito tano kila sanene, ana kilamarana pimi po. Þisi na þasuþe si pun imimi memio Yesu, sane naga kilia kira pisu sur narui.

Visena moki e lepas kiena kilamara þala nene

⁸ Ana siraunia, la naþa nalavis puna ne yar nene, amio la naþa na sumo asumã apisu naga mlogi ke, apisu si naga, apisa asape “?Kilamara þala ke nene narui, naþa nanua sumã monon mlolog kare ke ne, po pe naga re poli?”

⁹ Ana lala þasia apisape “Ee, naga ga nene ne,” a þasia asape “Peraga, yar taþena ga tai ne kus marana ne,” ana yar nene pisa meraravan pan la, pisape “In ga nini.”

¹⁰ Ana pogos naþa pisawal pan la sane na, apiun tania asape “?Ana sanape na kilamaramãa po sanene?”

¹¹ Ana pisatamãe la, pisape “Yar naþa Yesu, naga miyumãena. Palelar narin kene amio kiena vilasirena, plan e kilamarau, ana pisape netotano e wii naþa Siloam ne, neke plan si

vetan kilamarau. Ana nekila ga sanene, nepitove, nekevan marau, nepisu sane kilamarau po narui.”

¹² Ana apiun Yesu tania, asape “?Yar nene m̃eke pe nagane?”

Pisatam̃e la, pisape “Nemninue ga, pe nepisu re si po.”

Le Varasi la amlip̃ere la e sitomena lua e lepas na taṗa ruruena nene

¹³ Ana siraunia, aṗure yar naṗa sumo pe kilamara ṗala, aṗure naga pa puna Varasi lala vena avisulia. ¹⁴ Aṗure naga pa sanene vanon legiena naṗa Yesu kila ruru kilamaran yaru nene, naga pe Legiena Wa, ana la asitom asape Yesu kila yuṃaena tai naṗa navisaluaena na legiena wa pisa luṗaria.

¹⁵ Ana pogos naṗa apa apisawal pan Varasi lala, apiun tania, asape “Pogaga, ko towe ovisayu meraravan sanape naṗa kilamaram̃a pimi po.”

Ana naga pisa ga sanini, pisape “Peraga, yar nene mligan ga narin kene e kilamarau, ana nepa neke plan sina ga, nekilia nepisu ruru si sur punu ga.”

¹⁶ Ana pogos naṗa Varasi la amloge, laṗas apisape “Yar naṗa kila nanene, naga kila sa ga sitom korena ga navisaluaena na Legiena Wa. Sanene na, naga pe molue re nena e Ntewa pitomi poli.”

Ana la ṗasia asape, “Peraga, visae pe lelaga naṗa pe yar viowa ga tai na kilaroen navisaluaena, sanape na naga kilia kila kile wo la

ne sanene.” Ana apisayu m̃a sanene pano-o asum̃alu ase sitomena lua narui.

¹⁷ Ana apiun ke sina ga tan yar naṗa nanua pe kilamara ṗala, apisape “?Ana ko, ko naṗa naga miyuṃaen kilamaram̃a, ko na ovisa ya ne e lepas na yaru nene?”

Naga pisatam̃e ga la nena, pisape “Naga pe navisawalena lelaga tai.”

¹⁸ Naga pisa sanene, ana yerkawa kiena le Yu la pe amlelaga re e kiena navisawalena la nene poli, pe amlelaga re asape nanua sumo yar nene pe kilamara ṗala, a nagane kilia kirava. Ana apio arimana amio anena vena avim avisu la. ¹⁹ Ana pogos naṗa lalua apim, apiun tan la, asape “Avisu ruru li yar nene. ?Naga pe narimiu kemua lelaga, naṗa asape paeme ana pe kilamara ṗala, pona pe naga re poli? ?Ana visae naga, sanape na kilamarana pimi po si sanene?”

²⁰ Ana lalua apisatam̃ela, asape “Imimi lua mekilia mesape naga pe narimimi, mekilia mesape pogos naṗa moṗaria, pimi tol nanagane, naga pe kilamara ṗala nenaga. ²¹ A pe mekilia re mesape naga kilia pisu ruru si sur la nanagane, pe mekilia re a ne kila ruru si kilamarana sanene. Ana popon aviun ruru ga tania, naga pe pe sisi re poli, kilia vis.”

²² Lalua apis sanene, akilawan li m̃a kiela sitomena, vanon yerkawa kiena ne le Yu la apisayu pa rui, apisawal asape yar naṗa mlelaga sape Yesu pe Navisaarena, yoko akuan lua ve su re si amio la e Yum̃a Wa M̃ana ne Ntewa. ²³ Apisawal sanena lalua amaraun paṗisi, kila

apisa ga asape amninue ga, asape “Popon amiu aviun ga tania, naga pe pe sisi re poli.”

Varasi la apis si pan yar naña nanua sumo pe kilamara ãala

²⁴ Ana pogos tañena si tai na, apio kilamara ãala na nanua ne pimi loyuña pula. Apis ñarera pania, asape “Ovisa kia kiena ne Ntewa na mava, ovisa ke sur la punu ga nene van imimi ve lelaga, vanon nagane na mekirawal pa rui sane yar nene pe yar viowa kemua na kilaroen navisaluaena.”

²⁵ Ana naga pisatañe la, sape “Naga pe yar viowa pona pe yar wo, in na pe nekilia re poli. Sur taaga nekilia, sanini. Nanua sumo, kilamarau ãala nena ga, ana nanagane na nekilia nepisu sur punu ga.”

²⁶ Ana apiunia, asape “?Ana visae sanene, miyuñaen ko sanape? ?Kila ruru kilamaraña sanape?”

²⁷ Ana naga pisatañe la, sape “Nepisa merar-avan ruru sur punu ga nene pan amiu yam tai ãa rui, ana amiu amon logeena, ana nanagane na sinemiun asape aloge sina ga. ?Vanon ya? ? Pona amiu ñena sinemiun asape aim ave kiena nalogena la yo?”

²⁸ Naga pisa sanene, sa naña pisa kare li la ña ga, ana la sinela kar manenea, apeveyunia asape “!Oo! Ko ga ope kiena nalogena tai, imimi na mepe nalogena la kiena ne yermarua wa Mosis.

²⁹ Mosis nene, mekilia ruru mesape pe lelaga naña Ntewa pisawal kiena visena pania, ana e

lepas na yar tañena nene, imimi pe mekilia re poli, sane naga yar nae pe pimi sanape.”

³⁰ Ana yar naña pisatamea, sape “! Kue-e, nemilan amiu pañisi naña pe akilia re naga poli! Naga kila ke pupia yumaena la sanene, pano-o kila ruru kilamarau, ana amiu akilia re asape naga ai po naga yar nae pe. ³¹ Tekilia tesape visae yar viowa vio van Ntewa, yoko Ntewa tañatete yagogonia, a visae yar naña pe yar na lotena a mlogear ke naga, visae vio vania, yoko yagogonia. ³² Ana yaru nene, Ntewa miyagogon ke naga, vanon siar e nasiarena na yomarava nini pimi tol nagane, pe apisuli re yar tai naña kila ruru si kilamaran yaru tai pogos naña paeme pe kilamara ãala. ³³ Yar na monar petan ga Ntewa pitom e nini, visae pere, naga tañatete nena kila sur tai ne sanene.”

³⁴ Ana lala pe akekara re nena naña yar nene pis sanene pan la, asape “E, ko ope yar viowa kemua tai. Ko na ãelaga na mlamulena viowa pulemamaga e ko siar e pogos naña opaeme pimi tol nanagane. ?Ana ko ko na ai ositom ke osape okilia ovian imimi sina ga?”

Apis kare naga sanene pano-o, ãisi na amñenelua si naga pa vanua.

Kilamarañala nene mlelaga e Yesu narui

³⁵ Ana pe piavi re nena ga Yesu mloge asape amñenelua yaru nene sanene, ana pa mñalia, piun tania, pisape “?Sanape? ?Nanagane na ko na omlelaga pa e Narin Yeririna rui, po pere?”

³⁶ Ana yar nañane piun tan Yesu, pisape “?Ana naga naña ko opisa ke ne, naga ai? Visae ko

na okilia ovisali van inu, pona nekilia nelelaga e naga.”

³⁷ Ana Yesu pisatañea, sape “Ko na opisu pa naga rui, ko opisu ke naga nagane. In ga ãa, nane nepis ke nemio ko ne.”

³⁸ Ana pisatañea, sape “O Suþe, visae sanene, in na nemlelaga nena ga e ko.” Ana yar nene þaryon lue ga na yeluaren Yesu.

Yesu pis pan Varasi lala

³⁹ Ana Yesu pis pisape “In na nepim e yomara-ava nini vena nevisusuveve yeririna lala, vena kilaen sane yeririna la naþa kilamarala þala akilia avisusu suria, a vena kilaen sane yeririna la naþa asitom ke asape akilia apisu sur punu ga, avisu kilale sane la ape kilamara þala ga.”

⁴⁰ Ana Varasi la þas asumã lavis ga, amloge visena nene, apiun tania asape “?Ana opisape sane imimi mēna kilamaramimi þala ga, a?”

⁴¹ Ana Yesu pisatañe la pisape “Visae pe lelaga naþa amiu apisu kilale asape kilamaramiu þala, po li m̃a ga, yoko amiu taþatete akilia awar nakoena vanonia. Ana pogos naþa visae apisa ke asape akilia avisu ruru sur punu ga, sanene na pupia naviowaena sike pa e amiu rui.”

10

Pakaiwa na kove kan sipsip

¹ Ana Yesu pis pa re laa sane, pisa þakaiwa tai pan la, e lepas na kove kan sipsip, naþa amiyumãen pae ana sipsip kiena ne yeririna punu ga akilia ava amomalio loyumã veraga. Naga pisa sanene, pisape “Nepisa pe lelaga pan

amiu, yar naña visae ve kom re e mralaea na vaen loyuma vanon sipsip lala, ana piyukalawan ga kove, yar ne sanene pe yar viowa na vinauen ga. ² A naga naña silaga pa kom lologia mralaea, naga pe yar mesmes nena navisuaren sipsip. ³ Visae aligan yar tai na kirakirawoen mralaea, ana pogos naña yeririna navisuarena sipsip vim, yoko naga kilia vike ga vania. Ana pogos naña va loyuma, sipsip la punu ga aloge pulgona, ana naga vio ga kia kiena ne lala naña ape kiena ga, p̄isi na lala ga nene asumalu a naga sumon la ava vanua. ⁴ Ana pogos naña visae sumon la apa ava vanua, naga yal sumon la, la asiraunia avano, vanon akilia ruru pulgona. ⁵ Tañatete akila ve sanene van wolawa tai, yoko amaraun ga, vanon pe amloge kilia re pulgon yar tañena la poli.”

⁶ Ninun visena nene Yesu pisawal pan la, ana pe amloge kilia re kinas poli.

Yesu sape naga pe mralaea na kove na sipsip

⁷ Sanene na, Yesu sunyu ma pan la sane e lepas na kove na sipsip nene, pisape “Nepisa pe lelaga pan amiu, sane mralaea na kove na sipsip nene, naga inu. ⁸ Lala tañena la naña apim sumon inu, naña apisokan asape yoko avisuar ruru sipsip lala, ape yar viowa na vinauena ga lala, ana pogos naña apa akaten sipsip lala, sipsip la pe amloge la re poli. ⁹ In ga nepe mralaea na kove, yar naña imi kom ga pun inu, yoko nevisuar ruru kiena malena. Yoko naga kilia va vanua lual kana kinanena, p̄isi na kilia vim sina momalio kolemalu, kilia vim vano ve sanene naga pogaga. ¹⁰ Yar na vinauena pimi vena war plan vinaunen

sipsip lala, pona nawe mom̃ar laena, pona kila kare manene laena, ana in na nepimin vena akilia atol malena, vena akilia akekaran malena naþa wo vaþisi van la.”

Yesu pisape naga pe yar wo na visuar ruruen sipsip lala

¹¹ Ana Yesu pisa m̃ena ga, sape “In na nepe yar na po na visuar ruruen sipsip lala. Yar na visuar ruruen sipsip naga monar kekara naþa tam̃an kiena malena vena tamaliaen kiena sipsip lala.

¹² Visae ve yar na yuṃaena ga tai, þisi na taþatete visuar ruru sipsip la ve sanene, naga pe kekaran re la ne sanene vanon pe pe kiena sipsip re poli. Visae pogos tai visu pupia lokul tetan lala atomin sipsip la nene, yoko naga marau ga, suṃalu kiriri ure, ligan sipsip la asike na, þisi na lokul tetan la nene avim akarkare la aṃenetetain la. ¹³ Yar nene ure vetan sipsip la ne sanene, vanon naga pe yar tai nayuṃaenen ga kiena kilavaru, naga pe sitom manene re sipsip la nene poli.

¹⁴ “A in na nepe yar na visuar ruruen kiau sipsip lala. Nekilia ruru la naþa ape kiau, a la nene akilia ruru m̃ena inu. ¹⁵ Imimi na mekilia ruru imimi sa ga naþa imimi lua Ata mekilia ruru imimi lua. A in na sineu si kiau sipsip la nene torokin naþa netaṃan kiau malena vanon la.

¹⁶ “Ana kiau sipsip m̃ena la moki asuṃa ke ga wa, naþa pe apim asu re loyuṃa e kiau kove poli wa, ana monar neva nevio la m̃ena ga, ana pogos naþa aloge pulgou, yoko aimi. Nekila ṃa sanene

vano-o kiau sipsip la punu ga aim ave p̃egas taaga ga narui amio inu, yar keviu na visuar laena.

¹⁷ “Vano-o yoko netam̃an kiau malena vanon la, ana kau Ata naga kekaran paṗisi, kekaran inu vanonia. Ana nekilia nevisa m̃ena sane kiau malena naṗa visae netam̃an vano-o, yoko nela maran sina. ¹⁸ Pe yar taṗena re si naṗa yoko lalua kiau malena vetan inu, ana in ga taaga netam̃ania. Naga pe kiau ga nataṗanen vano, a pe kiau ga nalamaranen sina. Na naṗa neyum̃ae sanene, Ata ga mligan e inu.”

¹⁹ Ana yam si tai, visena kiena ne Yesu na sanene kila le Yu lala aṗure tetai e sitomena lua sina. ²⁰ Lala moki asape “Yermare ga na sike e naga, yar naña ṗarina pe wowe viowa ne. !Ve ayagoga re!”

²¹ Ana lepas ṗasia asape “Peraga, kiena visena wo la nene pe pe visena kiena ne re yar naṗa yermare sike e poli. ?Ana sanape, yoko yermare viowa kilia kila ruru si kilamaran yaru naṗa pe ṗala, sa naṗa yaru nene kila rui?”

Yesu pisawal meraravan naga pan le Yu lala

²² Ana e pogos nene la apim atol si pog na kala pupia ṗaṗagena tai, ma Yerusalem. Paṗagena nene apio asape Paṗagena Navisa Ruruen Yum̃a Wa Mana ne Ntewa, ana amiyum̃aen ke e pog na miava. ²³ Ana Yesu m̃ena pa sike e ṗaṗagena nene, ana pogos tai naga pa ma e Yum̃a Wa Mana ne Ntewa, mial ke pa e pupia mraliu naṗa apio sape Mraliu Kiena Solomon. ²⁴ Ana yerkawa kiena le Yu lala naṗa asike ne apim puna, ape

ṗegas amiyervivia, apiun m̄areran pania, asape “!Konua rui mesape mekilia ruru ko ko na ai, ana ko okilawan ko m̄a sanene pano-o! Visae ko na ope Navisaarena kiamimi na lelaga, imimi sinemimin mesape ovisa meraravan ruru van imimi nanagane!”

²⁵ Ana Yesu pisatam̄e la, sape “?Ana in na nepisa ruru pan amiu ṗa rui, po pere? Nepisa ruru pan amiu ana amon naṗa alelaga ea. A pupia yum̄aena kerkeviu la naṗa nemiyum̄aen e kia kiena ne kiau Ata, sa naṗa amiu apisu pa rui, lala m̄ena akila meraravan inu pan amiu rui, ²⁶ ana naga m̄ena nene amiu pe amlelaga re e poli. Amiu pe amlelaga re nena e inu, pona nanene vanon amiu pe ape ṗegas na kiau sipsip re poli yo. ²⁷ Kiau sipsip lala amloge kilia pulgou, a in m̄ena nekilia la punu ga, a lala asum̄a ataveve inu. ²⁸ In na nemla ke malena naṗa ve uro re pan la, ana taṗatete akovio, pe yar re tai naṗa kilia war plan la vetan lum̄au. ²⁹ Nanene vanon kiau Ata ke narui naṗa ṗar la pan inu, a naga m̄arera manene laa taulu punu ga, ana taṗatete yar tai war plan sipsip la nene vetan navisuarena na limana. ³⁰ Lelaga, inu nemio ata, imimi lua mepe taaga ga.”

Le Yu la sinela kar Yesu

³¹ Ana pogos naṗa Yesu pisa pa visena nene, yerkawa kiena ne le Yu la sinela kar ke sina ga, aṗar kilavaru lala asape akoven̄aria. ³² Yesu pisuia, ana pis pan la, piunia pisape “?In na nekila ṗarin yum̄aena wo lala e maramiu rui,

naña Ata sinenan sape neyumñaenia, ana amiu asape akove inu vanon nape?”

³³ Ana la apisatamnea, asape “Peraga, mesape mokove ko, pe vanon re yumñaena wo poli, ana vanon ga naña ko na oñarnena kare ke kia kiena ne Ntewa, naña ko, ko na ope yeririna ga, ana silaga okila ke sa naña ope Ntewa pa rui!”

³⁴ Pisi na Yesu pisatamne la, sape “E kieta Tus Wa, visena kiena ne Ntewa tai teke e Tus Na Yauena, naña pis pa yeririna nae Israel lala, pisayu sanape naña lala ape narina lala, naga pis sanene pan la, pisape

‘Amiu na sa ga ntewa lala.’

³⁵ “Sanene na, tevisu e yo nene sane la naña visena kiena ne Ntewa nene pan la, la ape yeririna ga lala, ana visena nene pisape lala ape ntewa lala, ana visena nene naga pe kieta Nasiriena Wa tai, monar ve lelaga ga.

³⁶ “Ntewa pisayu kiena yeririna la sanene rui, ana yokö ve sanape van inu, naña in ga taaga naga miawawo inu, mligan inu nepitom e yomarava nini? Mesmesun ga naña nepisawal nesape naga pe kau Ata Ntewa, ana inu nepe narina, ana amiu asape piowa ga naña nevisa sanene. Apisa ke asape in na neñarnena kare kia wa kiena ne Ntewa, ana pe sa re nene poli.

³⁷ Visae pe lelaga naña nemiyumnae ke pe pe kiena re arimau poli, pona amiu ve alelaga re e inu, naga pogaga. ³⁸ Ana visae nekila ke kiena yumñaena lala, pona amiu amlelaga ke e inu po pe amlelaga re poli, a amiu monar alelaga e kiau kile lala, sane ape yumñaena kiena ne Ntewa

lelaga. Visae ve sanene yoko amiu akilia avisu kilia sane Ata teke e inu lelaga, a inu m̃ena neteke e naga.”

³⁹ Yesu pisa sanene pan la, ana kiela sitomena m̃arera maran taaga sum̃a ga. Lala akilali naṗa atararli si naga sanene na, amilan ga naga pure tan likan la pure pano.

⁴⁰ Ana Yesu petan si Yerusalem kusro pito sina e wii naṗa Yortan lepas na vano, e yo naṗa Yoane Nakeena kee yeririna lala ea nanua sumo. Ana suña e yo nene yam piavi li m̃aga, ⁴¹ ana yeririna la apim ke puna silaga. Apim apisayu naga asape “Yoane nanua, naga pe kila re kile la sane yar nene kila ke ne poli, ana naga pisa plan sur moki e lepas na puna, ana tepisu e kilamarata sane sur la punu ga naṗa pisa ne apim ape lelaga ga narui.” ⁴² Ana kiela sitomena na sanene kila sane la moki nae yo nene amlelaga e Yesu.

11

Suniena kiena Lasaros

¹ Ana pogos naṗa Yesu sike perina wa, maiena m̃arera tai pimi tol kiena erau tai, Lasaros. Lasaros nene vinena la lua naṗa Maria amio Mareta, la telu nene nae narin pulkumali naṗa Petani lavisin Yerusalem. ² Ana Maria ne naga m̃a nene naṗa siraunia taron ponotaninu e Yesu, miyumu vania lana e vilṗarina. ³ Ana pogos naṗa vinena la lua nene apisu m̃enela nene mai keviu sanene, amligan visenan pa pan Yesu,

asape “Suḑe, kionḑa erau naḑa ko na sinemḑa si naga, mai tai na piowa ga.”

⁴ Ana pogos naḑa visena nene pa tol Yesu, naga pe pito re poli, pisa ga sape “Inanena nene pe na marena re poli. Inanena nene sa ga mrapa kiena ne Ntewa tai, vena kila meraravanen kiena urarena, a vena kila meraravanen kiena pupia puriukawaena naḑa mla pan inu Narina Ntewa.” Yesu pisa visena nene, sa naḑa kilia pa rui suri naḑa yoko yuḑaenia.

⁵ Yesu sinena si Mareta nene paḑisi amio luena na ve tokak a mḑenela nene, a sinena mie la paḑisi, ana pe kan pog mesmes re na kilaen suri nene poli wa. ⁶ Sa nene, naga pe pa re ga poli, suḑa si legiena lua e yo nene naḑa wii nae Yortan lepas na vano. ⁷ Suḑa si sanene, ḑisi na pisa pan imimi nalogena lala, sape “Pogaga, tokusro sina ga teva si yo nae Yutea.”

⁸ Ana imimi mesitoḑal ke yerkawa kiena le Yu lala e yo nene naḑa sinela kar Yesu paḑisi, ana memaraun vitoen sina. Mepiun tania, mesape “?Navianena, sanape? Nanua ga naḑa tesike ma ne na le Yu la akilayon asape akoveḑar ko, ana nanagane na osape teva si pula.”

⁹ Ana Yesu pisa pan imimi pisape “Kiau navisa-taḑeena van amiu naga sanini. E legiena, kana aora nena lualima yam taaga pa lua, pupia mrae tegoli yo, kila sane yar kilia yal ruruia, taḑatete lolor. ¹⁰ Ana yar naḑa yal li e yemalolo na kolemalo, naga yoko lolor ga, vanon yomerarava nene pe tegoli re si kiena mrapa poli.”

¹¹ Yesu pisa visena nene pan imimi, kana kinasia sape naga kilia yaloro ga woga ga ne,

tařatete suri viowa tai vania vano tol pogos nařa Ntewa ligan ruruia sape akilia awemar naga. Ana miakolkol sina ga, sape "Kieta erau nene momalio rui. Ana nanagane na tevano na neviořege sina naga."

¹² Ana imimi nalogena la pe memlogekilale re kinas nen visena nene po, ana mepisalupar si Yesu, mesape "Suře, visae naga momalio, pogaga ne, yoko kilia loge wo sina ga ne." ¹³ Mepisa sanene vanon mesitom ke mesape Yesu pisa ke sape Lasaros pa ruru ke ga, ana pere, Yesu pisa ke kana marena ne.

¹⁴ Ana nagane na Yesu pisa meraravan pan imimi narui, sape "Lasaros mare pa rui, ¹⁵ komin pogos nařa naga mai, pe nesu re nemio la poli. Ana sanene na nepisu pogaga, a po mēna ga pan amiu, vanon sane kiena marena nene yoko imi ve sa pulmas tai van amiu, vena amiu akilia alelaga lelaga e inu. Pogaga, tevanon, tevisuia."

¹⁶ Ana imimi nalogena la memaraun ke navaena wa, ana Tomās nařa apio sape Tomās Kaora, pisa pan imimi sape "Amiu asumalu, ita punu ga tevano. Kieta Suře sinenan sape va mare sanene, popon ita punu ga tevano, temare temio naga veraga."

¹⁷ Ana imimi punu ga memial veraga mepano, mepa makate lavisin narin pulkumali nařa Petani. Ana apisawal pa Yesu asape Lasaros, amligan tasnena mono e pulu kilavaru legiena vari řaro rui. ¹⁸ Ana kumali nařa Petani sike lavisin ga pupia kumali nařa Yerusalem, torokin sane kilometa ve telu ga, ¹⁹ kila sane le Yu moki nae Yerusalem, pogos nařa amloge marena nene,

sinela miye Mareta amio Maria, ana apim vena atag amio la atagin naga naña kovio. ²⁰ Ana Mareta sike amio la nene, ana amligan visenania, asape Yesu pam sike pa garo ne e mrapa rui, ana naga suñal pato talopania. Ana luena naña ve tokak, Maria, naga suña ga loyuma, ana pe pa re vanua poli. ²¹ Ana Mareta pitomi pisa Yesu, pisa pania, sape “!Supe, visae ko na ovim ga e nini, mñemimi nene tařatete kovio! ²² Ana in na nemlelaga pe sur korena ga naña mare, ana sur naña ko oviun vetan Ntewa, yoko naga tañan ga van ko.”

²³ Ana Yesu pisa pania, sape “Mareta, yoko mñemña nene suñal mal sina.”

²⁴ Ana Mareta pisatamea, sape “Lelaga, nekilia ke ne, nekilia nesape naga yoko mal sina ga e pupia nasumalena e legiena maro.”

²⁵ A Yesu pisa visena nene pania, sape “In na nepe mrapa na suñalen sina, in na nepe purřes nen malena. Yar naña lelaga e inu, pe suri korena ga naña monar mare e yomarava nini, ana yoko mal sina ga. ²⁶ Yar naña tol malena nene, ana nalelagaena e inu teke e naga, naga tařatete visu si marena pogos tai. ?Mareta, ko na omlelaga sanene?”

²⁷ Naga pisatamea, sape “O, Supe nemlelaga. Nemlelaga e ko, sane ko na Navisaarena, narina ne Ntewa, ko ko na naña siar nanua sumo sumo apisa ke sape yoko imi tamalia yeririna lala na yomerava nini.”

Yesu wamarana la mlalau

²⁸ Ana pogos naña Mareta pisa pa sanene pan Yesu, pa sina ga loyumña, pavinin vinena naña Maria, pis malum ga pania, sape “Navianena naña! Pam pa rui, sike garo e mrapa wa, pisape visu ko kone wa.” ²⁹ Maria mloge, sumñalu veraga, sape vito visu Yesu, ³⁰ nane e ga e mrapa naña Mareta pisu ga naga e nanagane, vanon naga pe pimi re loyumña e kumali poli wa. ³¹ Ana le Yu la naña asike loyumña amio la, apisu naña sumñal pa vanua pito yuroro sanene na, asitom asape naga sinenan sape va tag sina e pulkilavaru, ana la mña asumñalu, ataveve naga apano.

³² Ana Maria mial mña pito sanena, pimi tol e naña Yesu sike ea. Naga kira pisuia, pimi lavis puna, kuan mlor pito tano e mialana, tag pania, pisape “!Suñe, visae ko na oimi ga e nini, mñemimi nene tañatete kovio ne!” ³³ Ana naga tag mña sanene, le Yu tañena la naña atavevea, lala mña atagi. Ana pogos naña Yesu pisu pupia naloge viowaena kiena Maria la sanene, naga mña mloge piowa, mnunu sur nene sane urmi manene e losinena, ³⁴ naga piun petan la, sape “?Amiu amligan mono ke pe?”

La asape “Suñe, oimi teva tevisuia.”

³⁵ Yesu mloge sanene, ana tagena pimi e naga, wamarana la mlalau.

³⁶ Pogos naña apisu naga tag sanene, la ãas asape “!Lelaga naña ne, naga sinen si kiena erau nene pañisi naña ne, kila sinena piowa na sinena piowa!” ³⁷ Ana lala ãasia, naviunena teke e kiela sitomena, asape “Yar naña nanua kila kilamara ãala tai, kilamarana pimi po sina ga. ?Visae

sinenania na, naga kilia kila naña kiena erau nene ve kovio re ga, a?”

Yesu pioņege si Lasaros petan marena

³⁸ Ana Yesu mial amio pupia sineyeena, amio Maria lala apa akate e pulkilavaru naña amligan tasnena ne Lasaros mono ke ea. Pulkilavaru nene naga pe puluve, naña amligan pupia kilavaru tai mono ke pulusia. ³⁹ Ana Yesu pisape akuslua pupia kilavaru nene.

Ana vinena taņena nene Mareta mloge naña Yesu sape akuslua kilavaru, ĩisi na sape visaluņaria, pisa pania, sape “Suņe, piowa naña tekila sanene, vanon naga mare legiena vari ĩaro pa rui, yoko ponos kona va ĩisi ne.”

⁴⁰ Ana Yesu pisataņe pania, sape “?E, ko na pe ositoņal re si kiau visena naña nepisa pan ko rui? In na nesape sa ko na olelaga ga, ovisu naņareraena na urarena kiena ne Ntewa naga yuņae.” ⁴¹ ĩisi na la akila ga, akuslua pupia kilavaru, ana Yesu kira pa metava, mlen, sape “Ata, nepisa siņa pan ko keviu naña ko na okekaran nalogeen kiau naviunena nini. ⁴² Nekilia sane sur ya naña visae in ga taaga nesape neviun tan ko, yoko ko ologe ga. Ana suri naña neviun tan ko nagane na, nepiunia e maran la ne asuņal asike nini, vena la mņena akilia aloge. Ana visae avisu sane ko ovisataņe van inu sa naña nepiunia, kilia iilala alelaga sane pe lelaga ko na omligan inu nepitom e yomarava nini.”

⁴³ Ana pogos naña Yesu mlen pae sane na, naga kii m̃arera sanene pano, pisape “Lasaros, omolue ovim.”

⁴⁴ Ana amilan naña yar mare suñalu pimi vanua, ãarar kulmrae la naña amluluar naga ea, tamalele ke e limana la amio lana a ãarina asike wa. Ana Yesu pisa pan la sape “Pogaga, awar plan kulmrae la nene vetania, vena naga kilia yal ruru sina ga.” Pisi na akila, ana Lasaros mal ruru ga sike si amio la.

Pupia kumali tañan sape monar aweñar Yesu mare

Matiu 26:1-5; Mak 14:1-2; Luk 22:1-2

⁴⁵ Ana le Yu la moki naña ataveve Maria apim e pulkilavaru nene, pogos naña apisu Yesu kila Lasaros mal si e marena sanene na, amlelaga nena e naga. ⁴⁶ Ana lala ãasia amon lelagaena, añasuñe la sina ga, apa si pu Varasi lala, apisawal pan la sur naña Yesu miyuñäenia. ⁴⁷ A pogos naña amloge pe akekan re nena ga, ana lala amio yerkawa na yar wa lala, apio m̃ena lala tañena na pupia kumali kiena le Yu lala apim lele taaga asunyua. Ana pogos naña apim pae lele taaga, apisawal pan la asape “?Yoko tekila kan yar nene narui? Naga kila ke pupia kile la pañisi e maran kieta yeririna lala. ⁴⁸ Visae ve tevisawo re naga, yoko kila m̃a sanene vano-o ve tai re naña ve lelaga re e naga, yoko ure la punu ga ataveve ne. Ana visae la na mara nae Rom avisu yar nene kila ke sape imi ve pupia nasumonena tai sanene, yoko sinela kar ita le Yu la punu ga. Yoko akilia aimi akila mara amio ita

vano-o akila kare kieta ðegas punu ga amio awe plan kieta Yumña Wa Mana Ntewa.”

⁴⁹ Apisa ke sanene na, kiela pupia nasumonena Kaeñas, naña e kas nene na naga ðuarar kia naña Parin Yaru Wa, pisa pan la, sape “?E, vanon ya ne kiamiu sitomena la plas ga sanene, naña amiu aminue ga sane yoko tekila ya ne van yar nene? ⁵⁰ Sur ya na po pan amiu? Pogaga naña yar taaga ga nene kila ita make ga tokovio, pona popon naga taaga mare vena tamalia kieta ðegasia ita punu ga?”

⁵¹ Pogos naña pisa visena nene, naga mape pisawal ke sitomena tai naña kiena ga. Ntewa kila naga ðuarar yumñaena na ðarin yaru wa e pogos nene, ana Ntewa ke narui mligan mña visena nene e kiena sitomena, vena visawalen visena lelaga tai, sape Yesu monar mare vena tamaliaen yeririna punu ga. ⁵² Naga pe kilia re poli, a pisa ke sape siraunia, pogos naña Yesu mare, naga pe maren re ga ðegas kiena ne le Yu ga la nene poli, ana kiena marena panon mña narina ne Ntewa taña lala naña asike mña e purvanua taña lala, ve naurepran laena punu ga aim ave na mratava taaga ga.

⁵³ Ana e pogos nene, Kaeñas pisawal visena nene, pure sitomen kiena ne yerkawa la punu ga kiena ne le Yu la asape Yesu monar mare ga. Ana siar e pogos nene, apisayu ke silaga, asape akilia akila ve sanape. ⁵⁴ Ana kiela sitomena nene kila Yesu mialorotete sina likan yeririna lala e yo nae Yutea, naga ðere plan imimi, mepa mesike

e narin kumali tai, kiena kia Ipraim, naþa sike perina, lavisin yokorena.

Lavisin pog na þaþagena maro na Sitomalen Natamaliaen kiena ne Yesu

⁵⁵ Ana lavisin pog na þaþagena kiena le Yu la nene, Paþagena Nasitomalen Natamaliaena. Ana le Yu la naþa asike e yo la ne, amligan ke kiela yo lala, apa ke ma Yerusalem, asape ava e Yuma Wa Mana ne Ntewa, akila kuþaþaena naikikena e marana ne Ntewa, sumon naþa þaþagena siaria.

⁵⁶ Ana pogos naþa yeririna la apa ke metava e Yuma Wa, asike akale ke Yesu. Akale pano ana re naga poli, ana la apiuyun ke petan la, asape “?E, amiu asitom sanape? ?Yoko naga vim kate e þaþagena nini, po ve vim re?”

⁵⁷ Ana þarin yar wa la amio Varasi lala, lala mena asitom ke asape pona Yesu kate li e aora nene yo. Ana la apisaar marera asape visae avisu Yesu sike lele tai, monar aligan visena va van la vena aim na atararia.

12

¹ Ana pogos naþa Paþagena Nasitomalen Natamaliaena nene pere ke ga wa, legiena orai sike ga wa, ana imimi memio Yesu mepa tol si narin pulkumali naþani Petani. Ana mepa makate si e uma mana ne naga naþa Yesu kilamalia sina ga pe piavi re poli, naþa Lasaros. ² Mesuma memio la pano-o, la nene asape akila kinanen tai akan amio Yesu. Ana pogos naþa akila ruru punu pa sur lala, imimi memio Yesu mepim metotano, a Lasaros mena totano amio imimi, ana vinena naþa Mareta naga þar ke kamimi

kinanena pimi. ³ Ana vinena ne Lasaros taþena naþa Maria, naga mena suma ga, naga kus pupia pias na ponotaninu pimi, ponotaninu nene apio asape nat, naga ponotaninu tai naþa kana maran kilavaru pa metava paþisi. Ana kus pimi lavis pu Yesu, taronia miyumuvan la Yesu ea. Pisi na Maria tar pupia viluna piavi nene, miyumuvan sina ga la Yesu, ana pe piavi re poli, ponotaninu naþa ne ponos miyere make loyua e naþa asike e ne.

⁴ Ana e pogos nene, nalogena kiena ne Yesu naþa yoko siraunia wilwilin wania, Sutas nae Kariot, naga mena pisu ke sur nene. ⁵ Naga pisape “?Vanon ya ne ve awilwilin re ga pupia ponotaninu nene? Visae sanene, akilia ataulu pupia varu tai, sane kilavaru naþa yaru tai tauluia e kiena yuaena na kas wetelu tai, ana akilia ataan vena iilaen la naþa pe kiela sur la poli. !Akila kare ga ne!”

⁶ Naga pisa sanene, ana naga pe sitomal re yar la naþa pe kiela sur re la poli. Naga pisa vanon naga pisuar ke kiamimi karo na varu, a pinaun la ke, kan ke kiamimi varu lala, a naga sitom manene laa varu na ponotaninu nene.

⁷ Ana Yesu pisatae e sur naþa Sutas pisa, sape “Ei, piowa naþa ko ovisa kare vineta sanene. Naga kila sanene pan inu vanon naga sitom ke sape legiena naþa yoko asinwo inu pimi make lavis narui. ⁸ Yoko yar la naþa ve kiela sur re la asulue ga amio amiu, vena amiu aiila la sanene, ana in na pe pe nasulueen re nemio amiu poli.

Sanene, sur nene naña naga kila pan inu naga po pañisi.”

⁹ Ana pe piavi re nena ga, visena pato tol lala naña aňarpiran la ke e paňagena garo Yerusalem, sape nagane na Yesu pam sike Petani rui. Pisi na lala apava ke asape avisuia, a pe naga re ga poli, asape avisu mēna Lasaros, naña Yesu kila naga mal si rui. ¹⁰⁻¹¹ Yeririna la apa apisu ke Lasaros sanene, a sur naña Yesu miyumaen pania kila naña lala moki, pano tol li na sumonena lañas kiena le Yu lala, aňure petan kiela nasumonena taņena lala, apim amlelaga e Yesu narui. Ana yer keviu kiena yar wa lala naña asike ne apisayu sur nene, apiranaria asape akale mrapa naña awe moňar Lasaros mare.

Yesu pimi tol yo naña Yerusalem

Matiu 21:1-11; Mak 11:1-11; Luk 19:28-40

¹² Lasaros lala akila pae kinanena kana ne Yesu pñisi, ana e legiena taņena sina, visena pato tol pupia pñina la naña apam asike Yerusalem e paňagena, asape Yesu naga pimi ke rui, vena vim loyuma e pupia kumali nene. ¹³ Ana yeririna la amloge, asumaľ amial apa ate lumamaľela lala, amiyal apano vena avitawe naga mrapa.

Asape akila sanene vania vena naga vim ve sane kiela pařin suņe, ana la amial apa sanene, apioyon ke sanini apisape,

“!Pona we-e po! Teieluar naga, kieta pařin suņe viu nae Israel!

!Ntewa na mava ovisa ruru naga naña pimi e kioňa kia!”

Yauena 118:26

14 Ana Yesu mial pimi ke, naga kila naña aþure narin togki tai pimi puna, pa totano ea mial pimi. Sur nene naña naga kila taveve ruru ga visena tai na Visena Wa naña pisape.

15 *“Amiu le Yerusalem lala, amiu ve amarau re sina,*

Amiu avisuia, nanagane na kiamiu þarin suþe naga pimi ke pun amiu narui.

Naga kus ke ga narin ninus nen togki tai, pa totano ea pimi ke.” *Sek 9:9*

16 Ana e pogos nene, imimi nalogena kiena ne Yesu lala pe mesitoñal re visena nene poli, a siraunia, pogos naña pa pae ma e peni, imimi mepisu kilale ga na wa sane visena marua na nanua ne naga pisayu naga mesmas, ana mepisu sane naga kila sur punu ga mesmesu ga sa naña Visena Wa lala apisa nanua sumo asape yoko Navisaarena yuñæenia.

17 Ana þisi na pupia þina nene kila ke natorworena pa Yesu sanene na. Lala moki la naña nakoneva asike amio naga pogos naña pio Lasaros ñal si petan marena, ana la apa apisawal pupia kile nene pan yeririna taþena lala, 18 ana pogos naña lala amloge sur la naña Yesu miyuñæenia, sinelan asape avisuia, ana la apim vena ava avisuia. 19 Ana lala punu ga nene, pupia þina pa tai narui, ana pogos naña le Varasi la apisuia, amloge piowa, asilin þarila, apisape “Toþaryon yar nene pano-o piowa ga. Naga taulu ita punu ga, pure yomarava wetelu nene apa ataveve naga rui.”

Le Krik laþasia asape avisu Yesu

²⁰ Ana e yeririna moki la naña ke metava ma Yerusalem vena alotun Ntewa e ãaãagena nene, lala ãasia pe ape le Yu re poli, lala le Krik la naña apim amlelaga e Ntewa sane le Yu lala. ²¹ Ana pogos naña amloge manene laa kia kiena ne Yesu, asape avisu naga. Apa akale, akirawal kiena nalogena naña Pilip nae Petsaeta ma Kalele, ana apiun Yesu tania. ²² Ana Pilip pa pisawal pa Antru, ãisi na lalua apa apisawal pa Yesu.

²³ Ana pogos naña Yesu mloge sape la naña pe ape le Yu re la poli asape avisuia, naga pisawal sape “Nanagane na pe pogos mesmesu vena Ntewa kila kiau kia, inu Narina ne Yeririna, va metava. ²⁴ Nepisa pe lelaga pan amiu, sane visae kurus tai, visae ve amapla re, yoko naga taaga to korena ga toña sanene. Ana visae amapla, yoko menun nena ga, ana siraunia kilia war si mras ve moki.

²⁵ “Sanene, naga naña kekaran manene laa malena kiena e yomarava nini, taulu naña kekaran inu, yoko kilalua, a naga naña pe sitom manene re naga poli, yoko naga sumã ga woga ga vano-o tol malena viu naña pe luas re poli.

²⁶ “Yere Yu pona yere Krik naña sape sinenan kiau yumãena, sinenan sape ilanu, naga monar taveve in lue ga. Ana pogos naña naga taveve inu ke sanene, yoko e lele ya naña sa neva nesike ea, a naga mña kilia amio inu. Yar naña pe yar na kiau yumãena, yoko Ntewa la kia wo vania.”

Yesu sunyu kana marena

²⁷ Ana Yesu siar sitomveve ke naña yoko ve ve piavi re na, monar mare, ana mloge urmi pañisi e naga. Pisi na sape “Nanagane na, nemloge sane sitomena la moki e losineu. ?Yoko nevisa ya ne va kau Ata? ?Popon nelen, neviun vetania, nesape: Ata, awis otarlua inu e aora m̃arera na loge viowaena nene? Pona piowa ga naña nevisa sanene, vanon in na nepim e yomarava nini vanon nenaga yuñæna ne nanene. ²⁸ Peraga, popon nevisa ve sa ga nene, nevisave: Ata, awis okila kionã kia vim ve keviu kome sur la naña sa akila van inu.”

Ana pogos naña Yesu pisa pa visena nene, pulgo tai metava ma e peni pis pitomi tano, pisape “Inu na nekila ke kiau kia pa metava kom ga e ko rui, a yoko nekila ke sina ga na wa.”

²⁹ Ana ãina la naña asu ke lavis ga amloge m̃aagena na pulgo nene, ana ãasia asape polilu ga tai, la ãas asape “Peraga, navisi ga ta ne pisi ke pania.”

³⁰ Ana Yesu pisa pan la sape “Pulgona naña temloge ne, naga pe pitomi re sape in na neloge poli, a pitomin amiu, vena amiu akilia sane inu nepimi pe. ³¹ Monar ve sanene vanon nagane na, pe pog na liþereen yeririna na yomarava narui, pe pog na kovenluaen þarin suþe na yomarava narui naña Yermare. ³² Vena nekila yuñæna nene, monar netamalele metava e laki torovia, ana pogos naña nem̃eke metava sanene, nekilia noure yeririna punu ga aim pun inu.”

³³ Ana visena kiena ne Yesu, naga pisa pe nakilaen imi merarava van la sane kiena marena pe marena tai naña ve sanape. ³⁴ Ana pogos

naña ãina la amloge, asape “Memloge ke naña apuloyu ke Visena Wa, pisa ke sape Navisaarena naga mal lue ga, tařatete mare pogos tai. ?Ana sanape naña ko na opisa ke osape yoko atelan Narin Yeririna metava vena mare? ?Pona ko na opisa ke ga tařena tai yo? Narin Yeririna ya naña opisa ke ne, naña yoko ve sanene vania?”

³⁵ Ana Yesu pisatañe pan la, pisape “Inu na nepe yomerarava kiena ne Ntewa, a nekilia nesuñã si nemio amiu yam ve plas ga. Ana pogos naña nesike nemio amiu, popon ayal e kiau yomerarava nena, visae peraga, yoko pupumalko kalo make amiu, a yar naña sape yali, tařatete visuluřar si kiena mrapa. ³⁶ Pogos naña inu naña nepe yomerarava nene nesike ke nemio amiu wa, popon alelaga e inu, vena amiu ñena akilia aim ave yeririna na yomerarava lala.”

Ana pogos naña Yesu pisa pa visena la nene, naga mligan la asike, petan la pa tapolou e lele tai naña tařatete aimin sina naga.

Le Israel la pe sinelan re alelaga e Yesu poli

³⁷ Yesu miyuñãen pupia kile la moki e marala rui, ana pe suri korena, lala pe sinelan re asape alelaga e naga poli. ³⁸ Ana kiela řelaga na sanene, akila ke sina ga sa ga naña le Yu marua la nasumo akila e pogos kiena ne yermarua Aisea, naña pisayu e visena la lua naña pisawalia. Nasumo pisa sanene, pisape

“Ntewa na mava, imimi mepisasawal ke pan la, ana lala pe akekanan re asape alelaga poli, a ko ko na okila meraravan kiomã

puriukawaena na lumoña van la, ana lala a ne pisuluþaria? Pe ta re poli.” Ais 51:1

³⁹ Ana na luania, naga mēna pisa sanapen lala amon lelagaena e Yesu, pisa sanini, pisape

⁴⁰ “Ntewa þaryon la pano-o peraga, þisi na kila ga kilamarala la pimi pe kilamara þala, kila losinela la pimi mārera laa paþisi.

Pisi na kilamarala la taþatete si avisu ruru suria, po losinela la aninuluþar suria.

Visae pere, yoko la avilon la aþasuþe la aim pa panu rui, vena nekila ruru kiela malena la.”

Ais 6:10

⁴¹ Ana visena kiena Aisea nene pimi e naga, siraun naþa naga pisu naurarena kiena Navisaarena loyuña e Yuña Wa Mana ne Ntewa, a nanagane na tepisu sane pisayu ga Yesu lelaga, amio lala naþa e kiena pogosia. ⁴² Ana sa naþa visena la nene pisa, lala moki pe amlelaga re e Yesu poli, ana þasia amlelaga, pa tol mēna kiela nasumonena laþasia. Na nene naga po, ana sur taaga naga piowa, akilawan ke ga kiela nalelagaena, vanon amaraun Varasi lala, amaraun asape sa akoven plan la laea vetan kiela yumña na lotena. ⁴³ Kiela marauena nene, naga sane lala pe asitom re si nakilaena vena yoko Ntewa kekaran la vanonia, ana lala asitom ke ga keviu sane yar taþena ga la avisu la ve sanape.

⁴⁴ Ana Yesu pisawal pupia visena maro tai e maran kiena yeririna lala, pisape “Naga naþa mlelaga e inu, pe mlelaga re ga e inu poli, ana mlelaga e imimi lua naga naþa mligan inu nepimi, ⁴⁵ a naga naþa pisu nu ke, sa ga naþa pisu ke mēna naga. ⁴⁶ In na nepim e yomarava nini,

sane kana yomerarava, na kilaen yar ai naña lelaga e inu, yoko ve su re si e yemalolo. ⁴⁷⁻⁴⁸ Ana visae la p̄asia aloge kiau visena, ana pe amlogear re poli, pona visae la p̄asia akovenwanu amon logeen kiau navianena lala, la nene yoko akus kiela naliṗereena e legiena maro. E pogos nene, ve in re naña nesum̄alu neliṗere la, vanon in na pe nepimin re naliṗereen re yeririna na yomarava nini poli, nepimin natamaliaena. Ana sur naña liṗerela, nane kiau visena la naña nepisa ke pan la pogos naña nesike nemio la nagane narui. ⁴⁹ Kiau visena kilia kila sanini, vanon pogos naña nepisa plan ke visena la nene, in na pe nepis re ga e kiau kia in ga taaga poli, ana nepis ke e kia kiena ne Ata naña mligan inu nepitom tano. Naga ga pisa plan ruru pan inu sur la punu ga naña pe kiau na visaplanena, ⁵⁰ ana sanene, silaga in na nepisa ke sur punu ga naña Ata sinenan pisape nevisa. A kiena navisaluaena punu ga nene, nekilia sane malena wo naña pe luas re e poli, sike ga e lala.”

13

Peni na luas nen malena kiena Yesu, ana naga kevan lana ne kiena nalogena lala

¹ Nanagane na, sur la punu ga akila ruru pa rui, naña peni ga na pupia legiena naña Paṗagena na Sitom̄alen na Tamaliaena siaria. Ana Yesu pisu kilale ke pa rui sane kiena pog pimi ke narui, legiena ga na peni pe pog naña monar ligan si yomarava nini wasuṗe sina va puna ne arimana. Pimi tol pogos nene, e mrapa

la moki, naga kila po pañisi pan la naña puna naña asike pa e yomarava nini, sitom la pañisi, a nanagane pe pog na sitom laen va ve keviu laa sane, vano-o tol naña kiena malena kovio vanon la.

² Ana naga sike amio imimi kiena nalogena lala e yo ma metava, kila ke kana kinanena maro amio imimi. A Sutas naña nae Kariot ne, narina ne yermarua Saemon, naga mña sike ke amio imimi e pogos nene, naga sike amio kiena sitomena viowa na wilwlinwanen Yesu, komin naña Yermare mligan teke e kiena sitomena rui.

³ Ana mekinana mña pano-o ñisi na Yesu naga sitomveve ke sanape naña nanua sumo, petan ma puna Ntewa pitomi tano, a sanape na Ntewa mligan sur punu ga sike e limana, a sanape naña monar tauluia, siraunia naga kilia vetan si yomarava nini va sina puna.

⁴ Naga mloge pupia sineyeena e losinena vanon imimi kiena nalogena lala, sinenan sape kila kile tai e sineyeena nene van imimi, vena imimi mña ga mekilia mekila van imimi. Ana sumalu, pa miyenlua mña kulkota, pitavin tawol tai, ⁵ pio wii mñene pialo tai, kus pimi, siar kevan lamimi lala, kila naga sane pe yar na yumñae kiamimiena tai. Kevan mña lamimi la sanene pano-o, miyumuvan la e tawol naña pitavin ke ne, ⁶ pano-o pimi tol lana ne Saemon Pita. Ana Pita pisu mña naña naga pimi tolia, pisa pania, sape “?Suñe, yar nene? Ko na ope yerka wa, pe mesmes re naña ko na okevan lau sanene poli.”

⁷ Ana Yesu pisatam̃ea, sape “Pita, sur na nekila ke ne, nanagane na pe opisu kilale re poli wa. Ana siraunia, ko na okilia ovisu kilale ruru ga na wa.”

⁸ Ana Pita sinenan sape kilawo Yesu wa, sape “Peraga Suḡe, taḡatete ga netam̃an okevan lau.”

Ana Yesu pisape “Visae ve nekevan ruru ko re, pe kiau sur re tai teke e ko poli.”

⁹ Ana pogos naḡa Pita mloge nene, kiena sitomena pe taḡena narui, pisa pa Yesu sape “!Suḡe, visae ve sanene, netam̃an ga, sineun nesape okee inu, ane ve lau re ga, okee inu punu ga va tol m̃ena lum̃au lala amio ḡaruu!”

¹⁰ Ana Yesu pisatam̃e pa Pita e narin ḡakaiwa tai naḡa pisayu ḡelaga naḡa yaru mekiki e kiena mlamulena viowa lala. Naga sape “Yar naḡa kulu mare ga na wa, yepena punu ga merarava rui. Ana visae lana ve namname sina, ana taḡatete naga va kulu punu sina ga, yoko naga kevan ga lana. Ana nepisu sane amiu sanene narui. Amiu punu ga amerarava ruru pa rui, a amiu yar ga tai naga pe sa re nene poli, naga pe namname ga moḡa ga.” ¹¹ Ana Yesu pisa sanene, sape pe imimi punu re memerarava poli, vanon naga kilia pa rui imimi yar tai naḡa yoko ve yam ve piavi re na naga wilwilinwan naga.

¹² Ana Yesu kevan lana Pita amio imimi taḡena lala pano-o ḡisi, pa miyen sina ga m̃ana kulkota, totano piun tan imimi, pisape “?Amiu apisuluḡar ke yum̃aena naḡa nekila pan amiu ne, po peraga? ¹³ Sur nene naga sanini. Pogos naḡa amiu apio inu ke asape nepe Navianena

pona nepe Suře, amiu na apisa pe lelaga ga. ¹⁴ Ana visae apisu nađa inu kiamiu Navianena po kiamiu Suře nekevan lamiu, popon amiu mēna akekevan ke lamiu lala, amiu akilakila ŗelaga wo la sanene van amiu silaga. ¹⁵ In na nekila sanene pan amiu, vena amiu na yoko ataveve maran taaga e legiena la nađa pimi ke ne, nađa amiu ga akila si van amiu sane in na nekila pa pan amiu rui. ¹⁶ Nepisa pe lelaga pan amiu, sane yar na yumāena naga tařatete to metavan kiena yerkawa, po yar na waren visena naga ve to re metavan naga nađa mligan naga pano. ¹⁷ Ana visae amiu avisu sane kiau visena la nene pe lelaga, a visae amiu akila ke sur la nađa nepisa, yoko pupia navisa ruruena vim van amiu sirau.”

Yesu pisawal sape yoko Yutas wilwilin wan naga

Matiu 26:22-25; Mak 14:17-21; Luk 22:21-23

¹⁸ Ana Yesu pisape “Nepisa sanene, a pe nepisa amiu punu re poli, komin ita yar ga tai naga sike ne, nađa naga kiena sitomena pa pe tařena pa rui. Lelaga, in na nekilia ruru amiu punu ga nađa nekilologia amiu, ana nekilia nesape amiu yar tai yoko kila mesmes ga sa nađa Visena Wa pisawal nanua rui, nađa pisa sanini, sape *‘Naga nađa imimi lua makan pae kau kilaparavi, nanagane na naga tarlua pa lana rui vena vielua inu!’*

Yauena 41:9

¹⁹ “Sur nene naga piowa ga, ana nesape nevisawal van amiu sumo wa, ana pogos nađa avisu sina ga ve yam piavi re na, akilia alelaga asape

inu na lelaga, in na naga naña mon lue. ²⁰ Nepisa pe lelaga pan amiu, yar naña porworun yar na waren kiau visena naña nemligan naga pĩmasu, naga sa naña porworun inu ke ne, a naga naña porworun in sanene, naga sa naña porworun ke naga naña mligan inu nepimi.”

²¹ Yesu naga pisa pae visena nene pan imimi, ana siar mloge naña sinena pulen naurmiena lala, pano-o pisawal meraravan ga e maramimi, pisape “Lelaga nepisa pan amiu, yoko amiu yar tai wilwilinwan inu.”

²² Ana pogos naña naga pisa sanene, imimi memilania, mesuña metamaren imimi ke sina ga, memninue ga mesape naga pisa ke imimi a ne. ²³ Ana e pog nene, inu Yoane, sane nalogena naña Yesu sinena sii inu pañisi, inu netotano ke ga lavisin naga, ²⁴ pñisi na Saemon Pita kila limana pan inu, sape “Wolai, ko na oviunli ga tania, ovisave naga pisa ke ai.”

²⁵ Siraunia nepa la lavisin tekaki ga, nekian p̄aruu pa laa lavis puna ne Yesu, nepiunlili tania, nesape “?Suñe, ko opisa ke imimi ai?”

²⁶ Ana Yesu pisatañea, sape “Nepisa ke ga naga naña narin kinakina kilaparavi nene, nowuton vito e ñata pursi, ana nekian vania.” Ana naga kila sa ga naña naga pisa, mla kilaparavi tai, kian pito e ñamimi pursi, ana mlalua mla pan Sutas, narina ne yermarua Saemon nae Kariot. ²⁷ Pisi na Sutas mla kania, ana veraga ga, Yermare pimi pa loyũña e naga. Pisi na Yesu pisa pania, sape

“Pogaga, sur naña pe kionña nakilaena, oto vilaga okilalia wa.”

²⁸ Ana e imimi tañena la naña metotano ke e kinanena nene memio Yesu e pog nene, pe imimi yar ta kilia re poli, sane vanon ya ne Yesu pisa visena nene pan Sutas. ²⁹ Imimi ãasia asitom amape vanon Sutas naga pisuar ke kiamimi karo, ana Yesu miila vena va ul kamimi kinanena yo, pona va la kilavaru tai van la naña pe kiela sur re poli, pona sur tai ne sanene. ³⁰ Ana Sutas naga kilia ruru ga sur ya naña Yesu pisa ke pania, ana veraga ga sumãalu pa si vanua, naña sane yemalolo pa rui.

Navisaluena vii na sinesiena

Matiu 26:31-35; Mak 14:27-31; Luk 22:31-34

³¹ Ana pogos naña Sutas pa pae vanua, Yesu siar pian imimi ke sina ga e sur la moki. Naga pisa pan imimi, sape “Nanagane na pe pog na naurarena kiena ne Narin Yeririna vim kate, nanagane na pe pog naña yoko naga kila naurarena kiena ne Ntewa vim ve keviu laa sane. ³² Ana sur ya naña yoko naga yumãenia, kila kia kiena ne Ntewa va metava, siraun naga nene, ve ve viavi manene re, yoko Ntewa visirlua sina inu narina, kila mēna kiau kia va metava.

³³ “Naruu lala, narin aora ga teke na, naña nekilia nesike nemio amiu wa, lavis ga naña monar neligan amiu. Pogos naña amiu avisu in na nevetan amiu pae na, yoko asape akalenulia ko laa ne, ana sur naña nepisa pan yerkawa kiena ita le Yu tañena lala, nevisa mēna si van amiu, sane lele naña in na yoko neva

ea, amiu tařatete asiraunu aim e nanagane.

³⁴ Ana nanagane nesape nela si navisaluaena viu tai van amiu, sane amiu monar sinemiu sisii manene amiu, va laa sanene ve sa ga nařa sineu sii amiu. ³⁵ Ana visae sinemiu sisii amiu ke sanene, naga nene pe mrapa nakilaen yeririna nae yomarava la avisu kilia sane amiu ape kiau nalogena kemua la pe lelaga.”

³⁶ Yesu pisa pae pupia visena nene pan imimi narui, ana Saemon Pita sitořnal ke sina ga nařa Yesu sape ligan imimi, naga piunia sape “Ana Suře, ko na yoko okom pe?”

Ana Yesu pisatařnea, sape “In na nepa ke e lele tai nařa amiu tařatete asiraun inu aim e na wa, ana akilia ga aim e sirau.”

³⁷ Ana Pita mloge, piun sina ga, pisape “Suře, sanape in na tařatete neim nemio ko ke nanagane? In na nekekanan ga netařnan kiau malena vanon ko nanagane.”

³⁸ Ana Yesu pisa pania, sape “Ko opisa osape otařnan ga kiořna malena vanon inu? Pogaga, ana nevisa ve lelaga van ko, řane ga ne kole-malko, pogos nařa lakaporo ve kokoreko re wa, ana ko na oviro inu yam ve telu pa narui osape pe ope kiau re poli.”

14

Yesu mla visena na kila luřeluruřeena pan kiena nalogena lala vena ve aloge manene re viowa

¹ Ana Yesu pisa nařa imimi nalogena la memloge piowa nařa naga monar vetan imimi, řisi

na pisa pan imimi, sape “Amiu ve akila re naña sinemiu viowa manene sanene. Añasine Ntewa rui, ana monar awasine in mēna ga. ² Sa naña nepisa pa ãa rui, neva nekila ruru lelemiu metava ma puna ne kau Ata, ana metava ma mñana yuñã, lele moki sike ea torokin amiu punu ga. Visae ve ve lelaga re, ve nevisa re van amiu. ³ Neva nekila ruru lelemiu nene, ana siraunia, nowasuþe sina, netom tanon amiu, noure amiu avam punu, asulue ga amio inu e lele naña yoko nesike ea. ⁴ Ana mrapa naña na vaen tol lele naña nepa ke ea, amiu akilia pa rui.”

⁵ Ana Tomñas piun petania, pisape “Suþe, imimi memninue ga lele naña ko opisa ke osape ova ea, ana sanape ne yoko mekilia mrapa na vaen ea?”

⁶ Ana Yesu pisape “In na nepe purþes nen mrapa, in na nepe purþes nen lelagaena, in na nepe purþes nen malena. Pe yar re tai kilia va ma puna ne Ata sa ve kom re pun inu. ⁷ Visae amiu apisu kilale inu, asape in na nepe ai, naga sa ga naña apisu kilale mēna Ata. Ana nanagane, amiu apisu ke pa naga narui, sane siar na ne þane, amiu akilia naga ve lelaga.”

⁸ Ana Pilip piun petania, sape “Suþe, sur ne naga ke nene narui naña sinemiminia, mesape mevisu Arimata. Awis, sa ko na ovisa lologia li naga van imimi, yoko mekekarãan vaþisi.”

⁹ Ana Yesu pisatameãa, pisape “?Pilip, nesike nemio amiu tol kas via rui, ana ko pe opisu kilale ruru re in poli wa? Sa naña nepisa ke pa rui, yar naña pisu inu, naga sa naña pisu ke pa Ata narui. ?Ana sanape na ko opiun ke sina ga osape

nevisa lologia li Ata nae ma e peni van amiu?
¹⁰ ?Ko na omlelaga sane inu, in na e Ata, a Ata e inu, po ko na pe omlelaga re e poli? Visena la naña nepisa ke pan amiu la, pe sa re naña inu ga taaga ne nepis ke e kiau kia poli, ana Ata naña teke e inu naga kila ke kiena yumnaena la nene pimi þarpoyo e inu. ¹¹ Popon amiu alelaga e sur la naña nepisa, sane in na e Ata, a Ata na e inu. Visae ve alelaga re e inu vanon ga kiau visena la nene, monar alelaga ga vanon yumnaena la naña amiu apisu in na nekila ke pa rui.

¹² “Nepisa pe lelaga pan amiu, sane yar naña sa lelaga e inu, yoko naga mna kilia kila yumnaena la sane in na nemiyumnaen ke ne. Yoko neligan si yo neva si puna ne Ata, ana siraunia neligan Ninuna vitomi, ana naga kilia kila kile kerkeviu la sanene, taulu naña amiu apisu pa rui. ¹³ Nepisaar pan amiu, sane sur ya ne aviunia e kiau kia, yoko in na nekila ga van amiu. Yoko nekila ga ve sanene vam amiu, vena kilaen kia kiena ne Ata naga kilia va laa metava ve keviu likan amiu, e yumnaena la naña inu, sane narina, nemiyumnaenia. ¹⁴ Sanene na, sur ya naña aviun tan inu, yoko nekila van amiu.”

Yesu pisaar Ninuna Wa pan la

¹⁵ Ana Yesu pisa mna pan imimi, pisape “Visae amiu sinemiu sii inu pe lelaga, monar auarar ruru kiau navisaluaena lala. ¹⁶ Yoko in na ve nesu re si nemio amiu, ana yoko neviun tan Ata vena ligan yar taþena tai vim kus leleu vena iila amiu. Naga naña yoko imi, yoko sulue ga amio amiu, ¹⁷ naga pe Ninuna na visawalen

visena lelaga. Yeririna na yemalolo na yomarava nini tařatete atol naga, vanon tařatete akilia avisu kilale naga, pe akilia re nena, ana yoko amiu akilia ruru naga vanon naga ke narui nařa amio amiu nanagane, a yoko sike lue ga e amiu.

¹⁸ “Kiau nalogena lala, tařatete neligan kare amiu nařa asuřa sane ninuyu ga la poli. Peraga, yoko nowasuře si neimin amiu. ¹⁹ Narin aora teke ga wa, pe piavi re nena, yoko yeririna na yomarava nini tařatete avisu in sina. Ana amiu ga yoko avisu nařa in na nemal sina ga, ana vanon nařa nemal, amiu řena yoko amal. ²⁰ E legiena nene nařa avisunu nemal sina, amiu akilia sane in na e Ata, a amiu e inu, a in na e amiu. ²¹ Naga nařa sinena sii inu pe lelaga, naga pe naga nařa řuarar ruru kiau navisaluaena lala a mlogear la. Naga nařa sinena sii inu sanene, yoko Ata sinena siia, amio in řena sineu siia, nakekaten ke naga vena nekila naga kilia inu laa sane.”

²² Ana imimi nalogena tai, nařa Yutas tařena, pe naga re nařa nae Kariot poli, piun tan Yesu, sape “Ana Suře, osape oim okekaten imimi, ana yoko okila e mřapa na sanape nařa yoko yeririna tařena la nae yomarava tařatete avisu kilia?”

²³ Ana Yesu pisatařea, pisape “Visae yar sinena sii inu, yoko uarar ruru kiau visena lala, ana yoko Ata sinena sii naga. A yoko imimi lua meim puna, mekila řamimi uřa memio naga e kiena malena, ana yoko tařatete ve sanene va la nařa pe amlelaga re poli. ²⁴ Ana yar nařa pe sinena sii in re poli, naga tařatete logear ruru kiau visena lala. Naga nene navisatařeena na

kiamiu naviunena nene, ana e visena naþa amiu amloge ga nagane, pe pe kiau visena re nene poli, naga pe visena kiena ne Ata naþa mliganu nepitom e nini.”

²⁵ Ana Yesu pisape “Pogos naþa nesike nemio amiu wa, in na nepisa ke sur la moki sanini pan amiu rui. ²⁶ Ana pogos naþa sa nevano, yoko Ata ligan Ninuna na iilaena vitomi, ana naga yoko kus leleu, vian amiu e sur punu ga, ana ligan nasitoñalena e kiau visena la punu ga e kiamiu sitomena lala. ²⁷ In na nevano, ana neligan suñarena sike amio amiu. Suñarena kiau nene pe suñare nowo tai naþa yomarava nini taþatete la van amiu. Ve sanene na, ve akila re naþa sinemiu viowa manenea, a ve amaraun re sur lala. Amiu ve asitom manene re, ²⁸ kome monar ve sa ga naþa nepisa pa pan amiu rui, nesape in na neure kone wa, ana yoko neim si pun amiu. Pona amiu aloge viowa naþa nevano, ana visae sinemiu sii inu, popon amiu akekara manenea naþa nekilia neva sina puna ne Ata, naþa naga to laa metavan inu keviu paþisi.

²⁹ “Sur la punu ga nene pere wa, ana nanagane na nepisawal ruru pan amiu rui. Ana pogos naþa avisu imi mñalivi torokin nena ga sa naþa nepisa, ana þisi na akilia alelaga ga sane nepe lelaga.

³⁰ “A nanagane, taþatete nevisa si sur ve moki van amiu, vanon þarin suþe naþa pe þarin suþen ke yomarava nini nagane na, pimin inu ke pa rui. Ana yaru nene, puriukawaena kiena pe torokin re taulu kiau puriukawaena poli, ³¹ ana netañan inu ga e limana, monar nekila ga sur

ya naña Ata sinenan sape nekila. Nekila sanene, vena yeririna na yomarava nini avisuluñparia sane sineu sii la.

“Poga, kana pog narui, tesuñalu teva vanua.”

15

Yesu pe purþes nen kilka naña lelaga

¹ Ana e pog naña memial mepano, Yesu pisa ke sina ga visena þas pan imimi. Naga pisape “In na nepe purþes nen kilkerep naña lelaga, a Ata naga pe yar na visuaren lokove na kilika lala.

² Naga pisuar ruru ke korowasneu lala, visae visu korowas tai naña þar re mras poli, naga telua, a visae visu tai naña þar mrasa, yoko kilavan ruruia vena war si mras ve moki. ³ Sur nene nekila pan amiu rui, naña sane sur naña kilavan ruru amiu, naga kiau visena la naña nepisa ke pan amiu. ⁴ Amiu na korowasneu lala, monar ayakolkol ruru amiu e inu, a in na neyakolkol ruru nemio amiu. Visae korowas nen kilka ve yakol ruru re amio purþesia, taþatete war mrasa, a maran taaga ga amio amiu, visae ve ayakolkol ruru re amio inu, yoko kiamiu malena taþatete nena war mras napo lala.

⁵ “In na nepe purþes nen kilika, amiu na ape narin korowasneu lala. Naga naña sikol e inu a nesikol e naga, naga ke naña yoko kiena malena kilia war mras ve moki, vanon sa ve in re e amiu, taþatete nena akilia akila sur tai naña po e marana ne Ntewa. ⁶ Visae yar tai ve sikol re e inu, naga sane korowas tai naña pimi mano pa rui, atelua awar akoven va e kapi, kapi kekania.

⁷ Visae asu ruru ña e inu, a kiau visena to ruru

mã e amiu, sur ya naþa sinemiun asape aviunia, akilia atolia. ⁸ Popon amiu awar mras la ve moki e kiamiu malena lala, naga nene mesmesun kiau nalogena la asumã akila, a pe mrapa mēna nakilaen kia kiena ne Ata va manene laa metava. ⁹ Ata sinena sii inu paþisi, ana vanon naþa sinena sii inu, inu mēna sineu sii amiu, ana popon amiu asikol ruru amiu e kiau nasinesiena nene.

¹⁰ “Visae auarar ruru kiau navisaluaena lala, akilia asumã loyumuã e kiau nasinesiena nene, sa naþa in na nepuarar ruru ke pa rui navisaluaena kiena ne Ata, nesike pa loyumuã e kiena nasinesiena rui.

¹¹ “Ana sur la naþa nepisa ke pan amiu, nemla pan amiu vena kiau nakekarena sike amio amiu, kila pupia kekarena tai naþa po na po kilia sulue ga amio amiu silaga. ¹² A kiau navisaluaena maro tai nalaen van amiu sanini, sane amiu monar sinemiui sisii amiu lue ga, sa naþa in na sineu si amiu ke ne. ¹³ Pe sinesiena re si tai poli naþa po taulu na sinesiena naþa yar tai tamãan kiena malena, mare vena tamalia kiena erau tai. ¹⁴ Ana yoko in na nekilia nekila ve sa ga nene van amiu, vanon visae alelaga e kiau visena lala, yoko ave kiau erau la rui.

¹⁵ “Pe nepio amiu re sina nesape kam yar na yumuãe kiauena ga lala poli, vanon yar na yumuãena naga miyumuãe ga, pe kilia ruru re navisaarena na yumuãena kiena ne kiena suþe poli. Ana in na nepisu amiu ape kiau erau lala, vanon sur punu ga naþa nemloge Ata pisa pan inu, nepisawalia pimi merarava pan amiu.

¹⁶ Amiu pe apisa lologia in re poli asape nepe kiamiu, ana in na nepisa lologia amiu ape kiau, nepisirlar amiu vena ava awar mrasa e kiamiu malena lala, mras naña sulue ga sike na rui. Ana pogos naña ava ke sanene, sur ya naña aviun e kiau kia van Ata nae ma peni, yoko naga la ga van amiu. ¹⁷ Na nene kiau navisaluaena van amiu naga sanini, sane amiu monar sinemiu sisii amiu.”

Lala naña na yomarava nini yoko sinela kar nalogena kiena Yesu lala

¹⁸ A Yesu pisape “Visae yoko avisu sane yaru na yomarava la naña pe amlelaga re poli, sinela kar amiu, ve ailan manene re. Monar asitoñal ña naña lala na yomarava nini sinela kar inu sumo rui, ñisi na sinela kar mare amiu ñena ga ne. ¹⁹ Visae amiu ave sa ga yeririna na yomarava nini, yoko akekaran amiu ga, ana in na nekilologia amiu pa rui nesape aure vetan malena na yomarava nini. Kam na pe maran taaga re si sane kiena yar la poli, kila sane sinela kar amiu narui. ²⁰ Ana popon amiu asitoñal lue ga visena naña nepisa pan amiu rui, naña nesape yar na yuñena tañatete sukalawan kiena suñe. Visena nene kana kinasia sape sa ga naña akila piowa ga akila karenu, yoko akila viowa akila kare amiu ñena. Sa ga naña la pe amlogear re kiau visena la poli, yoko ve alogear re ñena kiamiu visena lala. ²¹ Pelaga viowa na sanene yoko akila van amiu vanon ga naña amiu ape

kiau, akila vanon pe akilia re naga naþa mligan inu nepitom tano.

²² “Visae ve neim nevisa meraravan re sur la nene e marala, yoko Ntewa visu sane lala pe akilaro re kiau visena poli. Ana nanagane na, amloge kiau visena la punu ga rui, ana taþatete avisawan si visena tai e kiela naviowaena naþa akila þarmarera van Ntewa. ²³ Lelaga, akila þarmarera pa Ntewa rui, vanon naþa apieluen inu, ana naga sa naþa apieluen mēna Ata. ²⁴ Visae ve kiau kile re la naþa apisu nekila, naþa pe yar re si tai naþa kilia kila, pona Ntewa yoko ve visa re sape naviowaena sike e la. Ana pere, apisu pa rui, ana pe amlelaga re ga poli, aþaryon nakilaen navielueena pan imimi lua Ata. ²⁵ Sur nene mesmesun ga visena tai naþa Ntewa mligan teke e Nasiriena Wa, naþa sape

‘Sinela kar nu paþisi, ana peraga, pe panon re kiau naviowaena tai poli.’ Yauena 35:19, 69:4

²⁶ “Ana nevisa van amiu, sane yoko neligan Ninuna na iilaena vetan Ata mava vitom mālavin amiu, naþa pe Ninuna naþa molue e malena kiena ne Ntewa, naþa pe Ninuna na visawalen nalelagaena. Naga vitom visawal inu re laa van amiu sane, ²⁷ ana siraunia, amiu mēna monar avisawal manene inu va laa sane van yar taþena lala. Na nene komin naþa amiu la nene asu lue ga amio inu silaga siar e nasiarena kiau yuñnaena pimi tol nanagane.”

16

¹ Ana Yesu pis mña ke pan imimi kiena nalogena lala wa, sape “Visena la nene, nepisa ke pan

amiu ve nauarar ruru amiuena, vena kiamiu viawaena ve lor re pogos tai.

² “Pe lelaga, monar akilia asape kieta yerkawa lala yoko akoven plan amiu vetan kieta yuñã nalotena lala, ana yoko viowa laa sane van amiu vano-o tol pogos naña sane sa awe moñar amiu, ana yoko la avisa asape nanene yuñãena wo tai nene, ana akila vena Ntewa kekarania. ³ Yoko la akilia akila ve sanene van amiu, komin pimi tol nagane pe akilia ruru re Ata nae ma e peni poli wa, a pe akilia ruru in re mña poli. ⁴ Ana siraunia, pogos naña avisu sur la ne imi kakate ke ve sanene van amiu, akilia asitomñal sina ga, ana yoko avisa asape ‘Lelaga ga o, nanagane na tepisu sur la nene sa ga naña Supe pisa pan ita nanua sumo ne.’ ”

Yesu pisa sape Ninuna Wa yoko iila la

Ana Yesu pisape “Sur la nene pe nepisa re pan amiu sumo poli, komin e pogos nene nesike nemio amiu wa. ⁵ Ana nepisa ga na wa van amiu komin yoko ve viavi re na, monar neligan amiu, neva sina puna ne naga naña sumo na mliganu nepitom. Nepisa lili mña sanene pan amiu rui, ana nepisu sane pe apiun manene re si lepas nene tan inu poli, asape nekom pe po neva e yo na sanape, ⁶ vanon pogos naña nepisawal nesape monar neligan amiu sa nene, amloge piowagan pañisi ne. ⁷ Ana peraga, monar ve sa ga nene. Nepisa pe lelaga pan amiu, po manene laa pan amiu naña nevetan amiu, komin naña visae ve neva re, yoko Ninuna na iilaena tařatete imi, ana sa nevano, yoko neila naga vitomin amiu.

⁸ Ana Ninuna nene, pogos naña vitomi, kila pupia yumãena tai e yeririna na yomarava nini, kila la asitom kilia pupia sitomena ãasia, tai e lepas na kiela mlamulena viowa, tai e lepas na kiau mesmesuena, a tai e lepas naliþereena kiena ne Ntewa pan la.

⁹ “Na sumo, Ninuna nene yoko kila la avisu kilia sane purþes nen kiela mlamulena viowa, naga kiela þelaga na yepela mavin vatanon inuena.

¹⁰ “Nalua, Ninuna nene yoko kila la avisu kilia sane in na pe nekila re suri viowa tai poli, nemesmes nenaga. Inu netorokin naña nekilia neva si metava puna ne Ata, ana yoko ve alual inu re sina.

¹¹ “Natelu, Ninuna nene yoko kila avisu kilia sane Ntewa kilia liþere la, sa ga naña mligan ruru pa naliþereena kiena suþe viowa naña pe þarun ke yomarava nini nanagane.

¹² “Sur la moki sike na wa naña nekilia nevisa van amiu, ana nepisu amiu amloge piowa sanene, taþatete nevisawal van amiu nanagane.

¹³ Ana pogaga, vanon sirau, pogos naña Ninuna na visawalen lelagaena vim pun amiu, yoko naga kilia sumon amiu, atol visena nalelagaena taþena la nene. Visena na lelagaena la naña naga vian amiunia, taþatete visa ga e kiena sitomena naga taaga, ana sur la naña loge ma e peni, naga ga nene visawal van amiu. Ana yoko kila sanene vano-o tol naña naga kilia vian amiu ruruia e lepas na sur la naña amolmolue e inu ve yam piavi re. ¹⁴⁻¹⁵ Naurarena la punu ga naña kiena ne Ata, pe kiau mēna, ana Ninuna war kiau

visena lelaga imi ligan ruru e kiamiu malena lala. E mrapa ne nanene yoko Ninuna naga kila mesmesun kiena yumãena, naña pe nayeluaren kiau kia.”

Pupia kekarena nawasuñeena kiena Yesu

¹⁶ Ana Yesu pisa mñaena pan imimi, pisape “Ve yam viavi re na, yam ve plas ga, ana yoko ve avisunu re sina, ana yoko ve yam viavi re sina, akilia avisunu sina ga.”

¹⁷ Ana imimi nalogena la memloge visena nene, mepisa lelein pan imimi mesape “Ita pe tekilia re nenaga sur la naña naga pisa ke ne. Nanua sumo ne, pisa ke sape wasuñe sina va su si amio arimana ma e peni, ana nanagane na sape yam ve viavi re na, tevisu re si naga, ñisi na yam ve viavi re na, tevisu sina ga. ¹⁸ ?A narin aora naña pisa ke ne, kana kinasia yara? !Pe tetol re nena kiena sitomena poli!”

¹⁹ Ana Yesu kilia sane sinemimin mesape meviun meraravan sur la nene tania, naga pisawal ñesania, pisape “?Pona amiu apiuyun ke sina ga pan amiu e lepas nen kiau visena lala yo?

²⁰ Pogaga, nevisa ve lelaga van amiu sanini, sane yoko amiu atagi, aloge viowagan ya naña yoko lala akila van inu, ana yoko yeririna tañena lala na yomarava akekarania, aloge won vañisi. Yoko sinemiu la ulen naloge viowaena vano-o, ana ñisi na, nemali sina ga vetan marena, ana avisu inu sina, a yoko kila kiamiu naloge viowaena nene vilonia imi ve nalogewoena. ²¹ Naga sa ga pogos naña sira mñeña, naña sa tol kana aora nena, mñeña laea naga monar loge viowagania vano

warlua. Ana pogos naña ãar pa na, pe sitoñal re si kiena naloge viowaena poli, ana naga pulen kekarena vanon kiena sisi tomtom naña paeme mare ga pimi yomarava.

²² “Ana ãisi na amiu ve sa ga nene narui. Nanagane na sinemiu la ulen nasineyeena keviu, ana siraunia in na neñalivin amiu si na, akilia akekara sina ga e pupia kekarena tai naña taãatete yar tai lalua sina ga vetan amiu pogos tai. ²³ Ana e pogos naña neimi neñalivin amiu, pona amiu asitom asape popon sa aviun sur ve moki vetan inu, ana taãatete ga, sur la nene pe naviunen re tan inu poli, akilia aviun mesmesun ga tan Ata ma e peni. Akilia aviun tania e ga e kiau kia, ana ãisi na naga kilia tañan van amiu. ²⁴ Pimi tol nanagane na, amiu pe apiun re sur e kiau kia poli, ana siar ga nanagane na, sa aviunia e kiau kia, ãisi na atolia, ana kila sinemiu ulen kekarena.

²⁵ “Pimi tol nanagane na, nepisa ke sur la pan amiu e ga e ãakaiwa, ana aora pimi ke narui naña ve nevisawan re si van amiu, nevisayu Ata ma e peni van amiu, nevisa plan meraravan sur punu ga van amiu. ²⁶ Ana e pogos nene, ve in re ga naña neviun ke sur lala van Ata vanon amiu, ana amiu ga akilia aviun mesmesun vania e kiau kia. ²⁷ Amiu akilia aviun mesmesun ga vania, vanon naga pisu amiu ke naña sinemiu sii inu, naga kilia ke naña amlelaga e inu sane nepetan ma puna nepitom tano e yomarava nini. Suri nene kila sinena sii amiu pañisi, kekaran ga na yagoganen kiamiu naviunena lala.

²⁸ “Ana e lepas na lele naña nepa ke ea, nekilia nevisa ga sa naña nepisa ga p̄isi ne, sa naña nepetan ma puna ne Ata nepitom e yomarava nini, ana p̄isi na nevetan si yomarava nini, nowasuḗe si ma uña puna.”

²⁹ Ana mepisatañea, mesape “!Suḗe, nanagane na ve ovisawan re si kioña visena e p̄akaiwa lala! Pogos naña opisa meraravan sur la sanene mepisu po paḗisi. ³⁰ Memloge kioña visena lala, mepisu kilia sane ko na okilia sur punu ga, pe kiamimi naviunena re si naviunena tan ko poli. Lelaga, nanagane na memlelaga m̄arera sane pe lelaga, ko na opetan Ntewa opitom e yo nini.”

³¹ Ana Yesu pisatañe la, sape “Ana yo. Pona amlelaga e inu pe lelaga? ³² Popon alelaga m̄arera, vanon aora naña nepisa ke ne, pimi ke narui, ana visae pere, pimi pa yo rui. E pogos nene, aḗm̄ene amiu aliureure amiu, po amiu awasuḗe amiu veve taaga sina e m̄amiu uña lala, taḗatete tai sike si amio inu, yoko inu ga taaga nesike. Ana nanene naga pogaga pan inu, vanon nekilia sane inu, pe in ga taaga re nesike poli, ana Ata na amio inu lue ga. ³³ Nepisa sanene pan amiu vena ve sinemiu kurkur re, a vena ve aloge re viowa. Pe lelaga naña kiamiu malena e yomarava nini, ulen ga naloge viowaena amio pog m̄arera, ana in na netaulu pa naviowaena na yomarava nini rui. E kiamiu malena la e inu, yoko alual luen ga sum̄arena wo.”

17

Pupia leniena kiena ne Yesu

¹ Ana pogos naþa Yesu pisa pa visena la nene, sape len va arimana. Kira pa metava ma e peni, pisape “Ata, nekilia sane nanagane na kiau pog na loge viowaena pimi narui. Awis, ovisuar inu naruãa, vena kiau kia ve vito re tano, ana va metava, yoko inu mña ga nekilia nevisirlua kioãa kia va metava. ² Nemlelaga sane ko na okila sanene, vanon omla pupia puriukawaena pan inu rui, vena neve suþen yeririna punu ga. Ana otamãan pan inu osape la naþa omligan la e limau, yoko nekilia netamãan malena naþa ve uro re pogos tai van la. ³ Ana mrapa na malena naþa ve uro re pogos tai naga sanini, naþa akilia ko, naþa ope Ntewa taaga ga naþa pe lelaga, amio mña inu Yesu Kristo naþa omligan inu nepitom. ⁴ In na nemligan ko nepitomin nakilaen kioãa kia ve keviu e yomarava nini, ana nemiyuãaen mña sur nene pano-o þisi, naþa lavis netaulu yumãaena la naþa sinoãan osape nekila. ⁵ Ana Ata, sineun nesape neviun sane sa nevaãasu nesuãalu si e maramãa, oliganu sina nemio ko ita lua teve suþen si naurarena nae ma e peni sa naþa tekila nanua pogos naþa tesii yomarava nini.”

Yesu mlenwo kiena nalogena lala

⁶ Ana Yesu mlen mña, sape “Ata, e lepas na lala na yomarava nini naþa ko okilologia la ape kioãa, ko na otamãan la panu, omligan la e lumãau, ana nekilia nevisa van ko nesape in na nepisayu ko pan la rui. Ana nanagane apuarar ke kioãa Visena Wa mñarera.

⁷ “Lala apisuluþar pa rui sane sur wo punu ga naþa sike e inu, ape sane kioṃa nalaena lala pan inu, ⁸ vanon kioṃa visena la naþa oþar pan inu, nepisalelein pan la, ana la atol punu pa rui, kila sane amlelaga ṃarera asape in na nomolue pun ko nepitom, ko na omiilanu.

⁹ “Nemlen pan ko nanagane, nomon nalenwoen yeririna punu ga na yomarava wetelu veraga ga, ana nesape nelenwo manene laa lala naþa otamān pan inu, komin apimi ape kioṃa rui. ¹⁰ La punu ga naþa ape kiau, ape kioṃa, a la punu ga naþa ape kioṃa, ape kiau, a lala naþa otamān la pan inu, ape purþes nen kiau naurarena.

¹¹ “Ana nanagane na pimi tol pog naþa nevaṃas si pun ko, naþa sane ve nesu re si e yomarava nini, ana kieta yeririna la nene asumāra ga. Ve sanene, Ata Wa, awis ovisuar la naþa otamān la pan inu, ouarar ruru la loyūṃa e mratava pun ita, vena akilia aim ave taaga, sa naþa ita lua tepe taaga. ¹² Pogos naþa nesuṃa nemio la, nepisuar ruru la, nepuar ruru la vatanon kioṃa kia. Nepisuar la pano-o la punu ga asu ruru ṃa amio inu, taaga ga naþa monar vetan inu, sa ga naþa Nasiriena Wa pisawalia, nane yar naþa pe sisi nakovioena.

¹³ “Lavisi ga nowasuþe puṃa narui, ana nesape nevisa plan visena la nene pogos naþa nesike e yomarava nini wa, vena kilaen sane pupia kekarena naþa teke e inu nanagane yoko kilia imi ve keviu ṃena van li taþena la nene.

¹⁴ In na nemla kioṃa visena pan la rui, ana

pogos naña yeririna tañena la na yomarava nini apisu la, sinela karla pañisi. Nanene komin apim sane pe ape na yomarava re si po laa rui, sa naña in na pe nepe nae re yomarava poli. ¹⁵ Ana nemlenin la pan ko, pe nepiun re nesape oure plan la vetan yomarava, nepiun nesape pogos naña asike yomarava wa, ko na yoko ovisuar ruru la, vena yar viowa nene ve kila kare la re. ¹⁶ Awis ovisuar ruru la, komin la na sa ga inu, imimi mepe wolawa ga lala na yomarava nini. ¹⁷ Nemlen mña sane ovian kioma visena na lelagaena van la, vena yawawo kiela malena lala aim ave wa, ave kioma ga ko ga taaga. ¹⁸ Nemlen wo la sanene, komin sa ga naña ko na omliganu nepim e yomarava nini, ñisi na in mña nemligan la ke avava sanene ea. ¹⁹ Nemiawawo kiau malena wetelu pan ko vanon la, vena ñisi na lala mña ayawawo kiela malena lala van ko ve lelaga.”

Yesu mlenwo li nalelagaena lala

²⁰ Ana Yesu mlen mña, pisape “Ata, nemlen ke pan ko, pe nemlen wo re ga la nene poli, nemlen wo mña lala tañena naña alelaga e inu vanon kiela visena la naña pisayu inu. ²¹ Nemie awis pan ko Ata, sane la punu ga nene aim ave taaga, maran taaga sane ita lua. Ko, ko na e inu, a inu na e ko, ana lala mña monar e ita, vena yomarava wetelu kilia lelaga sape in na nemolue puna, ko na omiilanu nepitom tano. ²² Pupia naurarena naña omla pan inu, nemla pan la, ñisi na lala akilia aim ave taaga, sa naña ita lua tepe taaga. ²³ Ko na e inu, a in na e la, ñisi na akilia

aim ave taaga e sur la punu ga, ana pogos naña yeririna na yomarava la avisuia, akilia sane pe lelaga ga, ko ga naña omliganu nepitom, akilia sane sinemã sii la keviu sa naña sinemã sii inu.

²⁴ “Nanagane Ata, nepis maro sanene, sineun pañisi nesape la naña otañan panu, yoko sirau akilia amio inu ma e leleta. Sineun nesape amionu vena akilia avisuveve pupia kiau naurarena nene, naña ko na omila panu nanua sumo e nasiiena na yomarava nini, vanon ko na sinemã sii inu pañisi. ²⁵ Ata, ko na ope wa a omesmes, ana yeririna tañena la na yomarava nini pe akilia ko re poli, ana in na nekilia ruru ko lue ga. Nekila sane nanagane na kiau nalogena lala akilia sane in na nepetan ko, ko na omligan inu nepimi. ²⁶ In na nekila sane nanagane na, lala moki akilia ruru kiomã ðelaga wo rui, ana yoko nekila va laa sane na wa, vena pupia sinesiena naña sinemã sii inu ea kilia sike e la, a vena inu mñena nemio la lue ga.”

Ana leniena kiena Yesu pan arimana maro ga e nene.

18

Atarar Yesu m̃arera

Matiu 26:47-56; Mak 14:43-50; Luk 22:47-53

¹ Yesu pisa plan visena la nene, mlen pae na, ðisi na sumãlu sumon imimi nalogena la mepetan si Yerusalem, memial ga kolemalo mepito tano e ðalu naña Kitaron lepas na vano. Memial mepa metol narin los nen purolip lala naña Yesu pa lue ga ea yam moki m̃a rui, ana mesu li m̃a yam plas ga ea.

² Lele nene na, Yutas taveve imimi memio Yesu mesuñña mepa ke ea nene yam moki rui, a naga kilia sape e pogos nene, imimi memio Yesu mesike e nene yo. Sanene na e pogos nene, naga pa pa sumo narui pisawal Yesu pan yar keviu la, ana la amiila kiela yar ñasia asiraunia, ana naga sumon la apim e lele nene vanon Yesu. ³ La naña yerkawa kiena ne yar wa lala amio Varasi la amiila la, la nanene na ñegas na mara nae Rom tai, amio ñegas na yar na kiravawoen Yumña Wa lala. Ana amial ke apimi amio kapi vivaga lala, amio kiela sur na mara lala. ⁴ Apimi asape atarar Yesu, ana naga kilia ruru pa ñisi rui sur la naña yoko vim katenia, a pogos naña pisu la pe milan re poli, pa ga naña pitawe la, pis pan la, piunia sape “?E, amiu akale ke ai?”

⁵ Ana la naña asuñal ga asuñña amio Yutas, yar na wilwilinwanen Yesu, ana apisatañña, asape “Imimi makale ke yar naña Yesu, nae Nasaret.”

Yesu pisatañña la, pisape “Naga naña apisa ke ne, in ke narui.” ⁶ Ana pogos naña Yesu pisa visena nene pan la, amilania naña kila la apuresula veraga, amloloru kar ga lala e porotano.

⁷ Ana yam si tai Yesu piun ke sina ga tan la, sape “?Amiu avisali sina ga, akale ke ai?”

Pisi na apisa ke sina ga, asape “Makale ke Yesu naña nae Nasaret.”

⁸ Ana Yesu pisape “Sa naña nepisa pa rui, in ke nanini narui. Ana visae amiu apimin inu ga taaga, popon atañan kiau la tañena nini akilia ava ga sanene, ve atol la re.”

⁹ Naga pisa sanene pan la, kila kiena visena tai pimi pe lelaga, naña pisalua mare ga e kiena leniena pan arimana, naña pisa sanini, sape “E la naña otamñan pan inu, pe nekila pal re tai poli.”

¹⁰ Asumña ga sanene, ana memilan ga naña Saemon Pita þarlua kiena playu na mara, mligan mñene þarin yar tai kiena þarin yar wa lala, ana tetereria ga, telua kiligan yar nene lepas na þamarua. Yaru nene kiena kia Malkus.

¹¹ Ana Yesu pisa pa Pita, pisape “Pita, osuan ruru si kionña playu vito si e kana pias nen paos nena. ?Sanape, pe sinomñan re nowar ro e pog mñarera na loge viowaena naña Ata nae ma e peni mla pan inu? Peraga, monar nowar ro e naña!”

¹² Yesu pisa sa nene, þisi na yar na mara la, amio kiela na sumonena, amio nakiravawoena la na Yunña Wa, apim atarar Yesu, apiar ruru limana luwoka, aþure apano.

Aþure Yesu pa e yo kiena Parin Yaru Wa

¹³ Ana aþure Yesu pano, apa atol kove kiena ne Parin Yaru Wa, ana suri na sumo naña akila, aþure Yesu pa tol yo puna ne yermarua nene Anas. Anas nene naña sumo na naga pe Parin Yaru Wa, ana naga sike e yo nene wa amio Parin Yaru Wa viu, komin Parin Yaru Wa viu nene naga talopa amio narina naña sira. ¹⁴ Yaru nene kiena kia Kaeþas, a naga naña nanua sumo, pisawal mrapa tai pan li nasumonena kiena le Yu lala. Naga sape visae avisu sane monar awemñar yar ve taaga vena tamaliaen malena kiena yeririna

la ve moki, naga kilia tañan van la vena akila ve sanene na woga ga.

Navisawan p̄esanena kiena ne Pita e Yesu

Matiu 26:69-70; Mak 14:66-68; Luk 22:55-57

¹⁵ Sanene na aṗure Yesu apa e lepas naṗa Anas sike ea, ana e pogos nene, imimi lua Saemon Pita mesiraun la. Inu nemio yermarua Parin Yar Wa na sumo nene, imimi lua mepe erau, ṗisi na atañan inu nepa loyuña siraun Yesu, ana apisalup̄ar Pita asape taṗatete imi loyuña.

¹⁶ Asape naga monar suñalu ga suña e mratava vanua, ana pogos naṗa nepisu sanene, neṗasuṗe si nepa nepis pan sira m̄ee na yuñaeana kiena yar keviu nene tai, naṗa suñal sike e mratava. Ṗisi na sira nene tañan sape nekilia noure m̄ena Pita imi loyuña. ¹⁷ Ana pogos naṗa Pita pimi ke loyuña, sira naṗa pisuia ana piun tania, sape “?Ana ko m̄ena nalogena tai kiena ne yar nene, ne?”

Pita mloge, ṗisi na miila, pisatañe kotalia ga, sape “E, peraga.”

¹⁸ Pisi na Pita pisu yar na yuñaeana la amio nakiravawoen lala akila kap tai na kilamemego, asuñal asuvivia ategania, ana naga pa lavisin la, naga m̄ena tegania.

Parin Yar Wa na sumo nene Anas piun naviunena la pa Yesu

Matiu 26:59-66; Mak 14:56-64; Luk 22:66-71

¹⁹ Amligan Yesu suñal e marana ne yermarua Parin Yar Wa na sumo nene Anas, ana naga piun sur la moki petania. Naga piun tan Yesu sanape e nalogena la naṗa amlelaga ke e naga, a

piun m̃ena e lepas navianena la naḡa pianlania.
²⁰ Ana Yesu pe pisa re sur mok pan poli, ana pisa ruru ga pania sape “Sur la naḡa nepian la ke ea, in na pe nekila vinaun re poli, ana nepisa plan ke ga e yometava merarava pan yeririna punu ga. Nepian lue ga kieta le Yu lala e yuḡa na lotuena, pona e Yuḡa Wa, ana lala moki amiyagogan inu silaga. ²¹ ?Ve sanene na, komin ya ne opiun tan inu, osape nepian la sanape? Visae sinom̃an osape okilia, popon oviun tan la naḡa amiyagogan inu lue ga. Lala akilia ruru ga ne.”

²² Ana pogos naḡa Yesu pisa visena nene, yar na kiravawoen tai naḡa suḡal m̃a lavis puna, mloge sane Yesu pisa kare ke yerkawa nene, ḡisi na mlipa Yesu, pis pania, sape “Ei, ositom osape po ne opisataḡe kieta yar wa e visena na sanene? !Ovisuar ko!”

²³ Pisi na Yesu pisataḡe pania, pisape “Ositomveve ruru li kiau visena. Visae nepisokan, popon ovisawal e maran yeririna la nene, okilia ovisave nepisokan sanape. Ana visae pe nepisa re sur tai naḡa piowa poli, vanon ya ne omlipa inu?”

²⁴ Ana ḡisin nanene aḡure Yesu, naḡa limana la apiar ruru ga sike ga wa, amligan lepas nene puna ne yermarua Anas, aḡure apa e kumali kiena ḡarin Yaru Wa Kaep̃as, vena naga kila kotena vania.

*Navisawanen na lua kiena Pita pa kiena Suḡe
 Matiu 26:71-75; Mak 14:69-72; Luk 22:58-62*

²⁵ Ana Saemon Pita suḡal suḡa amio la naḡa asike atega ke kapi wa, ana la apisu kilia li m̃a

naga, apiun asape “?Sanape, pona ko m̃ena ope nalogena kiena ne yaru nene tai?”

Ana naga pisawoia, sape “Peraga, in na pe nepe kiena re poli.”

²⁶ Pita pisatam̃e sanene, ana lala yar tai naña asum̃al asike ne, naga pe yar tai na yum̃aena kiena ne Parin Yar Wa, naña naga pe namratava tai puna ne naga naña Pita telua kiligana kom̃asa. Ana naga m̃areran manene laa sane naviunen si tan Pita, sape “?Ko na pe ope kiena re poli yo, ana in na nesitom sane nepisu ko amio naga gare pun purolip la rui?”

²⁷ Ana Pita pisaluþar m̃arera sina, piro yam telun narui sape pe kilia re Yesu poli, ana e nena e aora nene, amloge lakaporo kokoreko.

Aþure Yesu pa sum̃alu e marana ne yerkawa nae Rom nene, Paelat

Matiu 27:1-2,11-14; Mak 15:1-5; Luk 23:1-5

²⁸ Ana kolulag wa ke ga wa, pe yo-merarava ruru re poli wa, ana Kaeþas pisi pa Yesu pano þisi, ana aþure si naga apetan yo nene, apa e pulkumali kiena ne Paelat, pupia yar keviu nene naña le Rom la apisirlua naga sum̃alu ve suþen purvanua kiena ne le Yu lala.

Ana pogos naña apim lavisin kiena pulkumali, nasumonena kiena ne le Yu lala asitom̃al asape amlon yum̃a nene, sane visae ava loyum̃a ea þisi na kila la aim sane ve ayekiki re sina e marana ne Ntewa, taþatete ayakol e kinanena na Paþagena na Sitom̃alen na Tamaliaena. Sanene, vanon sur nene, aþure Yesu apim asum̃alu ga asu vanua, pe apa re loyum̃a poli.

²⁹ Pisi na apisawal pan Paelat, ana naga pimi pisu la vanua, piun tan la, sape “Pogaga, ana amiu avisawal li sane yaru nene kila ya ne piowa, nane aþure pimi suñal sike e marau kolulag wa ke sanene.”

³⁰ Ana apisatamea, asape “Yerkawa, mekilia mevisa van ko sane yar nene, pe yar na kilaen ve woweena þisa! Visae peraga na, taþatete moure imi pun ko.”

³¹ Ana Paelat pisape “Visae sanene, amiu ga akilia ava ala nakoena ya naþa mesmesun kiamiu navisaluaena vania.”

Ana nasumonena kiena le Yu la apisa pania, asape “E kiamimi navisaluaena, mekilia meliþere naga sape akove moñar naga, ana nanagane na navisaluaena nae Rom pisawo imimi sina, sape ve mekila re ve sanene. Ko ga taaga, yar keviu kiena ne þarin suþe na e Rom, okilia okila, okilia otamñan osape ala nakoena na marena vania ma e laki torovia.”

³² Ana pogos naþa apisa visena nene pa Paelat, la amninue ga, ana la akila ke visena kiena Yesu tai nanua sumo pimi pe lelaga. Nanene komin naga pisawal pa kiena marena rui, pisayu ruru mesmesun nena ya naþa le Rom la akila ke, naþa awarear yaru pa e laki torovia.

³³ Ana Paelat sinenan sape vis towe re amio Yesu lalua ga, pa si loyumiña e kiena kumali, pio Yesu sape va puna. A lala akila Yesu pa loyumiña, Paelat piun petania, sape “Sineun nesape ovisa ruru van inu. ?Ko na Þarin Suþe kiena le Yu la lelaga, po pere?”

34 Ana Yesu pe pisatam̃ea mesmes re pan poli, ana naga pisatam̃ea e naviunena tai, sape “? Kiom̃a naviunena nene, opiun ruru ga ne, pona opiun ke pan inu vanon ya naṣa omloge lala taṣena nene apisalele kare in ke ea?”

35 Pisi na Paelat pisatam̃ea, pisape “Aulai, nemninue ga amiu le Yu lala, in na pe amiu re tai poli. Nekilia ga sane kiamiu yeririna lala amio yar keviu kiena kiamiu yar wa lala, aṣure ko opimi vena neliṣere ko. Sanene na, nesape nekilia ga nesape omiyum̃aen ya ne naṣa la apisu pe mesmesu re poli?”

36 Ana Yesu pisatam̃ea, sape “Sinelan asape oliṣere inu, vanon la pe sinelan re neve suṣen la poli. Ana kiau nasuṣenena pe sa re nasuṣenena na yomarava nini poli. Kiau yeririna lala pe akila re mara amio la naṣa apimi atararnu rui, vena ve neva re e limana ne kiamimi li kawa le Yu la. Imimi pe mepe yaru na kilaen re mara sanene poli, vanon kiau nasuṣenena pe pe na yomarava re nini poli.”

37 Ana Paelat pis pania, pisape “?A, ana nemloge opisayu ke kiom̃a nasuṣenena, sane ko na ope ṣarin suṣe pa tai rui, po peraga?”

Ana Yesu pisape “Nagane e! Otol ruru pa ṣisi ne, sane opisa ne. In na nepim e yomarava nini, nepaeme ea, vanon sur ga nene, a nepimi vena nevisawal sur na lelaga lala van kiena yeririna lala. Yar naṣa suṣalu se e lepas na lelagaena, yoko yagogon ruru kiau visena lala.”

38 Pisi na Paelat piun ke sina ga petania, sape “Ana ane kilia, nalelagaena naga ya ne?”

Paelat sinenan sape tañan ga Yesu va si sanene

Matiu 27:15-31; Mak 15:6-20; Luk 23:13-25

Ana pogos naña Paelat pisa pa visena nene, suñalu pa sina ga vanua, pisawal pan le Yu la naña asuñalu asike vanua, sape “Yar nañane, nepisuveve pa naga rui, pe nemal re nenaga narin sur tai piowa teke e naga. Popon sane naga va sina ga ve sa ga nene. ³⁹ Ana visae amiu asitomal ke e kas punu ga, e pãpãgena la nene, nepure ke amiu yar tai naña sike e yumã nakoena, netañan naga imi si pun amiu ve sa ga nene. Ana nepisu sane e kas nini na, popon sa netañan yar nene, kiamiu Parin Supe amiu le Yu lala, iñasu pun amiu sa ga nene.”

⁴⁰ Naga pisa sanene, ana la pe akekaran re poli, apion m̃arera, asape “Pere, peraga, pe sinemimin re yaru nene poli. Otañan tañena nene Panañas imi van imimi sina.” Panañas nene naña asape, naga pe le Yu tai naña sumo naga pepeyu pa le Rom lala.

19

Paelat tañan sape awe Yesu

¹ Ana Paelat sitom ke sape kila Yesu molue sina ga, ana yerka kiena ne le Yu lala añareran naña apisalupãria. Ana Paelat sinenan sape kila suri tai naña akekaran naga vanonia, ana pisape kiena yar na mara lala awe li naga sumo wa. ² Pisi na yaru na mara la aPURE naga pano, aPãr nonos nen kilsirili, aPãn ruruia, amiyen te pãrina, sane karo na pãrin yar keviu tai. Ana

aþar pupia kulkota wo tai naþa memaena sane kulkota mana ne þarin suþe, amiyen ea. ³ Ana la peve taaga apivim ke lavisinia, apisa kare ke naga, asape “!Parin suþe kiena le Yu lala, o! !Mepatanon ko!” Apisa visena nene pania, amlilipa ke marana.

⁴ Ana siraunia, Paelat pa sina molue puna li kerkeviu kiena le Yu la naþa asunal asike vanua wa, pisawal pan la, sape “Pogaga, nanagane na sineun nesape amiu avisuluþar naþa nenal re sane yar nene, pe naviowaena tai to re e naga poli, ana nanagane neligan si inasu van amiu.”

⁵ Naga pisa pa sanene, þisi na Yesu pimi vanua, sunal se marala, þarar karo na nonos nen kilsirili e þarina, amio kulkota naþa amiyen ea. Ana Paelat pisa pan le Yu la, sape “!Nagane, kiamiu yerkawa ne nanene!”

⁶ Ana li kawa kiena ne yar wa lala, amio li nakirawoena lala na Yuma Wa, pogos naþa apisuluþar sur naþa Paelat sape kila, pe akekaran re nena poli, apion ke, asape “!Awear mare e lak torovia! Awear mare e lak torovia!”

Ana Paelat taþatete taulu la narui, þisi na tanan ga, sape “Pogaga, e nakiravaena kiau, yar nene pe kila re nena napiowaena tai poli, ana visae amiu sinemiunia, amiu ga aure naga, ava awear naga e lak torovia.”

⁷ Ana pogos naþa amloge, pe akekara re poli, asape “Peraga yo! Okilia rui osape taþatete mekila ve sanene. Ana lelaga, popon yar nene mare, vanon naga kilaro kiamimi navisaluaena. Naga miyeluar ke naga pa lue ga metava, sape

naga pe narina ne Ntewa. Ana ko ga narui okilia okila mare.”

⁸ Ana pogos naña Paelat mloge visena nene, pupia maraüena tai pan si naga, sitomveve ke sina ga sape Yesu naga pe yar na sanape, ⁹ ãisi na pa si loyuma e kiena kumali, pisape Yesu imi, piun tania, sape “?Ko, kioma yo wawa nape?”

Naga piunia, ana Yesu pis re poli, pe pisa re sur tai pan poli.

¹⁰ Pisi na Paelat sape “Ei, ve ovis re sanene, ko ga okila kare ko ke si ne. Popon ovisa sur tai van inu, vanon in ke narui, teke e inu nakilaen sur ya naña sineun nesape nekila van ko. Visae sineun nesape omolue sina ga ve sanene, nekilia nekila, pona visae sineun nesape omare e laki torovia, nekilia nekila. ?Ko okilia ma sur nene yo?”

¹¹ Ana Yesu naga pis narui, pisa-tamea, sape “? Pona sanene yo, ana a ne tamãan sur nene pan ko sape okila ve sanene? Visae Yar Keviu na mava ve tamãan re van ko, ko na taãatete okila sur tai van inu. Visae ovisa osape nemare, na nene kioma napiowaena tai narui, ana naga naña mligan inu e lumoma, naga kila piowa manene laa, nanene kiena pupia mlamulena viowa tai nene.”

¹² Ana pogos naña Paelat mloge Yesu pis sanene, naga ãaryo mareran ke sinenan sape ligãan Yesu va sina ga, ana li kawa lala kiena le Yu la apion sina ga, asape “Yar nene miyeluar ke naga pa metava, sape pe ãarin suãe tai, sinenan sape kila naga to metavan kioma yerkawa nene Parin Suãe Sisa. Sanene na, visae ko oligan va ga sanene, okila ke yumaena tai naña ãisi na Sisa ve

kekaran re, yoko kovenlua ko e kioñña yuññaena nene.”

¹³ Apisa sanene, kila Paelat kiena sitomena peve lua sina ga, ñisi na kila appure Yesu molue pulkumali pimi vanua. A ñisi na pa totano metava e kiena lele na naliñereena, naña apio asape Kilavaru Yotop, naña le Yu la apio asape Kapata. ¹⁴ Ana e pogos nene, pimi tol kolpae rui, nanene e legiena na kilaruruen sur punu ga na legiena na peni naña pe pupia legiena na Pañagena na Sitoñalen na Tamaliaena.

Ana Paelat totano ke pa metava rui, kiiar Yesu e marana ne yerkawa kiena ne le Yu lala naña asumal asike tano ne, sape “!Naga ke narui, pe pupia kiamiu ñarin suñe!”

¹⁵ Ana la amon ga, añañagawoia keviu, asape “!Aurelua vano! !Asuar metava e lak torovia, awemñaria!”

Ñisi na Paelat pisatañe pan la, sape “!Ke! ? Sanape, amiu sinemiun asape nekila awemñar kiamiu ñarin suñe nene?”

Ñisi na li kawa kiena yar wa lala apisatañea, asape “?Ane pisa sape naga pe kiamimi ñarin suñe? Yar keviu Sisa naga taaga pe kiamimi ñarin suñe.”

¹⁶ Pogos naña Paelat pisa añarera laa sanene, ñisi na naga tañan ga Yesu pan la narui, mligan naga e limala vena asuar e laki torovia, sa ga naña la sinelania.

Asuar Yesu e lak torovia

Matiu 27:32-50; Mak 15:21-37; Luk 23:26-46

¹⁷ Paelat mligan Yesu e limala, ñisi na appurelua naga pano. Pogos naña apa ke narui, akila

naña Yesu kus ke sina ga kiena lak torovia, ana la asumonia apa atol narin kunus naña kana kilavaru ne sane puriu na þarin yaru, naña apio e visena nae Epru, Kolkota. ¹⁸ E yo ne nanene narui asuar Yesu e laki torovia, amio mña yar la lua, tai e leþas komþasia, a tai e leþas komþasia, a naga mon ga likan lalua.

¹⁹ Ana visena kiena Paelat tai, naga sape yoko asiria visena tai, asuar e lak torovia metavan þar Yesu, naña sape “Yesu nae Nasaret, Þarin Suþe kiena ne le Yu lala.” ²⁰ Visena nene asiri e visena la telu, Epru naña kiena le Yu lala, Latin kiena le Rom lala, a Krik kiena le Kris lala, amñar mon metava e lak torovia kiena Yesu. Yo naña lak torovia nene sike ea, lavisin ga pulkumali, ana yeririna la naña amial ke aþaro e yo nene apisu visena nene apuloia. ²¹ Ana yar keviu kiena yar wa kiena ne le Yu lala pe akeþaran re visena nene poli. Apisawal pa Paelat, asape “Yerkawa, ko na opisa osape asiri sanene sape ‘Þarin Suþe kiena le Yu lala,’ ko opisa pe memes manene re poli. Sinemimin mesape avilopu sina, asiri ve sanini, avisave ‘Nanene, pisa sape naga pe Þarin Suþe kiena le Yu lala.’ ”

²² Ana Paelat pe sinenan re poli, sinenan sape toña ga ve sa naña pisa, þisi na pisa memes ga pan la, sape “Sur naña nesiria, nesiri pa narui.”

Yar na mara la amliureure kulmrae mña ne Yesu e la

²³ Li na mara la amñar Yesu amio la lua nene e kiela laki torovia lala, þisi na apa ruru la. Yar na mara la nene la vari, ana aþarar kulmrae mña ne Yesu, apisayuia, asape aliureure e la

þegas ve vari, tai kiena yar tai, tai kiena yar tai, sanene. Amlioreure m̃a sanene pano-o, tol pupia kulkota m̃ana ne Yesu, ana amon vitol wowaena e lepas ve vari, vanon kulkota nene pe kana lele na yakolen re poli, amiyum̃aen ga e pupia kinas nen kulmrae taaga. ²⁴ Vanon sanene, apisasa si pan la, asape “Piowa naþa tevitól kare kulkota nene, yoko telili ga m̃apilania.”

Ana la amninue ga, akila ke ga mesmesun visena na yauena tai e Tus na Yauena Wa Lala na susumo rui. Visena nene pisa sanini, sape *“Amlioreure m̃au kulmrae lala e la, amlil m̃apila vanon m̃au kulkota.”* *Yauena 22:18*

Visena nene pisa sanene, mesmesun ga ya naþa li na mara la akila.

Yesu pis pa anena

²⁵ Yesu tamalele m̃eke pa metava e kiena laki torovia sanene, ana e la naþa asuñal asike lavisin apisu ke e pogos nene, sira la vari. La nene, anena Yesu, amio anena na ve tokak tai, amio Maria naþa wona na yerm̃ene kiena kia Klopas, amio Maria nae Maktala. ²⁶ Ana Yesu kira pito tano, pisu anena, pisu inu m̃ena, naþa sane imimi lua mepe puruvi, nesuñal nesike lavisinia, ana pisayu inu pan anena, sape “Sira marua, naga nene na pe narum̃a narui.” ²⁷ A pis m̃ena pan inu, sape “Naga nene pe anom̃a narui.”

Ana siar e pogos nene nepure sira marua nene pam momalio ke um̃a m̃au, nepisuar ruru naga sane pe aneu.

Yesu mare

28 Yesu mloge ke piowa metava e lak torovia pano-o pisuluřar sane kiena yuũaena punu ga řisi narui, řisi na pisawalia sape “In na moto karnu.” Nanene pe kiena visena si tai nařa pisa ana kila visena tai na Tus na Yauena Wa Lala pimi pe lelaga.

29 Ana pogos nařa amloge sape moto karia, amla lumlum, aputon e mřala kuruta na munen tai nařa mřeke e pialo tai, amiyurar e laki tai, akian pa metava tol gona ne Yesu. 30 Akian pae, ana kuruta na munena nene kee pa gona řisi, ana pisawal visena tai, sape “Pisi narui.” Ana pogos nařa pisa pae visena nene, telan řarina pito tano, tařan ninuna pano, pure maron kiena yalua, mare.

Amiyurře mrařanena ne Yesu

31 Pogos nařa Yesu mare, naga kolpae e legiena na kilaruruen sur punu ga na Pařagena na Sitorřalen na Tamaliaena. Sanene, legiena na peni, naga pe pupia legiena na řařagena nene, ana e legiena nene, tařatete atol tas nen yar mare. Nanene kila sane yar keviu kiena le Yu lala sinelan asape monar akus plan tas nen la telu nene sumon nařa mrae vato tano. Ana amaraun mřena asape sa řisi la telu nene pe amare ruru re poli wa, řisi na amligan visena pa puna ne Paelat, apiunia asape aweroro lala lala vena amare vilaga. 32 Pisi na Paelat tařania, ana kiena yar na mara la apa ařero lan naga nařa asuar e lak torovia lepas tai, řisi na akila pan tařena. 33 Pisi na apanon vena akila mřena

va Yesu, ana apisu naña naga marþantop pa rui, ana pe akila re si pan poli.

³⁴ Ana lala yar na mara tai kus kiena kalie, miyurþe mrañanena ne Yesu, susun pano-o apisu pupia kuruta amio wii pinin molue pito tano. ³⁵ Ana sur nene pe lelaga kemua paþisi, vanon nepisu e kilamarau, nekilia nesape pe lelaga, þisi na nesape nevisawal van amiu, vena amiu mēna alelaga ea asape sur nene pe lelaga ga. ³⁶ Sur la nene molmolue sanene vena kilaen visena la na Nasiriena Wa na susumo la aim ve lelaga ga. Visena tai naña pisa sanini, pisape
“Pe puriu na yepena re nena tai poli naña yoko worovia,”
Yauena 34:20

³⁷ a taþena pisape

“Amiyur kare naga, þisi narui na asun avisusu mā naga.”
Sek 12:10

Ana þelaga na marena kiena ne Yesu naga sa ga naña visena la nene apisawal na konua konua rui.

Amligan tasnena ne Yesu e kana puluve

³⁸ Pisi na pupia yerkawa kiena ne le Yu la tai, kiena ki Yosop, nae pulkumali naña Arimateia, naga pe nalogena tai kiena ne Yesu nanua mā rui, ana kilawan ke kiena nalelagaena komin mamaraun ke li kawa taþena lala. Ana pogos naña kiena Suþe mare pae, marauena nene kovio, pa puna Paelat, piun tasnena ne Yesu. Ana Paelat tamānia, pa kuslua tasnena ne Yesu petan lak torovia. ³⁹ Ana yar taþena tai naña amio Yosop e pogos nene, naga Nikotimas naña nanua

tapolou ga pimi puna ne Yesu kolemallo tai vena sun amio. Ana Nikotimas nene naga pimi e pogos nene, þar mēna sur la na liluaren tasnena ne Yesu, amio pupia pias nen sirveve na ponotaninu tai, naþa kana kilo miyuve lualima yam telu [30]. ⁴⁰ Pisi na akus tasnena ne Yesu, apiar e kulmrae yuwowo lala, amio ponotaninu la nene, sa naþa le Yu la amiyumāen ke e kiela marena lala. ⁴¹ Amluluar pae naga, ana lavisin ga e naþa amēar naga e laki torovia, lokove tai momā ga, ana loyumā e lokove nene puluve viu tai mēke ea, naþa atemare ga na wa vena liganen tas nen yar mare va ea, ana pe tai pa li re e poli wa. ⁴² Pisi na amligan tasnena ne Yesu mon loyumā e nene, vanon apisu pog þarovia, lavis legiena na kilaruruena sur punu ga þisi, ana pogos naþa sa mrae vato kovio, Legiena Wa siaria.

20

Puluve korena ga mēke narui

Matiu 28:1-8; Mak 16:1-8; Luk 24:1-12

¹ Amligan tasnena Yesu mēne puluve nene, þisi na momā pano tol legiena þesia na wik taþena. Ana sira la þasia, sane Maria nae Maktala lala, asuñal kolulag wa ke ga wa, amial malo ga apam e puluve.

Ana pogos naþa apam ke lavisi, amilan naþa apisu pupia kilavaru pe mono re si e pulus nen puluve poli, amelilivin lua pae rui pa mēke ga yepasia. ² Ana pogos naþa Maria pisuia, pilon sina ga kiriri pimi, pisu Saemon Pita amio inu, inu naþa imimi lua Yesu mepe sa ga puruvi ga

lala, pisawal pan imimi lua, sape “!Aulai, tasnena ne Yesu kovio! Akuslua kom ko yo tai, memninue ga sane m̃eke pe narui.”

³ Imimi lua memloge, mesuñalu, mepa iroro ga ma puluve. ⁴ Imimi luwoka mekirir ke mepavin, p̃isi na nemiyuve Pita, nepa netol p̃esan yo nene, a Maria taveve imimi lua, naga m̃ena pimi sina. ⁵ Nepa netol puluve, nepa lavisinia nekira pa loyuñã e lele naña amligan tasnena ne Yesu m̃ene ea. Pisi na pe noñal re si Yesu poli, nepisu ga kulmrae la naña amlular tasnena ea, akekapili ga sike sanene, ana pe nepa re loyuñã poli. ⁶ Ana pe piavi re nena ga Saemon Pita siraun inu pam, naga pa loyuñã e puluve. Pisu kulmrae la nañane, sa ruru ga naña amlular Yesu e nanua yemlagi nakoneva. ⁷ Ana tawol tai naña apiar e p̃arina Yesu, naga pe to re amio kulmrae la poli, akawe ruru si naga taaga teke.

⁸ Pita pisuveve ke sur la ne sanene, ana inu m̃ena nepa loyuñã nepisua. Imimi lua mepisu veve ke sanene, mekilia ga narui, memlelaga mesape Yesu suñal si taulu marena rui, lelaga na lelaga.

⁹ Sumo, imimi nalogena la pe mesitom re mesape p̃isi na ve sanene poli, vanon pe mekilia re naña Nasiriena Wa la apisawal ke rui asape kieta Navisaarena monar mare, siraunia mal sina. ¹⁰ Nanua na memninue ga, ana nanagane imimi lua nene mepisu e kilamaramimi. Mepisu m̃ã sanene pano-o, p̃isi na moņasuþe si uñã.

*Maria nae Maktala pisu Yesu
Matiu 28:9-10; Mak 16:9-11*

¹¹ Imimi lua mořasuře si uņa, ana Maria suņał ga suņa e pulgon puluve suņa ga, wamarana mlalau ke. Naga tag mņa sanene pano-o, řisi na kira si pa e puluve, ¹² milan si navisi lua, amiyen kulmrae nařa miyuwowo pařisi, atotano ateke metava. Tai totano e nařa sumo amligan řarina Yesu pa ea, tai totano e nařa lana la pito ea.

¹³ Pisi na lalua apis pa Maria, asape “?Erau, ko otagin ke ya?”

Pisatamņe sape “Akuslua kiau Suře kovio, nemninue amligan mņeke pe narui.” ¹⁴ Naga pisa pa visena nene, řisi na kirawele sina, pisu yar tai suņału sike na. Pe pisuluřar re poli, ana Yesu ke narui.

¹⁵ Pisi na Yesu mņena piun tania, sape “?Erau, ko otagin ke ya? Okale ke a ne e nini?”

Ana Maria sitom mņape yar na yuņaena ga nae e nene, pisatamņea, sape “Yarkeviu, visae ko na okuslua naga petan e nini, awis, ovisawal van inu e nape nařa omligan tasnena mņeke ea. Sineun nesape neva nekusia, neligan ruru sina mņeke e lelenu.”

¹⁶ Siraunia Yesu pio Maria, pio kiena kia, sape “!Maria!”

Naga mloge, pilonia, pisuluřar sane Yesu, pa lavisinia, pio e kiela visena, sape “!Raponi!” nařa kinas nen visena nene “Navianena.”

¹⁷ Pisi na Yesu pisa pania, sape “Maria, toko, ve otolnu re sanene. Inu tařatete nesu e nini, komin pe neřasuře re metava puna ne Ata poli wa. Ana

popon ko na owasuŕe si puna ne kieta puruvi lala, ovisa van la osape nepisa sanini, nesape nanagane, nepa ke si metava puna naga naŕa pe arimau, a pe arimamiu, naŕa pe kiau Ntewa, a pe kiamiu Ntewa.”

¹⁸ Siraunia Maria nae Maktala nene kila sanene, ŕasuŕe si pu imimi nalogena lala, pi-sawal, pisape “Nepisu Suŕe e kilamarau,” a pisayu pan imimi e sur la naŕa Yesu pisa pania.

Yesu m̄alivin kiena nalogena lala

Matiu 28:16-20; Mak 16:14-18; Luk 24:36-49

¹⁹ Ana e legiena ŕesia na wik ke nene wa, ko yepekilavi, imimi nalogena la mesike lele taaga loyuma e yo naŕa metapolou ke ea. Mekiar ruru mratava lala, vanon memaraun ke mesape sa ŕisi yerkawa kiena le Yu la sinela kar imimi m̄ena, sa naŕa sinela kar Yesu rui. Mesuma sane na, veraga ga, Yesu m̄alivi pimi sum̄al likan imimi, sape “!Sum̄arena sike amio amiu!”

²⁰ Naga pisa sanene, ŕisi na pian lologia imimi e lepas na mrapototo la naŕa e limana amio pupia piakapila naŕa e mram̄anena. Mepisuia, ana pogos naŕa mekilia mesape naga Suŕe nene, mekekara na mekekara. ²¹ Pisa ke sina ga pan imimi, sape “!Sum̄arena sike amio amiu!” A miakol ke sina ga, sape “Sa ga naŕa kiau Ata miilanu vena nekila kiena yumaena, ana inu towe neila amiu re vena akila sanene.”

²² Siraunia, miyu yalua pimi e imimi, sape “Amiu atol Ninuna Wa. ²³ Yar a naŕa visae amiu aviewoia vanon kiena mlamulena viowa, yoko

naviowaena nene kovio vetania, ana yar a naña visae amiu ve aviewo re vanon kiena mlamulena viowa, yoko naviowaena nene to lue ga e naga.”

Tomñas pisuia, mlelaga

²⁴ Ana pogos naña Yesu m̃alivin imimi, imimi yaru tai pe su re poli, naña Tomñas Kaora.

²⁵ A suraunia, mepisu naga, mepisawal pania, mesape “!Suḗe m̃alivin imimi, mepisu naga rui!”

Ana naga pe mlelaga re e poli, pisape “Peraga, in na monar nevisu e kilamarau. Visae ve nevisu re piakapila na mrapototo e limana, netol e mrasilmaw nini, a visae ve neligan re lum̃au nini e piakapila e mram̃anena, yoko taḗatete nelelaga nesape naga mal sina ga.”

²⁶ Tomñas pisawal kiena sitomena nene, ḗisi na wik tai ḗaro pano, mesike si lele taaga e yo naḗane. Ana e pogos nene Tomñas m̃ena mesike memio, ana akiar mratava la m̃arera, ḗisi na Yesu pimi m̃alivin imimi yam si tai, sape “!Sum̃arena sike amio amiu!” ²⁷ Ana pis pa Tomñas, pisa pania sape “Lum̃au na nini, okian mraslum̃a, otol luḗaria. Mram̃aneu nanini, oligan lum̃a te ea. Ve ositom ḗele re sina, oviawa m̃arera e inu.”

²⁸ Tomñas mloge na kira pisu Yesu, pisatam̃ea sape “!Kiau Suḗe, ko ope kiau Ntewa!”

²⁹ ḗisi na Yesu pisa pania sape “?Sanape, opisunu ana omlelaga e inu? Nanene naga po, ana pupia navisa ruruena sike e la naña pe apisunu re nena poli wa, ana amlelaga ke pa e in rui.”

Visena maro tai

³⁰ Sur la moki naña Yesu kila, nesiri plan pa e tusi nini rui, ana naga miyumaen mēna kile taņena la moki e maramimi naña pe nesiri plan re poli. ³¹ Ana visena la punu ga naña asike e tusi nini, ve naiila amiuena vena alelaga asape Yesu naga pe Navisaarena, pe narina ne Ntewa na lelaga. Ana kiamiu nalelagaena e kiena kia nene, yoko ve kiamiu mrapa na tolen malena e naga.

21

Yesu m̄alivin sina kiena nalogena la olua

¹ Ana siraunia, imimi nalogena la p̄asia mesuņa garo pupia lapa na garo Taepirias, pona Kalele, p̄isi na Yesu pimi m̄alivi. ² Imimi naña mesike e pogos nene, Saemon Pita, Toņas Kaora, Nataniel nae pulkumali naña Kana ma Kalele, inu nemio olai na sumo Semes, amio sina imimi lua. Ana navaemeena kiena ne Yesu pan imimi e pogos nene sanini.

³ Susumo na Saemon Pita pisawal, pisape “Aulai, in na neva neure lilivi metava narui.”

Pisi na mesuņalu mepisape “Poga, ita punu ga.” Pisi na mepatove mokus waa mepa mokuan lilivi. Mesuņa e sive pano-o yemlagi, ana pe metol re nena ika tai.

⁴ Ana pogos naña yemlagi merarava ruru ke narui, Yesu patom su ura e nene, ana mepisu sane sa ga yar tai ne sike ne, ana pe mepisuluņar re poli mesape naga ke narui. ⁵ Ana Yesu pion pan imimi, piunia sape “?Naruu lala, aņar m̄a ika laņasia, po pere?”

Pisi na mesape “Peraga rui.”

⁶ Pisi na pisa, pisape “Pogaga, akila sanini. Ava akuan si lilivi, ana ve akuan re si sa naña akuan ke ne, aluñarli va e lepas na ãamarua sumo wa, ana nekilia nesape yoko atol ika ãasia.”

Ana pe mepisu kilale re poli wa sane Yesu na pis ke ne, ana mepa meluñar lilivi sa ga naña naga pisa. Ana veraga ga pulen ga ika na ika, ana pogos naña mesape mourelua va metava meþure þele ga, pulen manene la ika lala.

⁷ Pisi na mepisu kilale narui mesape Yesu, ana inu naña imimi lua Yesu sane mepe puruvi, nepisa pa Saemon Pita, nesape “Pita, ovisuia, Suþe namã!”

Pogos naña Pita mloge sane na, suñalu veraga, miyen sina ga mñana kulkota, pula tano e sive, miye pa ura. ⁸ Pe mesu re perinan ura poli, sur sane tasmе ponotia taaga ga [100], ana Pita sumon imimi mokus waa mesirau mopure yalolog ke lilivi naña pulen ika.

⁹ Ana pogos naña mepim ura, mepisu kap tai moña ga, naña amlega ika ãasia e mopulusia, mepisu narin kilaparavi lañas manoa ruru pa sike rui. ¹⁰ Ana Yesu pisa, sape “Ika la naña amiu añar ga na wa, awar ãas vam ve kata.”

¹¹ Ana Saemon Pita pitove, pa metava e waa, þerelua lilivi, þere pimi ura. Ika mok paþisi, memaraun mesape sa þisi lilivi wororowa lawea, ana peraga, meþere pimi pogaga. Pogos naña moñar plan ika la nene, mopuloia tol ponotia taaga lualima yam lima pa telu [153].

12 Ana pogos naña ika la manoa ruruia, Yesu pio, sape “Aimi akinana.”

E pogos nene mepisu kilale ruru mesape Suñe ga nene, pe mesitom re si meviun mesape naga ai. 13 Mepim mesike pa lele taaga narui, Yesu mla kilaparavi, pion pan imimi, amio mña ika lala, ana makania.

14 Naga nene sane pe Yesu kiena navaemeena natelu pan imimi kiena nalogena lala, siraun naña Ntewa tamalia sina naga petan marena.

Yesu amio Pita

15 Ana pogos naña memla pae kamimi kinnanena na kolulag, Yesu pisape sun re amio Saemon Pita. Piun tania, sape “Saemon, narina ne Yoane, sanape? ?Ko na sinemña sii inu keviu, taulu naña la nene sinela sii inu, po peraga?”

Pita pisatamñe pania, sape “Suñe, sur nene okilia pa rui, nekekaran ko pañisi.”

Ana Yesu pisa pania, sape “Pogaga, ovagan narin kiau sipsip lala.”

16 Pogos tañena sina ga, Yesu pisa pania, sape “Saemon narina ne Yoane, ko na sinemña sii inu po pere?”

Pita pisatamñe ke sina, sape “Suñe, sur nene okilia rui. Sa naña nepisaaria, nekekaran ko pañisi.”

Ana Yesu pisa pania, sape “Pogaga, ovisuar kiau sipsip lala.”

17 Ana yam si tai, kila yam telun narui, Yesu piunia, sape “?Saemon narina ne Yoane, ko na okekaran inu kemua lelaga, po peraga?”

Ana pogos naþa Pita pisu Yesu piun m̃a sanene pano tol yam telu, mloge piowa, pisa pa Yesu sape “Suþe, ko okilia make sur punu ga, okilia naþa nekekaran ko paþisi.”

Ana Yesu pisa pania, sape “Pogaga, ovagan kiau sipsip lala. ¹⁸ Ana nevisa ve lelaga van ko sanini, sane nanua sumo, pogos naþa ope m̃ee ke ga wa, ko na okila ke ga sa naþa sinom̃an osape okila. Ko ga taaga omiyen mom̃a kulsota omialoro opa e lele la naþa sinom̃ania. Ana nekilia nevisa van ko, pogos naþa ovim ove yermarua, yoko yar taþena la ayenwo ko e mom̃a kulmrae, atarar lumom̃a aure ko ova e lele la naþa ve sinom̃an re ova ea.”

¹⁹ Visena kiena ne Yesu nene, sane pisawal ke sape sanape naþa yoko aweñar Pita. Ea kiena marena, naga kila þelaga tai naþa mligan naga pito tano, a pisirlua kia kiena ne Ntewa pa metava.

Ana siraun naþa Yesu pisa pa sanene pa Pita, þere ke sina ga naga, pisape naga kilia siraun si naga, pisape “Ovim, otaveve inu lue ga narui.”

Yesu amio Yoane

²⁰ Ana siraun naþa Yesu sun pae amio Pita, Pita pilonia, pisu inu, erau wo kiena ne Yesu, nesike lavisin la luoka. Inu ke narui naþa nanua, e kinanena maro, netotano lavisin Yesu, nepiun tania nesape e imimi nalogena lala, ane yoko vielua. ²¹ Ana pogos naþa Pita pisu inu, piun tai Yesu, sape “?Suþe, sanapen erau nene?”

²² Ana Yesu pisa pania, sape “Visae nasinena-nena kiau sane yoko naga ve kovio re, ana sumña sanene vano neim sina ga, sur nene naga pe kiau, pe pe kiomña re naña ovisa sur tai e poli. Sur naña pe kiomña na kilaena, nepisa pan ko ãa rui, nesape otavevenu silaga.”

²³ Ana suraun pogos nene, pog naña nalelagaena tañena la amloge naña Yesu pisa sanene, amlogepalia, amape Yesu pisayu inunia, sape tañatete nemare pogos tai. Ana Yesu pe pisa re sanene poli, pisa ga sape visae naga sinenania, yoko kilia ve sanene. Sanene, kana kinasia sane sur nene naña Pita piunia, pe kiena re poli, ana pe kiena Yesu ga.

Visen maro

²⁴ Ana inu naña nepisawal ke sur la nene, nesiri plan ruru ke vena akilia auloia. Ana ita punu ga tekilia telelaga tesape visena la nene pe lelaga pañisi.

²⁵ Poga, tusi nene pimi ãisi ga e nini narui. Sur la moki naña Yesu kila sike ea, ana sur la moki na moki naña Yesu kila pe su re e poli. Visae tesiri punuia, nepisu sane pona yoko kana tus la ve mok vañisi, vano-o yo ve tokak e yomarava nini.

**Lologena Wo Kienane Yesu Kristo Kome
Kewo
The New Testament in the Lewo Language of Epi
Island, Vanuatu
Le Nouveau Testament en Lewo langue de l'île d'Épi
au Vanuatu — Niutestamen long Lewo lanwis, blong
Epi Aelan, Vanuatu**

copyright © 2016 Wycliffe Bible Translators, Inc.

Language: Lewo

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 21 Feb 2024 from source files dated 31 Aug 2023

ee028e1c-7e53-571d-8041-681daaf580e8